

**ИБРОҲИМ
РАҲИМ**



**МАНГУЛИК ҚЎШИФИ
Повесть**

Узбекистон ЛКСМ Марказий Комитети
«Ёш гвардия» нашриёти

Тошкент — 1972

Сталинграднинг қибласида, Тинч оқар Доннинг ўнг соҳилида «Ўн бир ўзбек паҳлавони кўрғони» деб аталмиш, кейинги вақтда Волгоград области аҳолисининг зиёратгоҳи бўлмиш баланд чўққида ҳамиша янги-янги гулдаста туради, унда кечаси машъала порлаб, кундузи қўшиқ янграйди.

— Бунинг боиси нима?

Азиз китобхон, бу саволга сиз қўлингиздаги «Мангулик қўшиғи» повестидан жавоб топасиз.



I

1942 йил ёз кунлари. Чекинаётган ўқчи полк қуёшда қовжираган ерларнинг гардини тўзитиб келди-да, ўнг қирғоқда аръергард рота қолдириб, Дон дарёсини шошилинч кечиб ўтди, чап қирғоқдаги бутазорда ер тирнай бошлади. Вақт зиқ. Харьков атрофидаги, До-нецкдаги оғир жанглардан кейин Сталинградга келаётган душман худди аскарларимизнинг товонига осилгандай Донга яқинлашарди. Ўнинг авангард танклари ва ўзи юрар тўплари отган снарядлар аръергард рота ўрнашган дўнгликлар олдида портлар, машина моторларининг ҳайқириғи, танк занжир-фидирлакларининг шалдираши тобора кучаяр, бир сўз билан айтганда, Тинч оқар Дон ҳадемай икки қарама-қарши күч ўртасида қаттиқ талаш бўлиши ва бу талаш, албатта, Ҳамдамовнинг аръергарди жойлашган дўнгликларда бошланиши турган гап эди.

Старший лейтенант Ҳамдамов ротаси Дон бўйида душманнинг биринчи зарбасига кўкракни қалқон қилиб, қадрдан полк соҳилга маҳкам ўрнашиб олгунча уни пана қилиб туришдай масъулиятли ва шарафли бурчини яхши биларди. Унинг жангчи ва командирлари ҳам буни тўла ҳис қиласар эдилар. Жангчиларнинг руҳидан Ҳамдамовга шу нарса маълум эдики, чекиниш маневри жанглари, уйқусиз тунлар, ҳафталаб тўхтовсиз босиб ўтилган йўл азоби шу пайт ҳеч кимнинг ҳаёлига келаётгани ва кўзига ҳеч нарса кўринаётгани йўқ. Чунки ўнг қирғоқ — сўнгги марра, нарида жой йўқ. Нарида — Сталинград!

Ҳамдамов взводларни пасту баланд ерларнинг дўнгликларига ярим доира шаклида мудофаага жойлади. Бу ярим доира мудофаасининг қоқ ўртасида бўлган «115²» белгили чўққини Ҳамдамов ўзининг қадрдан дўсти, лейтенант Комилов взводига топшириди.

Лейтенант Комилов тажрибали командир сифатида рота командири Ҳамдамовнинг ўнг қўли ҳисобланарди. Унинг мудофаа жангларида катта тажрибаси бор. Взвод жангчилари ҳам гўё атайлаб саралаб олингандай лишиқ йигитлар эдилар. Шунинг учун Ҳамдамов бу взводни энг масъулиятли чўққига ташлади. Комилов эса, чўққини дарҳол «қалъя» қилиб олди-да, взводни жангга шайлади.

Атроф теп-текис. Комиловга тепаликдан олис-олислар дурбинсиз ҳам кафтдек кўриниб турибди. «Қани, фриц тепаликка бош суқиб кўрсин-чи!» дер эди Комилов ичидা. Дарҳақиқат, шом пайти немисларнинг авангарди чакалакзордан бош суқиб эди, дўнгликлардаги пистирма сумбаларининг ҳаммаси бир овоздан варанглади. Немислар дарҳол изларига қайтишди. Шундан сал ўтмай, ўша чакалакларнинг чап биқини томонидан икки танк ўрмалаб чиқди-да, синамоқ учун атайин қилдими,

эҳтиёт чора учунми, ҳеч ким йўқ жойларга қараб варанглатиб замбарак отиб, аста ўрмалаб кела бошлади. Буни Ҳамдамовнинг ПТРчилари қарши олдилар. Сал ўтмай, икки танкнинг бирини қоп-қора тутун қопладида, у ловиллаб ёниб кетди. Иккинчи танк дарҳол тарилаб бурилиб, орқасига қайтди.

Аръергард командири старший лейтенант Ҳамдамов ярим кечагача жангчиларини шайлаб, немисни кутди. Лекин душман негадир Ҳамдамовни ҳам, унинг узоқ-яқиндаги қўшниларини ҳам мутлақо безовта қилмади.

— Немис ўз жадвалининг бир ҳарфини ҳам бузмайди, — деди сержант Ваҳобов қоп-қора кўзларини ёндириб, — ҳозир маза қилиб ухлашяпти абраҳлар.

— Кучига ишонади пес, тарақа-туруқини эшитдингку! — деди помкомвзвод Бек.

— Бу мохов эрталаб номозини ўқиб, нонуштани жиғилдонига уриб олгач, юриш бошлайди, — деб тахмин қилди Ваҳобов.

Кейин улар гўё маслаҳатлашиб олгандай бирдан биноклдан кўз узмай ўтирган Комиловга мурожаат қилишди:

— Ўртоқ лейтенант!

Комилов индамади.

— Ўртоқ лейтенант, — давом этди Ваҳобов, — немис нега жимиб кетди? Мушак ҳам отмаяпти-ку!

— Куч тўплайтган бўлса керак, — деди унга Бек.

— Кучига ишонади мохов.

Тун жим-жит. Аҳён-аҳёнда тўпларнинг бўғиқ овози узоқ-узоқлардан аранг эшитилади. Афтидан, қўшни армияларнинг марраларида одатдаги тунги отишувлар бормоқда. Баъзан узоқларда чақмоқ чақади. Ё замбарак чақмоғи, ё мушак нури. Ўз-ўзидан аёнки, немисларнинг ҳам барчаси ухлагани йўқ. Аммо Ҳамдамовнинг одамлари мижжа қоқмай тонг оттиришди.

Шу орада полкнинг ҳамма батальонлари янги марракарга жойлашиб олишиди. Жами пиёда ҳандаққа кирди, ҳамма тўп, миномёт пана ячейкаларга ўрнашиди, барча ўт очар сумба сал ишора биланоқ гумбурлайдиган қилиб, ўнг қирғоққа қаратиб қўйилди. Бу — ишнинг боши эди, холос. Ерга чуқурроқ кириб олиш, мудофаани та-комиллаштириш ишлари тўхтовсиз давом этди.

Полкнинг иккала биқинидаги қўшни полклар ҳам худди шу ишни қилишмоқда. Доннинг юқори қайилмаси деб аталмиш жойда Серафимовичдан тортиб Калачгача, ундан нари ва бериларда ҳам худди шундай ишлар бормоқда эди.

Бундан хабар топган Ҳамдамов, аръергарднинг вазифаси бажарилди, деб ҳисоблади-да, дастлабки келишувга биноан, рухсат сўраб ўтирумайди, ўз взводларини кечикка жўнатди.

— Немисни хўп қирадиган жой эди, — деди Комилов тепалик окопини ташлаб чиқаётib.

— Оёғингиз тортмаётган бўлса шу ерда қолаве-ринг,— деди Ҳамдамов унга.

Комилов унинг бу гапини киноя деб тушунди. Шундай мустаҳкам мудофаани, жанг қилишга қулай паккани ташлаб кетаётганидан ичи ачишиб турса ҳам ноилож эди. Рота қаерда бўлса унинг взводи ҳам ўша ерда бўлиши керак-да.

Шундай қилиб, Комилов взводи аръергарднинг аръергаридай тепаликдан энг кейин қўзғалди. Олдинги взводлар қайиқда сузиб ўтмоқда эдилар. Қайиқларда бола қучоқлаган хотинлар, қоп қўлтиқлаган чоллар ҳам бор эди. Аҳоли ҳам нариги қирғоққа интиларди.

— Сизни командир сўраяпти,— деди Комиловга рота миrzаси, оппоқ тишларини ялтиллатиб.

— Қаерда?

— Анави бурчакдаги оқ уйда.

— Қандай янгиликлар бор, ўртоқ тарихчи? — деб сўради Комилов ундан.

— Янгиликнинг ҳаммаси ана шу оқ уйда, — деди Мирза.

Дўнгликтин остида, Доннинг ўнг ёқасида қирғоқ бўйлаб чўзилган хутор бор эди. Унинг номини Комилов оператив харитадангина биларди. «Старая Клетская». Комилов нима учундир харитасини қўлга олди. Харита-да хуторнинг ҳамма уйлари, шу жумладан, рота ми-рзаси бармоғи билан кўрсатган уй ҳам бор эди. Комилов оператив харитасини қатламадай буклаб, яна планшет-га солди-да, тайин қилинган уйга кирди. Ҳамдамов тўрда ўтириб, буғи чиқиб турган сут ичмоқда. Комилов келиши ҳамон уй бекаси унга ҳам бир кружка ҳовури чиқиб турган сут келтириб қўйди. Кейин столда қову-рилган гоз пайдо бўлди. Унинг ҳиди гупиллаб димоқ-қа урди.

Гўштнинг исини билибми, ичкари уйдан кичкина қора кучукча чиқди-да, рўпарага ўтириб, гоҳ Ҳамда-мовга, гоҳ Комиловга мўлтиллаб боқди. Ҳамдамов гоз гўштини майдалаб қўйди-да, уй эгаларини ҳам чақирди:

— Келинглар, бирга баҳам кўрамиз.

Уй эгаларининг томоғидан таом ўтадиган вақт эмас эди. Улар Ҳамдамовнинг қайиқларида чап қирғоққа ўтиб олишмоқчи ва Сталинграддаги қариндошларини-кига боришлоқчи эди. Қамбағал бўлсанг кўчиб боқ. Бутун оила чол-кампирдан иборат бўлса ҳам рўзғори катта эди. Ўзи билан нима олсину нима қолсин? Си-гирними? Қўйлариними? Фозлари-чи? Кампир ҳамма нарсасини олиб кетмоқчи. Душманга ҳеч нарса қолма-син, дейди. Унинг чоли эса, бошқа ғамда: нима бўлса ҳам ёв келгунча нариги қирғоққа ўтиб олишсаю бош-лари омон қолса бас.

Ҳамдамов шошиб-пишиб ионуштасини тугатди-да,
Комиловга деди:

— Жангчиларингизга буюринг, чол-кампирни қа-
йиқта жойлашсин. Ўзингиз энг кейинги қайиқда ўта-
сиз.

У чиқиб кетгач, бояги кучукча Комиловга яқинроқ
келди-да, думини ликиллатиб, ундан илтифот кутди.
Комилов қўлидаги суякни унга ташлади.

— Бўлдиларингизми?— деди Комилов уй эгалари-
га.— Ҳозир қайиқ келади.

Ҳамдамов қайиги Доннинг қоқ ўртасида сузаётган
вақтда орқа қирғоқда гумбурлаб снаряд ёрилди. Ол-
динда ҳар бир қулоқ тупроқ баланд кўтарилиб, қоп-
қорайиб атрофга сочилди. Тинч оқар Дон ҳам гоҳ ўнг-
да, гоҳ чапда кўкка сапчий бошлади. Унинг тўлқини-
дан қайиқлар бешикдай тебранарди.

— Бошланди,— деди Ҳамдамов орқасига қараб.

Орқадаги қирғоқ портлашлардан бўтқадай биқир-
лар эди.

— Келяпти,— деди ўз-ўзига Ҳамдамов.— Комилов-
ни қутқазиш керак. Тезроқ!

Бир иш қилиб чап қирғоққа ўтиб олгач, Ҳамдамов
қайиқларни дарҳол Комиловнинг взводига юбориб, ўзи
комбат ҳузурига бораркан, қирғоқдан сал нарида полк-
нинг янги командири Веселовга дуч келди. У капитан
Баталовга ғазабини сочиб, қаттиқ-қаттиқ гапирмоқ-
да эди.

Полк командири подполковник Веселов табиатан
мулойим ва босиқ одам эди. У Харьков атрофидаги
тенгсиз оғир жангларда ҳам бирдай босиқ ва тадбир-
корлик билан иш тутган эди. Ҳамдамовнинг назарида
у ҳозир гўё бутунлай ўзгариб қолгандай сезилди. Та-
жанг важкоҳати ва зардали тапларидан у нимадандир
норози эди.

Теварак-атрофда истеҳком қазиётган жангчи ва офицерлар ҳам жон-жаҳдлари билан ишлашмоқда. Алоқа офицерлари гоҳ у ёққа, гоҳ бу ёққа югуриб ўтиб туришибди. Бу орада полк командирининг адъютанти — ёш, келишган лейтенант югуриб келди-да, ёш офицерларга хос эпчиллик билан чиройли қилиб честь берди, подполковник Веселовни полк штабида икки генерал кутаётганини хабар қилди. Веселов билан адъютант штабга олдинма-кейин югуриб кетишиди.

Улар кўздан ғойиб бўлар-бўлмас биринчи батальон командири капитан Баталов Ҳамдамовни тик турғизиб қўйди, асабини босолмай, гўё аламини ундан олаётгандай:

— Нима учун бу ерда юрибсан? Сенинг учун трибуналга борайми! — деб ўшқирди.

— Полк Дондан ўтиб олгач, аръергарднинг вазифаси бажарилди, деб ҳисобладим... — деди Ҳамдамов аста.— Шундай келишиб эдик-ку.

— Вазият сен билан биз ўйлаганча эмас. Эшидингку, полк штабига бир эмас, икки генерал келибди. Бекорга келган деб ўйлайсанми? Волганинг тақдиди Донда ҳал бўлармиш. Бу қирғоқда эмас, нариги қирғоқда. Тезда жойингга бор. Шу заҳоти кечаги жойингни ишғол қил ва буйруқсиз бир қарич ҳам қимиirlама!

Шундан кейин Баталов бўйнидан дурбинини олиб, Ҳамдамовнинг қўлига тутқизди.

— Ташлаб кетган жойингга бир қараб кўр. Ма, ол, қара, қарайвер...

Ҳамдамов бутазордаги икки дарахт орқасига ўтиб, комбатнинг дурбинида ўнг қирғоқдаги дўнгликларга синчиклаб қаради. Ўнг қирғоқ жарлик ва кичик дўнгликлардан иборат эди. Ҳамдамов ротаси кеча аръергард жангига қилган дўнглик эса, соҳилдан етти юз метрча нарида бўлиб, шу теварак-атрофдаги ҳамма

катта-кичик, баланд-пастликларнинг ҳокимидай герда-йиб турарди. Мабодо у тепаликка немис батареяси ми-ниб оладиган бўлса, Веселов полки жойлашган соҳил-нинг ҳар бир қаричини мўлжалсиз ҳам тўпга тутиши ва траншеяда ўрмалаган ҳар бир солдатни қорага олиши турган гап эди. Аксинча, бу дўнглик Совет Армияси қўлида турса, Донга ҳужум қилаётган душман қўшин-лари жангда маневрдан маҳрум бўлиб, кўр-кўронга ҳа-ракат қилишга мажбур бўларди.

Ҳамдамов Веселовнинг нимадан норози эканлиги ва дарғазаб бўлган Баталов ундан нимани талаб қилаётга-нини тушунди-да, шу заҳоти орқасига қайтди.

II

Ҳамдамов юборган қайиқлар Доннинг нариги қирғо-ғига яқинлаб қолган эди. Ҳамдамов уларга «орқангга қайт!» ишорасини берди. Дон тўп ва пулемёт ўқидан шовладай қайнар, дарёга яқинлаб бўлмасди. Ҳамдамов чап қирғоққа ўтиб олган икки взводни дарҳол бир жой-га тўплади-да, қайиқ кутди. Қайиқчилар Ҳамдамовнинг сигналини тушунмаган эдилар. Улар Комиловнинг взво-дини юклай бошладилар. Шу чоқ қирғоқда комбат пай-до бўлди-да, Ҳамдамовга:

— Ҳали ҳам шу ердамисан?!— деб қичқирди.

Комбатнинг феъли Ҳамдамовга маълум эди. Комбат Ҳамдамовни яхши кўрар, бинобарин, унга заррача ёмон-ликни раво кўрмасди. «Трибуналдан сўз очди. Демак, унинг аҳволи оғир», деб ўйлади Ҳамдамов.

Ҳамдамов взводларга қўли билан ишора қилди-да, ўзини сувга ташлади. Уларни дарёда кўргач, Комилов взводи ўз қирғоғига қайтди, қайиқлар эса, дарёни сузиб ўтаётган солдатларни сувдан териб олишга ки-ришиди.

— Орқангга қайт, Комилов! — деди Ҳамдамов сувдан чиқа солиб, уни санлаб. — Тепаликка қайт! Тезроқ!
— Чакки қилган эканмиз.

Комиловнинг миясига отилиб кирган фикр шу бўлди. Снарядлар ҳамон портламоқда эди. Бундан маълум эдики, душман пиёдаси ҳали қўзғалгани йўқ. Комилов тепаликни инфanterиядан — немис пиёдасидан олдин әгаллашни кўзлади:

- Бек!
- Лаббай!
- Қани, кўтар взводни!

Помкомвзвод Бекнинг чийилдоқ овози жангчиларга таниш эди. У ҳар галгидай бу сафар ҳам «взвод сафлан!» демади. Чийиллаб қичқирмади ҳам. У чуқурчада ётган сержант Ваҳобовнинг ёнига борди-да, аста:

— Жангчиларингни бошла! — деб буюрди ва орқасидан қўшимча қилди: — Лейтенант ҳў, анави ерда. Ўшанга етиб ол!

Ваҳобовнинг бўлинмасини йўлга солгач, у бошқаларни ҳам худди шу зайлда оёққа турғизди. Бир зумда Комиловнинг бутун взводи тепаликка олиб борадиган жарликка йифилди ва занжирдай тизилиб, тепаликка йўл олди. Комилов олдинда бормоқда эди. У жарликдан ёнбағирликка кўтарилаётган кезда қўлидаги автомати пастликка учиб кетди.

— Бек, автоматимни олиб бер! — деган эди, Бек унга снаряд парчаси буклаган автоматнинг дискасинигина кўрсатди.

Комилов пистолетини қўлига олди. Шу вақт унинг олдида Ҳамдамов пайдо бўлди-да, дўнгликка кўтарилиши ҳамон ағдарилиб тушди. Шу заҳоти унинг тепасидан бир гала ўқ визиллаб ўтиб, жарликнинг нариги бетига тўкилди. Комилов унинг олдига кўтарилгунча кимdir, жангчилардан бири лапанглаб ўтиб, ундан ўзиб кетди.

Ҳамдамов ўрнидан туриб, яна бир зум югурди-да, яна ерга тошдай отилиб тушди. Унинг атрофида чувиллаган ўқлар оқиш гардни тўзитиб, шўрхок ерга кириб кетди. Ўқлар чўкаётган жойда булутдай оқиш ва кул ранг чанг тез-тез кўтарилиб турди.

Ҳамдамов ётган жойидан кўз қири билан ўнг ёшига қаради. Унинг орқароғида яна бир неча елка гимирлаяпти. Афтидан, салгина қулайлик юз берса, улар яна бир неча метр олға ташланишни кўзлардилар. Ҳамдамов чап томонига разм ташлади. Иккинчи взвод кўзига чалинмади — у ҳали ҳам жарликтан чиқолмаган эди. Уларни миномётлар савалаяпти. Кутиб турадиган вақтми! Бир жойда ётганни миномёт тупроққа қориштириб қўяди-ку!

— Встать! Вперед!!!

Ҳеч ким Ҳамдамовнинг бу командасини эшифтмади. Шундан кейин Ҳамдамов взводни миномёт дўли остидан чиқариш учун уларнинг олдига ўзи боришга мажбур бўлиб эди, кимнингдир қаттиқ қўли унинг елкасидан босди. У ётиши билан варанглаб мина учеб келди-да, елкадан ўтиб, сал орқада гумбурлаб ёрилди. Унинг парчалири атрофга бодроқдай сочилиб кетди.

— Комилов! — деб қичқирди рота командири унинг одамларини миномётлар ҳужуми майдонидан чиқариш учун.

Комилов ундан анча олислаб қолган, унга етиб олиш учун эса, Ҳамдамов бир неча бор сакраши керак эди. Шу вақтда иккинчи взвод жангчилари ҳам миномётлар олови зонасидан чиқиб олишган ва яроғ-аслаҳа, фляга ҳамда белкуракчаларнинг тош, шағалга сурилиб ғижирлашидан мълумки, улар эмаклаб, олға силжимоқда эдилар. Бош кўтариб бўлмайди. Аммо ётиб туриб, жангни бошқариш ҳам мумкин эмас, кимга қарши жанг қилишни кўриш керак-да. Ҳамдамов бошини кўтариб,

чўққиликка боқди. Тонгда ўзлари ташлаб кетган чўққиликда бир неча қора кўринмоқда. Тепалик атрофини ўқлар шудгор қилиб ташлаган бўлса ҳам, немис уни борлиқ олови билан қовурмоқда эди.

- Комилов! — деди Ҳамдамов овозининг борича.
- Лаббай!
- Анавилар сеникиларми?
- Ҳа, меникилар.
- Бўлмаса нега ивирсиб юрибсан? Бормайсанми?!
- Немис қўймаяпти-ку!
- Сеникиларни қўйипти-ку!
- Уларни ўзим қўйганман.

Комилов боя, эрта тонгда бу ерни ташлаб кетаётиб, окоплар оғзига тош териб, баъзи жойларга эски-тускилардан қоровул ясаб, айрим жойларга эса тешик каскалардан «пистирма» ўрнатиб кетган. Комиловнинг ҳийласи эрталабдан бери ўз кучини кўрсатар, немислар икки соатдан бери шу тепаликдаги мана шу «совет мудофаачилари»ни йўқ қилиш учун куч сарфламоқда эди. Окоплар текисланиб, «қоровул»лар парчаланиб, терилиган тошлар қум бўлиб кетса ҳам, каскалар «тирик» эди. Улар портловлар зарбидан гоҳ у ёққа, гоҳ бу ёққа сакраб, баъзан думалаб турарди. Бу эса, немисларга мудофаачиларнинг маневрига ўхшаб туюларди.

Ҳамдамов шу он ўша каскаларнинг бири бўлгиси келди. Боши ўша тепаликка етиб, оёфи ўша окопларга тегса, Ҳамдамов ўз комбатини трибунал чангалидан сугуриб олган, бинобарин, ўзини исноддан қутулган деб биларди. Афсуски тепалик ҳали анча олисда ва иккича куч ўртасида қаттиқ талаш бўлмоқда, унга Ҳамдамовдан кўра немис яқинроқ, Ҳамдамов шошар эди:

- Комилов!
- Лаббай!
- Бўлмайсанми?!

- Кўраяпсиз-ку, кўз очирмаяпти.
- Қанча одаминг қолди?
- Санаганим йўқ, аммо қаторларимиз анча сийрак-лаб қолди.

Шу вақт немисларнинг орқасида, икки ёнида тўп ўқлари портлай бошлади. Қадрдон полк батареяси жангчиларимизни ҳимоя қилмоқда эди. Шу ҳимоядан фойдаланиб, Комилов кичик-кичик гурӯҳлар билан тепаликка ташланмоқчи бўлди-да, биринчи бўлинма командирини чақирди.

— Ваҳобов!

Жавоб бўлмади.

— Сержант Ваҳобов! Ҳо, сержант!

Ваҳобов комвзводнинг яқинида ётса ҳам, унинг овдзига жавоб қилмади. Комилов сержантнинг олдига эмаклаб борди. У ивиб ётибди. Комилов унинг томирини ушлади. Томир аста урмоқда эди.

— Бек!

— Лаббай!

— Санитар қани! Чақир, ярадорларга қарасин.

— Ўрнидан туролмайди-да. Биқини ўпирилиб кетган.

— Ваҳобовга ўзинг қара, бўлмаса.

Комиловнинг взводи ҳадеганда қўзғалавермагач, Ҳамдамов унинг олдига эмаклаб келди.

— Мунча имиллайсан, Комилов, ҳадемай инфантрия қўзғалади.

— Кўрмаяпсизми, аллақачон қўзғалганд.

Ҳамдамов бошини кўтариб, дурбин билан теваракка қаради: немис пиёдаси босиб келмоқда эди.

Ҳамдамов овозининг борича қичқирди:

— Ўт очинг! Ўт очинг!

Кимнингдир автоматидан бир ҳовуч олов чиқди ва бу олов билан бирга сассиқ ҳид димоқقا урди. Ҳамда-

мов нафасини ростлаб олар-олмас туриб яна кучлироқ қичқирди:

— Залп! Залп!! Залп!!!

Ротада қанча омон қолган сумба бўлса бари тилга кирди. Бундан немис занжирининг баъзи ҳалқаси узилди, айримлари ер тишлади, аммо ҳужум йўли тўсилемади, аксинча ҳужум штурмга айланди.

Ҳамдамов ўрнидан сакраб туриб, Комиловнинг белидаги запас гранатани тортиб олди-да, «Менинг орқамдан олға» деб қичқирганича тепалик томон югурди. Унинг орқасидан сийраклаб қолган взводлар қўзғалди. Лекин ҳамма жангчилар ҳам оёққа туриб улгурмасдан Ҳамдамов яна ерга ийқилди.

— Бек, комротага қара!— деди-да, Комилов ярадорнинг қўлидаги гранатани тортиб олиб, ўзи олға ташланди, аммо бу гал ҳам тепаликдаги окопларга етолмади. Бу окопларга Комиловдан олдин бир неча немис кириб олди. Комилов қўлидаги гранатасини у ерга ташлаб улгурди, холос. Аксига юриб, граната окопларнинг бериги четида портлади. Бирортасининг бурнини қоната олдими, йўқми — қоронғи. Окоплар ичида ҳам гранаталар портлади, лекин бундан ҳам Комилов кутган натижа чиқмади, немислар уни бутунлай эгаллаб олишди.

— Граната!— деб қичқирди Комилов.

— Тамом бўлди...

— Бек!— қичқирди Комилов.

Помкомвзвод Бек старший лейтенант Ҳамдамовни судрамоқда эди.

— Патрон!

Унинг олдига қуруқ патронтажни ташладилар. Комилов уни зарда билан орқага улоқтириб юборди-да, жангчиларига буюрди:

— Орқага! Эмаклаб... Битта-биттадан...

III

Ҳамдамовнинг ярасини жарликда боғлашди-да, хуторнинг энг чеккасидаги оқ уйга келтириб, эгаси ташлаб кетган каравотга ётқизиб қўйнишди. Белида қизил бинт. Бошида оқ бинт. Қўлида ҳам бинт. Санинструктор Собиров унинг қонга бўялиб, қизариб кетган бинтларини янгилашиб, қайтадан боғлади, афти-башарасини қон ва чангдан тозалаб ултургани ҳам йўқ эдики, Ҳамдамовнинг кўзи очилди. Қаер? Нима? Унинг кўзида булут, унинг устидаги шам, шамлар айланяпти, капалаклар учяпти. Ҳамма ёқ айланяпти. Секин-секин ҳамма ёқ жойига тушди... Ҳушига келган старший лейтенант Ҳамдамов санинструктор Собировдан сўради:

- Қаерда ётибман?
- Хавфсиз жойдасиз, ўртоқ старший лейтенант.
- Сендан буни эмас, рота қаерда, деб сўраяпман, бефаҳм.
- Рота жангда.
- Комилов тепаликни олдими, йўқми?
- Оляпти, ўртоқ старший лейтенант. Оляпти... — деди Собиров ва уни тинччиш учун қўшимча қилди: — Хотиржам бўлинг, олади.
- Яраланганимни ҳеч кимга айтма. Еки айтиб қўйдингми?
- Йўқ.
- Яхши қилибсан. Ҳеч кимга!
- Есть.
- Ҳамдамов қуришган оғзини ҳўллаш учунми, ютиниб олдида, сўради:
- Қофоз, қаламинг борми?
- Бор.
- Ёз. Комбатга маълумот юборишга кечикдим.

— Қалам ушлаёлмайман, ўртоқ старший лейтенант.
Қўлим боғлиқ

- Яраландингми?
- Оғир эмас, енгил...
- Мирзани топ...

Собиров бир зумда қаердандир рота котиби Мирзани бошлаб кирди. Мирза рота командири уни нима учун чақиришини биларди. Шунинг учун бу гал ҳам қоғоз, қаламини ростлаб, командирнинг нурсизланиб қолган кўзига боқди. Ҳамдамов одатдагидан ҳам камгап эди. Авзойидан дарди оғир, алами ундан ҳам оғир эди. Мирза командирнинг кўзидан, қуруқшаган лабини ялаб намлаётганидан бирор ишора сездими ёки маълумот ёзадиган вақт бўлиб қолгани учунми, Ҳамдамов унга бирор гап айтиб улгурмай нималарнидир ёза бошлади.

— Нима ёздинг?— деб сўради ундан Ҳамдамов.
— Сводка. Тонгги жанг тафсилоти. Улганлар... Ярадорлар...

— Қани ўқигин-чи.

Мирза комбат номига ёзилган тафсилотномани ўқиди. Ҳамдамов кўзини юмиб ётиб тинглади-да:

— Бошқатдан ёз!—деди.—Комбат воқеанависликни ёқтирмайди.— Мирза ёзувини йиртиб ташлаб, янги варакқа тегишли шифр, грифларни солиб, ҳарбий маълумот қоидасини келтиргач, «эшитаман» дегандай, командирнинг кўзига боқди. Шундан кейин Ҳамдамов ротанинг тонгги жанглар вақтида «115²» тепалигига кўтарилигани, аммо у ерга Ҳамдамовдан аввал немис кириб олгани ва уни эгаллаш учун жангни давом эттираётгани ҳақида диктовка қилди. Мирза унинг фикрини диққат билан қоғоз бетига битди, охирига йўқотишлар—ҳалок бўлганлар ва ярадорларнинг рўйхатини илова қилди-да, уни старший лейтенантга ўқиб берди.

— Ярадорлар рўйхатидан менинг номимни учир,—

деди Ҳамдамов.— Яхиси, охирги варақни оққа кўчириш.

Ўз командирининг фикрини унинг яримта сўзидан ҳам тўла англаб оладиган зийрак Мирза ҳайрон эди. «Ярадорлигини комбатдан яширгани нимаси? Кўзлаган мақсади нима? Бу ерда ётгани билан тепалик қўлга кира қолармиди?»

Мирза рота командирининг оғир ярадор бўлганини ёзмасликни катта гуноҳ деб билди ва охирги варақни оққа кўчириса ҳам, Ҳамдамовни ярадорлар қаторидан учирмади. Ҳамдамов маълумотга имзо чекаётib буни кўриб қолди-да, жаҳли чиқди. Ўз номини ярадорлар рўйхатидан ўз қўли билан ўчириб ташлади.

— Штабга ўзинг элтиб бер. Қайтганингдан кейин штурмга борасан,—деди у жаҳл билан.

Мирза ўрнидан туриб, честь берди.

Ҳамдамов лабини тили билан ҳўллаб олгач, кўзини юмиб туриб деди:

— Ҳа, бўпти... Бора қол. Ўзингга эҳтиёт бўл, немис тўпи Донни бўтқа қиласпти.

— Хотиржам бўлинг, ўртоқ старший лейтенант,— деди Мирза қадрдан командирининг нурсизланиб қолган юзига боқиб. Мирза маълумотни конвертга солиб, уни брезент планшетга жойлади-да. чиқиб кетди. У қирғоқка келгунча немис тўпи уни неча марта ётқизиб турғизди. Дарё ҳақиқатан ҳам немис тўплари зарбидан гоҳ у ерда, гоҳ бу ерда қайнамоқда эди. У сўнгги чуқурчадан иргиб чиқди-да, қирғоқда чайқалиб турган қайиқчага ташланди.

— Мирза! Мирза!

Комиловнинг овозини таниб, Мирза унга ялт этиб қаради, оқ уйни кўрсатиб, яна ўзини қайиқقا ташлади.

Комилов жангчиларини хоторнинг ғарбий этагида мудофаага турғизиб, пулемётчиларга ўт очиш секторла-

рини белгилаб, дарахтларга «кукушканлар»ни миндириб қўйгач, комрота Ҳамдамовни қидириб юрган эди. Мирзанинг ишорасидан маълум бўлдики, Ҳамдамов эрталаб нонушта қилган оқ уйда экан. Комилов йўл бўйида ўсган ажриқларда этигининг чангини тозалади, кийим бошларига ёпишган оқиши гардни қоқиб ташлади-да, камарини ростлаб олгач, оқ уйга йўл олди. У ичкарига кираётганида санинструктор Собиров унинг йўлини тўсди:

— Уртоқ лейтенант!

Комилов ундан ташвишланиб сўради:

— Қалай?

— Тезда нариги қирғоқча жўнатиш керак...

— Ҳарбий фельдшер қаёқда?

Собиров боши билан олчазорни кўрсатди. У олчазор-даги янги қабринг бирида ётарди. Комилов ўртоқлар мозорига бир қараб қўйди-да, Собировдан сўради:

— Ҳамдамовнинг тузалишига кўзинг етадими?

— Чиқмаган жондан умид,—деди Собиров хомуш.

Комилов лабини аста тишлади.

— Санитарларингни чақир бўлмаса,—деди Комилов қандайдир қарорга келгандай.

— Ҳеч қаерга кетмасмиш.

— Нега?

— Доктор бўлса кучини шу ерда кўрсатсинмиш. «Менинг борадиган жойим битта!» деб тепаликни кўрсатяпти.

Уларнинг гапи тугамай рота котиби Мирза югуриб келди-да, нафаси бўғзига тиқилган ҳолда гап бошлади:

— Уртоқ лейтенант... Рота шу ерда қоларкан, комбат «қимирлашмасин!» депти.

Комилов уни ваҳимачи деб ўйлади шекилли, унга: «Ҳар куни эрталаб гимнастика қилинг, Мирза тарихчи», деди-да, ичкарига кириб кетди.

Ҳамдамов ўрта уйда худди госпиталда ётгандай оқ рўжалар ичидаги ётарди. Унинг ранги рўжалардан ҳам оқ эди. Уй эгасининг кучуги ярадорнинг рўпарасида чўққайиб, унинг кўзидан кўзини узмай ич-ичидан йиғлаб ўтиради. У ҳатто Комиловга ҳам жой бўшатмади. Комилов этиги билан уни сал нари сурисиб қўйдига, Ҳамдамовнинг пешанасини ушлади. Унинг пешанаси нам эди. Комиловнинг қайноқ қўлиданми ёки одам шарпасини сезибми, Ҳамдамов кўзини очди. Комиловни таниб, ўрнидан турмоқчи бўлди. Санинструктор елкасдан босиб уни ётқизиб қўйди.

— Тепаликни олдингми?—сўради Ҳамдамов.

— Оламиз!—деб қўйди Комилов.

Ҳамдамов яна ўрнидан туришга ҳаракат қилди. Унинг кўзларида шифт яна парракдай айланди. Бу гал уни Комиловнинг қўллари босиб қўйди.

— Олишимиз шарт!—деди Ҳамдамов қуришган томонини намлаш учун ютиниб.—Армиямизга плацдарм керак. Ӯша тепаликсиз ҳар қанча жой икки пул!.. У ердан кетмасак бўларкан. Бизни ҳеч ким қувлагани йўқ эди.

— Айтувдим-ку...

Армон устига таъна ҳам қўшилди-да, Ҳамдамовнинг ранги кўкариб кетди.

— Ҳа... Айтувдинг, Комилов... Комбат ҳам мен туфайли жабр тортмасин.

Комилов «айтувдим-ку» дейишга деб қўйиб, тилини тишлиди.

— Собиров!—деб қичқирди Ҳамдамов.

Санинструктор пайдо бўлди.

— Ўртоқ старший лейтенант, қичқириш мумкинмас. Нега ўзингизни аямайсиз?

— Қаёқда юрибсан, бўлмаса?

— Шу ердаман, нима дейсиз?

— Камар келтир. Кўп камар келтир.

— Камар?

— Ҳа! Белимни маҳкам танғиб оламан. Қорним осилиб тушмаса марра меники.

Собиров ҳайрон бўлиб Комиловга қаради. Комилов унга:

— Сен ўтири, камарни ўзим топиб келаман,—деди-да, қўли билан ишора қилди: «олдидан бир қадам ҳам қимирлама».

— У ёқдагиларни нима қиласман?

Қўшни уйларда ротанинг, шу жумладан Комиловнинг ярадор жангчилари ётарди. Собиров уларни медсанротага жўнатишга тайёрлаб улгургани йўқ. Баъзиларининг яраларини қайта бинтлаши керак эди. Комилов санинструкторнинг саволига жавоб қилмай чиқнбетди. Собиров унга яна ниманидир айтмоқчи бўлиб орқасидан чиқди, лекин Комилов ярадор жангчилар ётган уйнинг дарвозасига бориб қолган эди.

Ярадор аскарлар ётган уйни маҳорка тутуни босган. Оғир ярадорлар бу билан ишлари йўқ, ўртаниб ётишибди. Яраси енгилроқлари папиросларини бурқситиб, ўтган жанглар ҳақида бирни бирига навбат бермай, гурунглашмоқда эдилар. Комилов улар нима деб гаплашаётганликларини, ҳатто гап ўзи тўғрисида бораётганини ҳам эшитгани йўқ.

— Ассалому алайкум!—деди Комилов осто надан ҳатларкан.

Ярадорларнинг бири комвзводни таниб, ўрнидан сакраб турдию ўша замони йиқилди, Комилов уни суюб қолди.

— Нима қилганинг бу, сержант Ваҳобов! Ярангни ўзим бинтлаганман-ку. Ўрнингдан туришинг мумкин эмас!

Ваҳобов лейтенантнинг ёрдами билан аста жойига

ётди. Ранги оқариб кетганидан унинг яраси оғир эди.

— Қимирлама, Ваҳобов, ҳозир қайиқ келади,—деди Комилов унга.

Ваҳобов ўзини от ўйинида айланадигандай ҳис қилди. Гўё у осмон атрофида аргимчоқда учадигандай эди. Ер унга мисоли бир ҳовуздай эди. Оғриқнинг зўридан у кўзини юмиб олди. Комилов унинг тобора оқараётган юзидан кўзини олиб, бошқа ярадорлар ёнига ўтди, уларга нима дейишини билмай бояги гапини такрорлади:

— Ҳозир қайиқ келади, ҳаммаларингизни медсанбатга олиб кетади.

— Медсанбатга манавиларни оборсин,—деди маҳорка тутатаётганлардан бири.

— Ҳамманг борасан,—деди Комилов.—Ремонтдан чиқариб қайтаришади.

— Қайтармайди-да,—деди Худойқулов исмли бояги жангчи.—Сапёр эдим. Биринчи ремонтдан кейин пиёдага тушиб қолдим. Шундан бери ремонтга боришга тобим йўқ.

— Балки бу гал яна сапёр бўлиб қоларсан.

— Нима бўлсам шу ерда бўлай, мени ҳеч қаёққа юборманг! Тепаликни олмасдан кетиш уят!

— Яхши!—деди Комилов.—Ёнимда қоласан. Яна ким мен билан қолади?

— Мен...

— Кимсан?—Комилов орқасига қайрилиб қаради.— Ваҳобов? Тузалганингни эшигтганим заҳоти сени медсанбатдан ўзим олиб келаман. Сенга оқ йўл. Тез шифоланиб кел!

Оёқ дупури эшитилди. Санинструктор Собиров югуриб кирди:

— Юришга қурби етадиган ярадорлар қайиққа чиқсин!—деди у.—Туролмайдиганларни ўзим олиб бораман.

Енгил ярадорлардан ҳеч ким қимиirlамади. Аксинча, улар ўтирган ўринларига маҳкам ӯрнашиб олишди.

Шу орада икки санитар оқ рўжа тўшалган замбил келтириб ўртага қўйди-да, оғир ярадорларни олиб чиқа бошлиди.

Комилов санинструкторни четга чақириб олиб:

— Кимни эвакуациясиз шу ерда тузатолсанг, қайиқ-қа зўрлаб ҳайдама,—деди.

Ярадорлар учун қайиқ эмас, бутун бошлиқ паром юборилган экан. Паромга оғир ярадорлардан бўлак ҳеч ким чиқмади. Собиров қўли, елкаси ёки оёғидан ўқ еган ярадорларнинг бирортасини тополмади.

Собиров паромга қараб қўл силтади:

— Кетавер. Бошқа ярадор йўқ.

— Ҳамдамов-чи?—деб сўради Комилов.—Қомротани жўнатмайсанми?

— Қимиirlатиб бўлмайди... Бунинг устига шу ҳақда гапирсам жеркиб ташлаяпти.

Комилов паромни тўхтатиб, Ҳамдамовнинг олдига югурдида, оқ уйнинг олдига боргач, орқасига қаради:

— Собиров!

— Лаббай!

— Замбилни олиб кел!

— Хўп бўлади!

Собиров замбил кўтарган икки санитарни бошлиб келди. Комилов комротанинг бошида. Ҳамдамов жим ётиби, Комиловни ҳам, санитарларни ҳам, замбил кўтариб киргандарни ҳам сезгани йўқ. Собиров «стугапти» деб ўйлаб, унинг томирини ушлади.

Аста-аста бўлса ҳам томирида қони юрмоқда эди.

Комилов буюрди:

— Кўтар!

Санитарлар Ҳамдамовни каравотидан олишаркан, бояги кучук қўярга жой топмай инграб, уйни гир

айланди-да, кейин Комиловга ялингандай унинг оёқла-
рига бошини суркади.

Ҳамдамов замбилда ўзига келди шекилли, қўзини
очиб, санитарлардан сўради:

— Қаёқقا?

Санитарлар учун Комилов жавоб қилди:

— Паром юборишибди. Сизни докторлар кутишяпти.

Ҳамдамовнинг кўзларидан норозилик учқуни учди.

— Камар келтирмоқчи эдинг-ку!—деди у Комиловга
дакки бергандай.

Комилов индамай, ерга қаради.

Ҳамдамов кучини тўплаб ҳолининг борича қичқирди:

— Комилов!

— Лаббай, Содиқ ака!

— Сени жонимдан азиз кўрардим. Биттаю битта
илтимосимни ерда қолдирма.

— Жоним билан.

Комилов ўз қўли билан Ҳамдамовни жойига ётқизиб
қўйди. Санитарлар замбилни кўтариб, индамай чиқиб
кетишиди.

Ҳамдамов беҳол оҳангда Комиловдан сўради:

— Неча кишинг қолди?

— Ҳали кўп.

— Аниқроғи?

— Ўзим билан ўн тўқиз!

— Бошқаларда-чи?

— Бошқаларда ҳам шунаقا.

— Ундей бўлса рота ҳали бақувват экан. Үқ-дори
беришдими?

— Беришди.

— Етарлимни?

— Запаси билан!

Ҳамдамов ҳаяжонланиб кетди.

— Ундай бўлса, тепаликка кечаси чиқамиз. Немисни уйқусида босамиз!

Шундан кейин Ҳамдамов уни кўргани келган бошқа комвзводларга ҳам ана шу гапларини такрорлайверди. Комвзводлардан бири унга: «Бу ишни ўзимиз қиласми, рота ихтиёрини комвзводлардан бирига топшириб қўя тулинг», деган эди, Ҳамдамовнинг қони қайнади-да, Мирзани чақиритириб, унга буюрди.

— Менинг автоматимни олгин-да, передовойга бор. Жангчиларга ўз оғзинг билан айтиб қўй. Менга жин ҳам ургани йўқ. Уларни штурмга ўзим олиб бораман.

IV

Ротада қизғин иш бормоқда эди,—«кукушқа»лардан бошқа ҳамма ер ковлаяпти, командирлар ҳам белкураклар билан қуролланиб олишган. Ернинг бети шўралаб тургани билан ости қаттиқ эди. Белкураклардан учқун чиқар, мисранглардан чақмоқ отиларди. Хуллас, бир қарич ҳам ер жангсиз таслим бўлаётгани йўқ. Гимнастёркалар тердан ивиб кетган. Мирза Комиловни қидириб юриб, унинг ёрдамчиси Бекка йўлиқди. Бек ечиниб олган. У Катта Фарғона каналининг «генерал кетмончиси» Дўстмат полвондай брустверга чаксалаб тупроқ отар, баҳтига у тушган ер юмшоқ экан, Мирзанинг ҳаваси келди.

— Ёрдамлашгани келдингми, Мирза?—деди Бек брустверда уни кўриб.

Мирза жуда муҳим буйруқ келтирган одамдай унинг ҳазилига жавоб қиласми, жиддий оҳангда сўради:

— Лейтенант Комилов қаерда?

Бек унинг бу важоҳатидан, Ҳамдамов тамом бўпти шекилли деб ўйлади-да, ҳавотирланиб Мирзанинг ўзига савол ташлади:

— Комротанинг ҳоли қалай? Тинчликми ёки жанозага айтгани келдингми?

Мирзанинг жаҳли чиқди шекилли, уни жеркигандай деди:

— Сендан командириингни сўраяпман. Қомилов акам қаерда?

— Мен ҳам сендан ўз командириингни сўраяпман. Содиқ ака борми ёки тамом бўлдими?

— Старший лейтенант Ҳамдамовнинг шахсан ўзи шу ерга келади. Борми, тамомми, ана ўшанда кўрасан.

Бек «гапни шундан бошласанг тилинг кесилармиди» деди-да, унга Қомиловни кўрсатиб қўйди:

— Ҳув, ана, мисранг ураётган одам лейтенант Қомилов бўлади.

Мирза Қомиловнинг олдига келиб, унга мурожаат қилди:

— Ўртоқ лейтенант, ижозат этинг...

— Гапиравер, Мирза, қандай хабар олиб келдинг? Комрота қалай?

— Комрота буюрди, взводни тунги штурмга шайлармишсиз. Ротани штурмга комротанинг шахсан ўзи бошлаб борармиш... Кетаверсам майлими?

— Майли эмас, тўхта, бу ёққа юр.

Қомилов Мирзани четроққа чақириб олиб, сўради:

— Ҳамдамовни олиб кетишмадими?

— Йўқ. Штабнинг хабари йўқ экан. «Тепаликни тунда эгаллаймиз!» деган маълумотни ўқиб, комбат курсанд бўлди. «Комротангга айт, унга ҳарбий омад тилайман!», деди.

— Оғир ярадорлигини айтмадингми?

— Айтсанг каллангни оламан, деди. Хўп деб қўювдим...

Қомилов бармоқларини тишлаб, пешанасини тириштириб тургач, ундан сўради:

— Бошқа взводларга ҳам бордингми?

— Ҳаммадан кейин сизга келдим.

Комилов яна бармоқ тишлади-да, бир оз жим турғач, буюрди:

— Ҳамдамовга айт, хотиржам бўлсин. Ҳамма нарса пишганида унга ўзим хабар қиласман.

Мирза уйиб қўйилган тупроқларга ботиб, окоплар четидан йўлга чиқиб олгач, чопиб кетди.

Комилов шунча вақтдан бери Ҳамдамов билан бирга жанг қиласа ҳам, кўп вақт ҳамтовоқ бўлса ҳам унинг бунчалик ўжарлигини билмаган эди. «Нега бунчалик ўжарлик? Ахир бир кунга керак эмас-ку, бу одам», деб ўйлади ва бундан ўзича хафа бўлди. Брустверга ташланган нам тупроққа ўтириди, папиросини бурқситиб, хаёлга чўмди. «Ҳамдамов нима учун қиляпти бу ўжарликни» деган мулоҳаза узоқ вақтгача унинг бошини қотирди. Бу саволга унинг ўзи жавоб қидирди. «Комбатдан қаттиқ гап эшилди шекилли? Айби бормиди? Айби йўқ эди. 115² тепалигидан кетма, деган буйруқ олганимиз йўқ эди-ку. Аръергарднинг вазифаси бажарилганидан кейингина у ердан жилган эдик. Дўнгликлардан кетишга ижозат сўрамагани учун гап тегдимикан? Балки шундайдир. Эзилиб кетяпти бечора. Яра азоби ҳам кўзига кўринмаяти... Бунинг устига мен ҳам яхши қилмадим. Гапим унга қаттиқ таъна бўлиб тегди. Бечора икки гапнинг бирида «Тепалик» дейди... тепаликни олсак, балки, у тузалиб кетар, балки шунга илҳақ бўлса, армонсиз жон берар. Ҳамдамовни азобдан қутқариш — сенинг бурчинг, Комилов!»

У папиросни улоқтириб юборди, чангини қоқиб, камарини қаттиқ боғлаб олди.

— Бек!

— Лаббай!

Бек қўлида белкураги билан тер босган майкада югуриб келди.

— Нега беформа келдинг?

— Ҳозир. Ҳозир...— деди-да, дарҳол кийиниб, гимнастёрка устидан камарини юртиб боғлади, пилоткасини босиб кийди ва автоматини елкасига осиб, лейтенант Комиловнинг олдидаги ҳозир бўлди.

— Буюринг, ўртоқ лейтенант.

— Кузатувчилардан бошқа ҳаммага дам бер. Кечки овқатдан кейин ўзинг ҳам ухлаб ол. Агар немис барвақт уйғотиб юбормаса, ярим кечада сени ўзим уйғотаман.

— Есть.

Комилов якка дараҳтнинг сербарг, пана шохидаги ўтирган, ҳам кузатувчи, ҳам «кукушкага»лик қилаётган автоматчи Эрдоновнинг ёнига чиқди. Бу ердан кўп жой кўринмаса ҳам, энг керакли жой — 115² тепалиги, унинг яқин атрофи кўриниб турарди. Дурбинда эса, окоп ичлари ҳам кўрина бошлади.

— Окопларимизни бузиб тузатишяпти, моҳовлар,— деди Комилов автоматчига.— Кўряпсанми, Эрдонов?

— Ўқим у ерга етмайди-да, бўлмаса-ку, ер тишлатиб қўядим,— деди Эрдонов афсусланиб.

Комилов дурбинда атрофга синчиклаб қарагач:

— Афсусланма, Эрдонов, бу мақсадингга ҳам эришсан, яхшилаб кўриб олсанг бас,— деб қўйди.

Қўёш осмон гумбазидан оғиб бориб, уфқ океанига чўкиб кетди. Атрофга, окопларга, ҳатто дараҳтларга қоронғилик чўккан бўлса ҳам Комилов дараҳт шохидан пастга тушмади. У кечки овқатини ҳам кузатув дараҳтининг каллагида еб олди-да, тепаликдаги немисларнинг барча ҳаракатини синчиклаб кузатиб ўтирди. Қечга яқин эса, у қазувни бас қилишни буюрди, сапёрларни жўнатиб, бу ерга пиёдаларни чақириб олди.

Атрофни қоронғилик қоплаши билан душманнинг би-

ринчи мушаги — ракетаси отилди. Унинг ёруғидан Комилов билан Эрдонов ўтирган дараҳт ҳам оппоқ оқариб кетди. Лекин уларни немис кўргани йўқ, аммо немис мушакчиси қаерда ўтиргани ва немис қўриқчилари қаерларда турганини Комилов кўриб олди. Немис мушакчиши ҳар ярим соатда, кейинча ҳар ўн беш минутда, бора-бора ҳар беш минутда шу ишини такрорлайверди.

Немиснинг мушак отиши тезлашган пайтда Комилов Эрдоновни бошлаб дараҳтдан тушди ва Бекни уйғотиб:

— Взводни жарликка тўпла!— деди.

Бек жангчиларни уйғотиб, запас ўқ-дорилар билан қуроллантириб, жарликка тўплагунча Комилов қўшни взводлар билан ҳамкорлик режасини келишиб олди. Штурм вақтида кимлар немисни қаердан қувлаши ва чекиниш зарур бўлиб қолса, кимлар ўзига кўмак беришини пухталаб олгач, Комилов жарликка келди.

— Ўртоқ лейтенант, тайёрмиз!— деди Бек қисқа ва паст овоз билан рапорт бериб.

Комилов қайси бўлинма нима қилишини айтиб бергач, сафда турган жангчилардан бир неча савол сўради:

— Қасаллар борми?

— Йўқ.

— Ярадорлар-чи?

— Йўқ.

— Ярадор Худойқулов, чиқ сафдан!

— Қанақа ярадорман, пашша чаққан холос. Қатордан ҳайдаманг мени, ўртоқ лейтенант. Утиниб сўрайман!

— Северцев!

— Мен!

— Бир қадам олдинга!

— Ижозат этинг...

— Ярадорлар бормайди, дедим-ку!

Бек уларнинг ёнини олди.

Комилов «Ҳа, майли» дегандай қўл силтади. Сафдан чиққанлар дарҳол сафга туриб олишди.

— Йўтали тутадиганлар армони борича йўталиб олсин!— деди Комилов соатига қараб.

Ҳеч ким индамади.

— Эрдонов! Йўталиб олмайсанми?

— Шунча зўрласам ҳам йўталим келмаяпти, ўртоқ лейтенант.

— Агар штурм бошлангунча салгина шарпа қиласди-ган бўлсанг, шу ерда қолавер!

— Мутлақо, ўртоқ лейтенант!

Комилов ҳамманинг яроғ-аслаҳасини, санитар пакетигача бирма-бир текшириб чиқди-да, керакли ҳамма нарса бутлигига ишонгач, взводни бошлаб кетди. Жарлик орқали тахминан юз эллик метрча йўл босилгач, кўкка шам учгандай бўлди-да, сал ўтмай, парлаган шам эгилиб, атрофни ёритиб, ерга тушди. Жангчилар жарликда шайнандай қотиб турдилар.

Жарликда яна бир оз юрганларидан кейин Комилов қўлларини икки томонга ёзиб, жанговар ҳолатга ўтиш ишорасини қилди. Бўлинмачилар ромба шаклига ўтди. Яна бир оздан кейин Комилов аста ётиб олди. Жангчилар ҳам ётишли. Шундан кейин Комилов олдиндан белгилаб қўйилган белгилар томон эмаклаб боришига ишора қилди.

Комилов боя дараҳт устида кузатувчилик қилган Эрдоновни имлаб, ўз ёнига чақириб олди ва унга «ёнимдан нари кетма» деди. Эрдонов унинг биқинида гоҳ олдин, гоҳ кейин бўлиб, эмаклаб борди. Комилов нима қилса, ўшани тақрорлади. Ниҳоят, Комилов автоматининг затвори шарақлади. Эрдонов ҳам автоматини тайёрлади. Унинг ёнида, орқасида ва олдида ҳам затворлар шарақлади.

Улар эмаклаб бориша давом этди¹лар. Майдо тош

ва тиканлардан Эрдоновнинг тиззаси билан тирсаги шилинди. Қейин у ёнбоши билан юра бошлади. Шу вақт аксига олиб, қуриб кетгур йўтал қистади. У йўлида тўхталиб, енги билан оғзини тўсди, бир илож қилиб, йўталини босгач, яна эмаклади, аммо Комиловдан анча орқада қолган эди. Шу вақт йўтал янга унинг бўғзига келиб тақалди. Йўталмаса иложи йўқдай, йўталиш эса, жиноят. Чунки, салгина шарпа эшилса ҳам ҳамма иш барбод бўлиши мумкин. У бир илож қилиб, Комиловга етиб олди, йўталиб юборишдан қўрқиб, «Тезроқ штурм бошлана қолса эди» деб орзу қиласарди.

Комилов орқасига қараб, Эрдоновни яна олға имлади. У қимираши ҳамон сал нарида нимадир тарсилади. Эрдонов беихтиёр ўша томонга қаради, тахминан юз метрча нарида яшикка ўтириб олган немис кўринди. У отган мушак баландга кўтарилиб, бир оздан кейин ҳамма ёқни ёритиб, жангчиларнинг орқасига тушди. Комиловчилар, нафас олмай, ер бағирлаб олдилар.

Шу чоқ Эрдонов беихтиёр йўталиб юборди. Айни вақтда унинг чап қулоғи остида затвор шарақлади-да, шиқ этиб тепки босилди. Комиловнинг автомати сумбасидан париллаб ўқлар учди ва Эрдоновнинг юзига алсанга иссифи тегди. Тасир-тусур бошланиб кетди. Эрдонов ўнгга, чапга граната отди. Унинг гранаталари сал нарида, окоплар ичидаги бўлса керак, бўғиқ овоз билан ёрилди, парчалари брустверга шитирлаб сачради. Окоплар ичидаги немисларнинг инграшлари эшишилди. Комилов Эрдоновга чаққон бурилиб қаради-да, унга ўнг қўлинни чўзиб, қичқирди:

— Гранатангни бер!

Эрдоновнинг белида яна тўртта «лимонка» бор эди, иккитасини лейтенантга узатди. Комилов унинг бирини қақиллаган пулемётга ташлади. Пулемёт жимигач, Эрдоновга буюрди:

— Югур!

Эрдонов овози ўчган пулемёт томонга ташланди. Пулемёт портлагани билан пулемётчи тирик экан, Эрдонов тасодифан унинг елкасига миниб қолди.

Комилов окопга кириб, пулемёт уяси томон бораркан, кутилмаган ҳодисага дуч келди: йўғон, бақувват немис кичкинагина Эрдоновни бошида кўтариб қочмоқда эди. Комилов унга автомат ўқталиши ҳамон немис шалоплаб йиқилди. Эрдонов қонли пичоғини ўқталганича Комиловнинг олдига тушиб, чопиб кетди.

— Ўнгроққа югур, Эрдонов!— деб қичқирди лейтенант.— Бояги миномёт уясиға яқинлаб қолдик. Ўнгроққа! Тезроқ!

Миномёт уясиға Бек ҳам етиб борди-да, Эрдонов билан бирга ячейкага ташланди. Шу он жангга улгурулмай саросимада қолган миномётчилар ички кийимларида, яланг оёқ, яланг бош ҳар томонга тирақайлаб қочишиди. Кимнингдир автомати ўқидан иккиси йиқилди, бирини Эрдонов тирнклай ушлаб олди.

— Асири Ҳамдамовга элтиб бер,— деди Комилов унга.— Қаршимиздаги кучлар ҳақида унга маълумот керак.

Эрдонов немиснинг елкасидан бир туртди-да, ички кўйлагининг бир енгини узиб олиб, унинг қўлларини орқасига боғлади. Сўнгра дўқиллатиб ҳайдаб кетди.

Жарликка тушиб олгач, Эрдонов асирини бўйнидан босиб энгашиб юришга буюрдӣ. Чунки отишма кучайиб, немислар жарликни ҳам ўққа тута бошладилар. Бир оздан кейин қўлини ечиб, асирини эмаклатиб олди, у кўнмаган эди, «хих!» деб қўндоқ билан бир урди-да, эшак ҳайдагандай ҳайдаб кетди.

Комилов асирини жўнатгаҳ, взводни чапга бурди. Чапда, тахминан йигирма метр нарироқда немисларнинг янги қазиган траншеяси бор эди. Комиловнинг бир

бўлинмаси янги траншеяларнинг бошига етиб борди. Траншея ҳали чуқур эмас, брустверлари ҳам пастаккина эди. Қимдир, жангчилардан бири, унинг ичига кириши ҳамон илон изига ўхшаш траншеяда қаторлашган бир неча қорани кўрди. Уларнинг тартибсиз дупурлаган оёқ товушларини ҳам эшилди.

— Немислар!— деб қичқирди у.

Комилов шу томонга қараб улгурмай, янги траншеяда жанг бошланиб кетди.

Шу он қимдир Комиловнинг олдидан пружинадай эгилиб, букилиб чопиб ўтди-да, янги траншеянинг бошидаги брустверда ётиб олиб, немис қаторига граната ташлади. Унинг гранатаси траншеяга кириб олган ўз жангчиларимизнинг бошидан ошиб ўтиб, сал нарида портлади. Бундан жангчиларимизнинг қўли анча баланд бўлди.

— Граната! Граната кимда бор?

— Менда!— деди унинг овозига етиб келган Бек ва Комиловнинг қўлига иккита «лимонка» тутқазиб қўйди. Комилов бирини траншеяга ташлади.

— Бек! Бошини кўтаргизма буларнинг!— деди-да, Комилов чўққиликда жанг қилаётган бўлинма томонга югорди. Чўққилик орқасида, олдидава атрофида, ҳатто пастликдаги жарда юзма-юз жанглар бормоқда эди. Бундан Комилов қўшни взводлар ҳам ёрдамга келиди, деб ўлади.

Комилов вазиятни англаб улгурмасдан, унинг икки қанотида мушакнинг шамсимон нури бирин-кетин баландга кўтарилид-да, бири тепаликнинг энг чўққисига, Комиловдан беш метрча нарига тушди, иккинчиси эса жарликка чўкди. Атрофни сутдек ёритиб юборди. Комилов унинг сунъий шуъласидан қўзи қамашса-да, бу икки мушак ойдинида ўзимизникларга ҳам, немисларга ҳам назар ташлаб олишга улгурди. Янги траншеяда,

эски окопларда, очиқликда, ҳатто жарликда, немислар ҳар хил алпозда ётишибди. Бири дўнг тушиб олган, бири чўқкалаб олган, кўплари атакага ташланмоқ учун шайланиб турибди. Бизникилар ҳам уларга қарши ҳозир-нозир. Бундан жанг майдонидаги вазият ойдин бўлди. Немислар Комиловнинг взводини ўраб олмоқчи ва шу тепаликда янчидан ташламоқчи. Буни пайқаган Ҳамдамов икки взводни Комиловга кўмакка юборган эди. Шу пайт, мушакларнинг сунъий ойдини сўниши ҳамон ҳар икки томондан отишма бошланди. Отишма яқинлашуви ва ғала-ғовур тобора кучайишидан маълум бўлишича, немислар контратака бошлаган эдилар. Комилов дарҳол ўз ихтиёридаги куч ва ўт очиш қудратини чамалаб кўрди. Чапдаги бўлинмада беш сумба ишлайпти. Бекнинг гранаталари ҳам бор. Ўнгдаги бўлинмада бир пулемёт, икки милтиқ ўт очяпти. Ўртадагиларда тўртта автомат қўл пулемётига жўр бўляпти. Демак, Комилов взводининг қовурғаси синганича йўқ. Шу вақт окопда таниш овоз янгради:

- Ўртоқ лейтенант! Ҳо, ўртоқ лейтенант. Қаерда-сиз?
- Мирза!— деди Комилов қувониб.— Сенмисан?
- Менман.
- Ҳамдамов қаерда?
- Жарда.
- Бу ёқса келишига нега йўл қўйдинг? Тезда жойига ётқиз! Марш!
- Ўртоқ лейтенант! Мени комбат юборди. Немисизни қуршаб оляптимиш. Орқага қайтсин деб буюрди.
- Қани ўзи?
- Комбат дарахтнинг устида. Жангни дурбинда кўриб турибди.

Немис ўтининг ҳалқаси тобора тораймоқда, бинобарин, комбатнинг буйруғи бежиз эмас эди.

— Бек! Битта-биттадан жарликка туш!— деб буюрди Қомилов.

Бекнинг ёнидаги отишмада битта-биттадан сумба ўти камайиб, энг охирида унинг автомати ҳам йўл-йўлақай отилиб, жарликда ғойиб бўлди. Уларнинг чекининини дўнгликдаги қўл пулемёти пана қилиб турди. Қомилов шериклари билан икки ўт орасида силжишга мажбур эди. У гоҳ ўқ узиб, гоҳ эмаклаб, гоҳ югуриб юрар, баъзан ёнида келаётган шерикларини санаб қўярди. Қомиловдан сал нарида портлов эшилди. Шу он унинг шерикларидан яна бири камайди...

— Ўликни орқалаб ол!— деб буюрди Қомилов ёнидаги жангчига.

Иккинчи портловни Қомилов эшилмади. Унинг иккала қулоги ҳам битиб қолган эди. Учинчи, тўртинчи портловларни ҳам Қомилов мутлақо эшилгани йўқ, аммо ўзининг орқа-олдидаги беҳисоб чақмоқлардан у ким қаерда эканини англаб борарди.

Қомилов жарликка тушиб, хавфсиз жойга етиб олгач, Бекни чақириб, взводни саф қилишга буюрди.

Қомилов саф тортган взвод олдига келди. Сафда тўққиз йигит турарди. Уларниг ҳам баъзилари у ер, бу ерини бинтлаб олган.

— Ҳаммаси шуми?— деб сўради Қомилов.

— Яна биттаси бор. Эрдонов немисни қўриқлаб турибди.

Қомилов унинг гапини тушунмади. Одамларни бошқатдан қараб, ичидা санаб чиққач, маълумот кутиб, кўзи жавдираб турган Мирзадан сўради:

— Ҳамдамов қаерда?

— Олиб кетишиди,— деди Мирза.

Қомилов унинг нима деганини эшитмаса ҳам, буй-

руғи бажарилганини тушунди-да, ўз ўрнига Бекни қолдириб, комбат ҳузурига йўл олди.

V

Учувчиларимиз душманнинг орқа томонидан ҳар куни ҳар хил хабарлар топиб келардилар. Хабарлар турли-туман бўлса ҳам, мазмуни битта эди. Днепр билан Дон ўртасида, Харьков билан Воронеж оралиғида, чўлларда эрталабдан кечгача чанг-тўзон кўтарилаётгани, катта-кичик йўлларда мотсцикллар, броневиклар, енгил машиналар тинмай югуриб юргани ҳақида штабларга маълумот келиб турарди. Авиафото суратларидан ҳам кўп нарса маълум эди. Доннинг нариги юзидағи ён бағирликларда, жарликлар, буғдойпояларда танклар яшириниб ётгани ҳақидағи авиафото суратлар штабларда қўлдан-қўлга ўтиб юрарди. Темир йўлларда эшелон-эшелон резерв аскар ташилаётгани, яроғ-аслача, ўқ-дори келтирилаётгани ва цистерналарда ёнилғи ғамланаётгани ҳақидағи разведка маълумотлари айғоқчиларимизнинг шу ҳақда берган хабарлари билан монанд эди. Бундан кўриниб турибдики, душман Дон дарёсининг ўнг қирғоғида катта зарбдор куч тайёрламоқда ва бу куч зарбини Сталинградга урмоқчи.

Айни бир вақтда бизнинг қўмондонлик ҳам бунга қарши шошилинч чора кўра бошлади. Шундай чора-ларнинг бири Доннинг ғарбий қирғоғида плацдармга эга бўлиш ва уни маҳкам ушлаб туришдан иборат эди. Ҳамдамовнинг ротаси қиласаётган жанговар иш ана шу муҳим стратегик планнинг дебочаси ҳисобланарди.

Комилов тепаликка тунги ҳужум бошлаган вақтда унинг ўқчи полки Доннинг чап қирғоғидаги окоплари ни бошқа полкка топшириб бўлган ва ўнг қирғоққа қайтиб ўтишга ҳозирланадиган эди. Тепаликда жанг бош-

ланиб кетгач, бу иш тезлашди. Ўнг қирғоқقا биринчи бўлиб Баталовнинг батальони ўтди ва унинг бир ротаси Ҳамдамов ротаси қазиб қўйган окопларга жойлашиди. Батальоннинг ўзи сувдан ўта солиб, учинчи рота ўқичиларини, миномётчиларини, пулемётчиларини тепаликдаги жангга бошлади.

Баталов жарликда инқиллаб-синқиллаб кимнидир орқалаб келаётган жангчига йўлиқди.

— Кимсан?

Жангчи чарчаган эканми, елкасидаги «юки»ни ерга қўйиб офицернинг юзига боқди ва Баталовни таниб қолиб, дарҳол рапорт берди.

— Уртоқ комбат! Жангчи Эрдонов...

— Бу нима?

— Немис. Рота командирига олиб кетяпман.

Баталов дўнгалак қилиб боғлаб қўйилган нарсага қаради-да, ҳайрон бўлди,

— Улик-ку, бу.

— Тирик, ўртоқ командир,— деди-да, Эрдонов унинг калласига қопланган нарсаларни ечиб олди.— Жангчилик қилувди, ўз иштонини бошига кийдириб қўйдим. Йўлда шерикларининг ўқидан яраланиб ётиб қолувди, кўтариб олдим.

— Ҳамдамов қаерда?

— Оқ уйда эди.

— Оқ уйда эмас, мана бу ёқда,— деди комбатнинг овозини эшишиб, у томон чопиб келаётган Мирза.

Баталов жангчи Эрдоновга «немисни эҳтиёт қил» деб буюрди-да, роталарни панага жойлаб, ўзи Ҳамдамов томонга кетди.

Ҳамдамов худди Қомилов взводи жангга борадиган дақиқаларда уйқудан уйғонган эди, санинструктор Собировни чақириб: «Соатингни кўрсат», деди. Собиров қўл соатини рўпара қиларкан, Ҳамдамовга соат миллари-

нинг чиқиллаши пулемёт, автомат отишмаларининг овоздига ўхшаб кетди.

— Тезроқ билгин-чи, ташқарида нима бўляпти?— деб буюрди Ҳамдамов.

Собиров унга жавоб қилди:

— Лейтенант Комилов аллақачон иш бошлаб юборган, ўртоқ старший лейтенант.

Ҳамдамов Собировдан оқ рўжа талаб қилди.

Собиров ювиб, дазмоллаб қўйилган оқ рўжа келтириб берди. Ҳамдамов ҳарбий либосини кийиб, рўжада белини маҳкам боғлади-да, Собировга буюрди:

— Бошли!

Санинструктор ҳайрон бўлиб қолди.

Собировнинг иккисиганлигини кўрган Ҳамдамов ўрнидан турди. Унинг икки кўзи гўё қонга тўлгандай эди. У Собировга қўл чўзди:

— Автомат.

Собиров рота командирининг каравот тагидаги автоматини олиб, қўлига ноилож тутқизди.

Ҳамдамов автоматини елкасига олди.

— Олдимга туш!

Собировнинг назарида шу он Ҳамдамовнинг ҳеч бир гапини қайтариб бўлмас эди. Бундан ташқари, Комиловнинг насиҳати эсига тушдида, ярадор командирнинг қўлтиғига кириб олди.

Улар кўчага зўрға чиққанларида йўлакда Мирза кўриниб қолди.

— Нима қилганинг бу, Собиров!— деди у санинструкторни койиб,— Паром йўқ. Қайиқ ҳам йўқ-ку!

— Паромга эмас, тепаликка кетяпмиз,— деди Собиров норози оҳангда.— Қўлтиққа кирсанг-чи!

Мирза дарҳол Ҳамдамовнинг иккичи қанотига кирди. Учовлон осонроқ, тезроқ юра бошладилар. Бир оздан кейин Ҳамдамов:

— Андак тўхтайлик,— деб илтимос қилди.

Собиров уни ҳолдан тойди, деб ўйлади. Мирза эса бинти бўшади шекилли, деб тахмин қилди. Лекин ҳар иккаласи ҳам янглишган эди. Ҳамдамов отишмаларнинг овози ва суръатига, миқдорига қараб, тахминан жанг қаерда бораётганини мўлжал қилди-да:

— Ана, кўпроқ бизникилар отяптилар... Ана, гранаталарни бизникилар портлатишапти! Яша, Комилов!— деди у қувнаб. Кейин Мирзага, сўнгра Собировга севиниб деди:— Нега қараб турибмиз? Юринглар!

Собиров биларди, Ҳамдамов минг севингани билан, ҳар қанча куч тўплагани билан узоққа боролмасди. Тез орада унинг ўйлагани юз берди-қўйди. Улар сал нари юриб, жарликка киришлари ҳамон Ҳамдамов ўққа чап бераман деб эгилдию ерга муккасидан тушди ва қайта ўрнидан туролмади. Уни жарликнинг пана жойига ётқизиб қўйишиди. Унинг назарида осмон айланмоқда, юлдузлар тўкилиб тушмоқда, ой оқиб, буултлар дўмбалоқ ошмоқда эди.

Бир оздан кейин у ўзига келди. Унда жангни кўриш иштиёқи яна уйғонди. Лекин иложи йўқ эди.

Ҳамдамов ётган жойида жангни кўролмаса ҳам унинг боришини отишмалар овози, суръатидан кузатиб ётди. Баталов келибоқ, унинг кўкрагидагига кўзи тушди, қоронгида унинг ранги-рўйини кўрмаса-да, аҳволи оғирлигига амин бўлди ва шу заҳоти ўз дастёрига батальон фельдшерини чақириб келишни буюрди. Айни бир вақтда у, жангдаги командирларга алоқачилари орқали тегишли топшириқ, йўл-йўриқларни бериб бўлгач, Ҳамдамовнинг ёнига ўтирди.

— Оғрияптими?

— Сал-пал,— деди Ҳамдамов лабинни пичирлатиб.

— Узр сўрайман, Ҳамдамов,— деб гап бошлади

комбат.— Ўз вақтида сенга ёрдам беролмадим. Ҳозир медиклар келади. Медсанбатда даволаниб қайтасан.

— Тे...палик...ни ол...л...айлик...— Ҳамдамовнинг тили қалтиради.

— Тепаликни сенсиз ҳам оламиз. Сени медсанбат кутяпти.

Ҳамдамов йўқ, дегандай бош чайқади. Унинг гапиришга ҳоли қолмаган эди. Баталов эса, қоронғида унинг бош чайқаганини кўрмади ва медсанротадан келган фельдшерга буюрди:

— Тезроқ!

Мирза ярадорнинг бошида эди. Комбатнинг гапи тугар-тугамас ва фельдшер унинг ёнига келиб ултурмай, Ҳамдамовнинг оғзи очилиб қолди. Буни кўриб қолган Мирза:

— Ҳамдамов ака! Нима бўлди?!— деб қичқирди-да, флягасини чиқариб, оғзига сув томизди, чўнтағидан оппоқ дастрўмолини олиб, энгагини танғиб қўйди.

— Нима қиляпсан?— деди комбат Мирзага.— Бу нима қилганинг?

— Одатимиз шунақа...— деди йиғламсираб Мирза.— Энгагини танғидим.

Комбат фуражкасини қўлига олди, бошини қуйи солди...

Фельдшер нима қиламиз, дегандай Баталовга қарди. Баталов:

— Нега қараб турибсизлар, медсанбатга олиб бор, ювиб, тараб, иззат-икром билан кўмишсин.

— Ўртоқ капитан, ижозат этинг,— деди Мирза.

— Сен ҳам бормоқчимисан?

— Старший лейтенантнинг васияти шунақа эди... «Мени 115² чўққисига кўминглар!», деб васият қилган. Лейтенант Комилов ҳам бундан хабардор...

Баталов жарликда окоп қазиётган резерв ротанинг

бир взводини чақириб олди ва унинг командирига жарликка келиб қолган немисларни қувиб чиқаришни буюрди. Ёнбағирликда ҳам худди шундай жанглар бошланниб кетди. Баталов у ерга яна бир взвод юборди ва жангларни кузатиш учун ўзи якка тут дараҳтининг устига чиқиб олди. Пастда алоқачилар окоп қазишиди.

Тонг ёришмоқда. Баталов жанг майдонига разм ташлаб, кучлар нисбатини таҳминлади, кучлар тарозисининг шайини ҳам, посангиси ҳам немис томонга босмоқда эди. Бунинг устига немислар унинг батальонини қуршаб олиб, тепаликда янчиб ташламоқчи эди.

Жанг билан чекинган тартибли бўлинмалар Староклетск атрофидаги окопларга кирдилар, окопсиз жойларда эса, шошилинч ер ковлашга киришдилар. Аммо немислар хуторга ҳамла қилмай, тепаликдаги эски мэрраларга қайтиб кетдилар.

Жанг босилгач, Комилов кузатув дарахти остига келди-да, унинг каллагида дурбинга қараб турган Баталовга рапорт қилди:

— Ўртоқ капитан! Лейтенант Комилов чақириққа биноан ҳузурингизга келди!

Баталов дарахтдан сакраб тушди-да, унинг қўлини маҳкам қисди.

— Жуда яхши жанг қилдинг, Комилов!— деди комбат.— Чекасанми?

— Раҳмат. Чекким йўқ.

— Билиб турибман,— деди Баталов «беломор»ни тутатиб.— Сенга папирос эмас, юз грамм керак. Сен билан мен энг яхши командирдан айрилдик...

Комилов бошини қўйи солиб турарди. Унинг юзида алам, кўзида мотам тўла эди.

— Сен, лейтенант Комилов, старший лейтенант Ҳамдамовнинг ротасини қабул қил. Унинг йўқлигини билдирмаслигингга ишонаман!

Комиловнинг ротага бориб, биринчи қилган иши шу бўлдики, у фельдшерлар қўлидан Ҳамдамовнинг пистолети билан автоматини олиб, пистолетини ўнг биқинига, автоматини елкасига осди. Қаскасини сақлашни старшинага буюрди.

Санинструктор Собиров буни ўзича баҳолаб, «лейтенант Комилов старший лейтенант Ҳамдамов учун ҳам жанг қиммоқчи» деди. Дафн маросимида Комиловнинг ўзи ҳам шу хил гап айтди.

Ҳамдамовни Старо-клетскнинг ғарбий чеккасидаги оқ уй олдига — уч туп олма ўртасига дафн қилишди. Дафн вақтида ҳарбий урф-одат талаб этган ҳамма жанговар расм-руслар тўла амалга оширилди. Тол ёғочдан ясалган қозиқча қизил юлдузчани михлаб, уни қабр бошига қўйишди. Унинг остидаги бир шапалоқ қизил тахтачага Комиловнинг ўзи қора бўёқ билан:

«Старший лейтенант Содиқ ҲАМДАМОВ.
Туғилган йили 1916 йил 25 июль,
ҳалск бўлган вақти 1942 йил 25 июль»,—
деб ёзиб қўйди.

Дафндан кейин сийраклашиб қолган рота яна саф тортди. Ҳамдамов жасадини 115² тепалиги чўққисига кўчиришни — жон бериш олдидан қилган васиятини — фашистлардан қаттиқ ўч олгандан кейин бажаришга аҳд қилишди.

Дафн маросимидан кейин ўртоқлар мозоридан ҳамма кетса ҳам бир махлук кетмади. Бу оқ уйнинг хонадонини ташлаб кетган қоп-қора кучук эди. Бу кучук Ҳамдамовнинг ярадорлигига ёнида ётди, вафоти вақтида бир нималар деб ингради, мана энди қабрдан кетмай, ич-ичидан инграб ётибди. Буни кўриб Комилов «мен

билан юр, эй вафодор дўст» деди-да, уни бошлаб кетди. Шундан кейин унга ротада «вафодор» деб ном қўйишиди. Вафодор ҳар кун тонгда ва тунда йўқ бўлиб қолларди ва йўқолганида уни ҳамиша Ҳамдамовнинг қабри олдидан топардилар.

Кучукнинг бу қилиқлари жангчилар орасида Ҳамдамов хотирасини доим янгилаб турарди. Ҳар гал Ҳамдамовни хотирлагандага жангчилар унинг энг яхши ҳислатларидан гапирадилар. Бир куни, Ҳамдамовнинг вафотидан кейинги биринчи пайшанба куни кечқурун Мирза қамишга уч ўраб, уни ошпазнинг идишидаги мойга булади-да, қабристонга чироқ ёқиб қўйди.

У қабристондан сал нари боргач, ўртоқлар мозоридан ёқимли овоз эшитилди. Кимдир мозор бошида қуръсон ўқимоқда эди. Ким бўлди бу? Мирза изига қайтди. Қабристондан Эрдонов чиқиб келар эди.

— Сенмидинг?

— Мен,— деди Эрдонов,— сен катталар орасида юрасан, комбатимиз бизнинг Комиловга қайси кўзи билан қарайапти, шуни билиб олдингми?

— Бу нима деганинг?

— Ҳамдамовга ўнг кўзи билан қаради-да. Негаки, уни доим энг муҳим жойга юборарди.

— Ишонганидан қиласкан. Ҳамдамовнинг энгагини танғиётганимда комбатнинг кўзларидан ёш оқди. Командирнинг йиғлаганини биринчи кўришим.

— Улемидан бир кун олдин астар-аврасини чиқариб сўккан экан...

— Буни ҳам эшитганман. Ҳамдамов жаҳул устига келиб қолган экан-да. Командарм комдивни, комдив подполковникни ғазаблаган экан. Подполковник комбатга заҳар сочибди. Ургани пўстинлик яхши, деб Баталов Ҳамдамовни бўралапти. Бунақанги ишда шунақаси ҳам бўлиб туради-да.

— Мана шу бўралаш Ҳамдамовнинг суюк-суюгидан ўтиб кетган эканда... Менимча, Комилов ўзини савалатиб қўймайди!

Комилов ҳам шу ҳақда ўйларди. Унинг хаёли Ҳамдамов каби донолик билан иш кўриб, одамохунлик билан раҳбарлик қилиш, жанговар ҳолатда ҳам хушчақчақ юриш ва қандай қилиб унинг хатосини такрорламаслик ўйлари билан банд эди. Ҳамдамовнинг барча яхши томонларини беш қўлдек билса ҳам, Комилов унинг хатоси нимада эканини унча билмасди, аммо билишга уринарди. Ҳамдамовнинг хатоси тепаликдан кетиб қолишда бўлса керак, деб ўйларди у аввалги фикрини такрорлаб. «Бошида у ердан кетмасак шунча қоп тўкилмасди. Лекин бу унинг айби эмас, балки аввалдан кўзда тутилмаган ва кейинча туғилган заруратдан келиб чиққан кўргилик эди. Ундан бўлса Ҳамдамовнинг хатоси нимада? Ҳамдамов сел оқимиға қарши сузди — бутун бир дивизия ҳужум қилиб келаётган бир пайтда, ўзини ўтга ташлади. Йўқ. Унинг ўзи асл жангчи эди. Унинг ўрнида сен ҳам, Комилов, шундай қиласдинг ва шундай қилишинг керак эди. Орқада Сталинград турипти. Нарёғи туғилиб ўсган жойинг. Бу ерлар муқаддас ерлар!..»

Комилов ўйланиб, ўйланиб яна Ҳамдамовнинг гапини, унга берган ваъдасини эслади. Ӯша ваъданни бажариш билан у энди марҳум дўсти руҳини доимо хотиржам қилиши керак. Тирикларнинг марҳумлар олдидағи бурчи шу.

Комилов марш ротасидан келган янги жангчиларни пишитиб олгунча роса тер тўқди. Жанггача қанча кўп тер тўкилса, жангда шунча кам қоп тўкилишини яхши биларди. Буни жангларда синаб кўрган. Шунинг учун у марш ротасидан келган янги жангчиларнинг гимнас-

тёркаси ивиб кетгунча ер қазитди ва машқ қилдириб, кунига ҳолдан тойгуңча тепаликларга югуртирди.

Ана шу марш пайтларининг бирида уни комбат ўз ҳузурига чақириб:

— Машқларни бас қил энди, вазият оғирлашяпти,— деди.— Катта қўшинлар ҳужумини қайтаришга шайлан!

VII

Учувчиларнинг хабарларида ёнбагирликларда, буғдойзорларда пана-панада беркиниб ётган танкларнинг жойларидан қўзғалгани, сўқмоқлар пиёдалар колонналаридан тўлиб-тошгани айтиларди. Доннинг ўнг томонидаги бепоён ерлар осмони чанг-тўзон билан қопланган, булутларнинг ости ва усти ҳам душман самолётлари билан тўла. Штабларимизнинг фикрича, тахминан ўттиздан ортиқ дивизия Донга бостириб келмоқда эди.

Комилов ҳамма жангчиларини окопларга жойлаб, борлиқ ўт сочиш томонларини аниқлаб, бериладиган сигналлар, қилинадиган ҳаракатларни олдиндан келишиб қўйган. Ҳамма кутмоқда.

Баталовнинг қўлидаги маълумотга қараганда ва тепаликдан олинган асирнинг айтишича, немис артиллериаси эрталаб соат олтида тўп ҳужуми бошлиши керак. Тўп ўқлари тахминан қаерларга тушиб ёрилиши, парчалари қаёққа ва қаерларга сачрашини ҳам Комилов тахминлаб қўйган. Лекин у ўзининг бу тахминини ҳали барча жангчига айтиб улгурмаган эди. Рота жангчиларини жанговар тайёргарлиги, тажрибаси ва лаёқатига қараб, уч гуруҳга ажратди. Биринчи гуруҳда тажрибали жангчилар турарди. Улар кўпдан бери жанг қилиб пишган кишилар. Уларни Комилов «рота гвардияси» деб атари. Улар ташланган бомбанинг овозидан ёки самолётдан тушаётган бомбанинг қоп-қора томчисидан қаерга

тушишини, қайси чуқурликка беркиниб олишни, снаряд бир марта тушган чуқурликка яна қайтиб тушмаслигини, снаряд парчаси олдинга, икки ёнига отилиши ва орқа томони бехатарроқ эканини, миномёт ҳужуми вақтида душман миномётлари отган миналар портлай бошлиганида бир жойда ётмай доим олдинга эмаклаш кераклигини, танклар атакаси вақтида қандай ҳаракат қилишни яхши ўрганиб олган эдилар. Шундай қилиб, Комилов ҳужумда ҳам, атакада ҳам, мудофаа жангига ҳам уларга таяна оларди.

Комиловнинг иккинчи гуруҳ жангчилари эса, кўп жанг кўрган, ҳатто госпиталлардан чиқсан кишилар бўлсалар ҳам, ҳали унча синашта эмас эдилар. Аммо улар яхши командирнинг қўл остида бўлсалар ва уларга ҳушёрлик, билимдонлик билан раҳбарлик қилинса, кўп ишлар кўрсатишлари мумкин эди. Комилов шу жиҳатдан уларга ҳам таяна оларди.

Комилов учинчи гуруҳга кирадиган ўз жангчиларидан кўп хавотирда эди. Улар совет сувидга суборилган, Ватан учун жонини аямайдиган асл ватанпарвар йигитчалар бўлсалар ҳам, ҳали жанг кўрмаган эдилар. Комиловга улар Волганинг наридан марш ротаси билан келган эдилар. Марҳум Ҳамдамовнинг тили билан айтганда, уларнинг «бурни пороҳ исини ҳидламаган», кўзларига каска ҳам танк бўлиб кўриниши турган гап эди.

Мудофаада турган ҳар қандай командир бу омилларнинг ҳаммасини диққат билан эътиборга олиб, ҳар мисқолигача тарозида тортиб иш кўрмай иложи йўқ эди. Комилов ҳам шундай қилди. Энг нозик жойларга аралаш кучларни тайинлади. Кўйинг-чи, взвод, бўлинмалар ичидаги ҳам кучларни ана шу асосда расамадлади.

Ҳамма ишлар битгач, Комилов кузатув пунктига келиб, соатига қаради. Ҳали олти бўлгани йўқ эди. Бата-

ловнинг олдига борди. Комбатнинг команда пункти иккни ротанинг ўртасида, бўлажак жанг майдони аниқ кўриниб турадиган ёнбағирликдаги тўп ўтмас қалин ертўлада эди. Баталов телефонда полк командири билан гаплашиб бўлгач, Комиловга юзланди:

— Хўш?

— Соатингиз билан соатимни ростлагани келдим. Соатимга Диепрдан кечиб ўтаётганимда сув кириб кетган эди, ўшандан бери андак шошқалоқроқ бўлиб қолди.

— Жангга шошилаётгандир. Яхши, тўғрилаб оли меники бешдан ўн минут ўтибди...

Комилов соатини созлаб олгач, ротага қайтди. Уни траншеяда Мирза учратди-да, энтикиб деди:

— Ўртоқ лейтенант... Ўртоқ лейтенант... Тезроқ юринг.

— Хўш? Нима гап?

— Немис...

— Қани?..

— Бек кузатиб турибди.

Комилов траншея йўли билан ротанинг ўнг қўлидаги кузатув блиндажига келди. Блиндажнинг туйнуигига ўрнатилган дурбин — стереотрубада қоп-қора нуқталар қумурсқадай ғимирламоқда эди.

— Инфантерия тўпланяпти, шекилли? — деди Бек комротадан тасдиқлатиб олмоқчи бўлгандай.

— Ҳужум жойига йиғилишяпти,— деди Комилов Бекнинг тахминини қувватлаб. — Демак асир немиснинг гаплари рост экан.

— Немиснинг 79-ўқчи дивизияси Донни шу ердан босиб ўтмоқчи. Ўтказмаймиз! Нима дейсан, Бек!

— Ўтказмаймиз!

Комилов дурбинда қандайдир ўлжа топгандай шошиб деди:

— Буни қара, Бек!

Бек дурбинда дўнгликларнинг нарироғида гужлана-
ётган немислар гуруҳини кўрди.

Улар окопга чиқишиди. Ўт очиш жойларини, пулемёт уяларини олдиндан немис тўпига ем қилиб бермаслик учун Бек қўл пулемёти РПДни траншеяниг қирғоғига — брустверга ўрнатди-да, бир қўлида унинг туника дискасини ростлади, бир қўлида пилоткасини бостириб олгач, Комиловга боқди.

— Босайми?

— Бос!

Пулемётнинг тра-та-тасидан теварак-атрофдаги тинчлик бузилди. Сумбадан отилиб чиққан қизғиши олов брустверда порлади-да, сассиқ гилзалар тиқ-тиқлаб траншеяга тўкилди. Узоқда акс-садо янграб ўчгани ҳам йўқ эдики, кимдир Бекнинг оёғи остида эмаклаб, унинг чанг боссан этигини ялай бошлади.

— Эй, вафодор, жўнаб қол бу ердан, марш! — деди Комилов унга ўшқириб.

Дили озор топган кучук ноиложликдан оёғи тортиб-тортмай орқасига қайтди.

— Қалай? — деб сўради Комилов Бекдан отишнинг натижасини билмоқчи бўлиб.

— Фафлатда экан, чамамда ҳаммаси бўлмаса ҳам тенг ярми қирилди.

— Р... П... Д...ни жойига қўй! — деб буюрди Комилов.

Бек пулемётни ўз эгасига топшириб улгурмай, қарсиллаб тўп отилди-да, Бек ўқ узган жойдан сал нарида снаряд портлади.

Гумбура-гумбур бошланиб, ердан момақалдироқ кўтарилди, бундан гўё осмон тарс ёрилиб, ер ловиллаб ёнди.

— Қулоқларингни беркитиб ол! — деди Комилов кимгадир.

Тўп ўқлари гоҳ траншеяларнинг олдида ёрилар,

унинг парчалари визиллаб атрофга сочилар, гоҳ бруст-верларнинг тупроғини тўзғитиб, окоплар устида бўғиқ гумбурлар, гоҳ ёрилмай қоларди. Комилов қулай ва пана жойга ётиб олиб, ҳушёрлик билан кузатиб турарди. Вафодор ҳам унинг биқинида жимиб ётар, баъзан яқинда тўп ўқлари ёрилганида сапчиб кетарди. Комилов уни зўрлаб ётқизарди, аммо Вафодор баъзан Комиловнинг бошидан оёғигача исқаб чиқарди, ҳеч қаерида шикаст йўқлигини билгач, қулоғини динг қилиб, яна жойига ётарди.

Снарядлар Комиловнинг тепасидан ғувиллаб ўта бошлади. Тўпларнинг отилгани ҳам, снарядларнинг учиши ҳам барада эштилиб турибди. Демак, душман тўплари иккинчи қаторларни молаламоққа кўчган. Энди навбат пиёдага...

Взводлар анча сийраклашиб қолган эди. Комилов вазиятни ҳисобга олиб, буюрди:

— Ҳалок бўлганларни орқага кўминглар, қурол ушлашга қодир ярадорлар ҳам окопга!

Тутун кўкка булат бўлиб кўтаришар, гоҳ пастга тушар, гоҳ шарқ томонга, гоҳ жануб томонга оқарди. Душман тўплари иккинчи эшелонга ҳужум қилаётган чоқда, Комилов айтгандай, немис пиёдаси қўзғалди. Бекнинг назарида боя қовун полиз хамакларидай, гўё қумлоқ тарвузларидай ҳамма ёқда дўппайиб ётган қора нуқталар ҳозир оёққа туриб, донга юргурган оч товуқлардай бўйинларини чўзиб, чопиб келишарди.

Товуққа ўхшаган нуқталар одам шаклига киришди. Гала-гала солдатлар жанговар қаторларда югуриб келмоқда.

Кўм-кўк мушак терак бўйи кўтарилиб, ерга эгилиб тушди. Чопиб келаётганларнинг ҳаммаси қўлидаги қуролларидан ўқ уза бошлади.

Комиловнинг жангчилари жим. Уларнинг гўё қўш

солиб, ҳайдаб ташлангандай кўринаётган окоплари душман назарида кимсасиз, бўйм-бўшдай эди. Бундан руҳланган душман тобора қаддини баланд кўтариб оёғини илдам босиб, ўқини тартибсиз отарди. Кўк френч, қора каскали инфантерия яқинлашмоқда.

Икки юз... Бир юз эллик метр...

— Залп! — деди Комилов.

Брустверларни чангитиб, пулемётлар сайдари, автоматлар отила бошлади; бешотар, ўнбешотар — борингки, яқин масофа жангига тайёрлаб қўйилган ҳамма тезотар қурол баравар залп берди. Немис инфантериясининг жанговар занжири бирин-кетин узилиб кетгандай бўлди. Баъзилар қоринларини ушлаганча орқа томонга ағанади, баъзилари чапга ёки ўнгга шох ташлагандай буралиб йиқилди, кўпларининг қўлидан қуроли учди. Аммо ерга ётиб олиб, ўқ узаётганлар ҳам кўп эди.

— Миномёт! — деди Комилов.

Рота миномётчилари мўлжалга ура бошладилар. Миномёт ёнгоқлари тўкилаётган жойдан чиқиш учун немислар олға эмакладилар.

Кимдир граната улоқтириди. Тошдай гувиллаб борган граната йигирма-үттиз метр нарида ёрилди-да, қора булат билан бирга кул ранг кесак аралаш майин тупроқни кўтариб ташлади.

— Контратакага рухсат беринг? — деди Бек.

Комилов унга хўмрайиб қараб қўйди.

Комилов ўнг қанотга, дўнгликлардан нариги томонларга разм ташлади. Ўнг қанотда канонада бормоқда. Икки томон ҳам отмоқда, портлашлардан кўтарилган қарама-қарши тутунлар булути ҳам, гўё тепада беллашиб, жанг қилмоқда эди.

Дивизиянинг чап қанотида аҳвол бутунлай ўзгача эди. Яқиндагина мудофаа жангига бораётган жойда немис танклари юргандай бўлди. Комилов ўз кўзига ишонма-

гандай енги билан кўзини ишқалади ва блиндаж устига чиқиб, синчиклаб қаради. Тахминан икки-уч чақирим нарида немис танклари ўрмалаб, уларга қарши бизнинг тўплар тўхтосиз отар эдилар.

Комилов югуриб пастга тушди ва Баталовнинг штабига телефон қоқди. Комбат банд экан. Уни комполк билан гаплашяпти, дейишди. Трубкада бош адъютант ҳозир бўлди. Унинг айтишича, Паулюснинг йигирма икки пиёда дивизияси бирданига ҳужумга ўтганмиш. Бутун бир танк армияси ҳамла қилаётганмиш. Энг кейинги маълумотга кўра, айрим жойларда бизнилар чекинаётганмиш. Бош адъютантнинг гапи тугамай, трубкада Баталовнинг ўзи пайдо бўлди:

— Комилов! Тепангга қара, крестли булутлар келяпти. Унинг паноҳида танклар... Шайланиб тур!

VIII

Комилов кийимларини тузатиб, пилоткасини бостириб кийди, камарини янада қаттиқ тортиб боғлади-да, траншеяга чиқди. Унга қўлидаги котелоги билан Мирза дуч келиб қолди. Котелокдан иссиқ буғ чиқмоқда. Қайноқ макароннинг хушбўй ҳиди гупиллаб урди.

Комилов унинг қўлидаги котелокни олди ва унга дурбинни тутқазиб қўйди.

Комилов шундоққина брустверга ўтириб, котелокни тиззасига қўйиб овқатлана бошлади. Вафодор думини ликиллатиб, унинг қаршисида чўққайиб ўтиради.

— Сенга нонушта беришмадими, Вафодор? — деди Комилов кучукка.

Кучук «йўқ» дегандай бошини чайқади, ингиллаб ниҳманидир уқтирди. Комилов қўлидаги нонини икки бўлиб, ярмини унга ташлади. Вафодор хурсанд бўлиб, емоққа киришди.

Комиловнинг қошиғига котелокдаги макарон остидан

катта суюк осилиб чиқди. Комилов уни оғзига солган эди, лаби куйди, қўлига олган эди, қўли ҳам куйди. «Ма, сенга!» — деб уни ҳам Вафодорга ташлади.

— Мирза! Ҳеч нарса кўринадими?

— Йўқ!

Комилов дурбинни олиб атрофга қаради.

Ўнг ва чапда жанг бормоқда. Афтидан, қўшни дивизиялар, қўшни армиялар курашмоқда эди.

Комилов Вафодор ҳамроҳлигида траншеялардан юриб, взводларга борди. Траншеяларда котелокларга урилиб, қошиқлар шарақлайди, кружкалар жаранглайди. Жангчилар пана-пана жойларда, баъзилари шундоқ окоп ичидаги чордона қуриб, баъзилари ёнбошлаб, овқатланмоқда эдилар.

Комилов взводларга яқинлашган сари котелок, қошиқ, кружка, фляга овоздлари эши билар, ҳамма йиғиштиримоқда эди. Жангчилардан бири Комиловнинг олдиндан югуриб ўтаётуб, қоқилиб кетди-да, траншеяга йиқилди. Ўнинг қўлидаги котелоги уч газ ерга отилиб тушди. Траншея атрофини макарон қоплади. Бу янги жангчи Холиқов эди. У аста ўрнидан туриб, гимнастёркасидан тупроқни қоқди, кейин кафтидаги лойни артди-да, лейтенантга боқди. Уялганидан юзи қизариб кетди. Вафодор дам мулзам бўлган жангчига, дам тўнтарилиб ётган котелокка, дам ҳовури чиқиб турган макаронларга қараб қўяр ва узр сўрагандай Комиловдан гуноҳкор юзини яширади.

— Яна кеч қолдингми? — деб сўради Комилов овқати тўкилган жангчидан.

— Кечирасиз, ўртоқ командир.

— Чоп орқангга. Тезда овқатланиб ол!

— Охиргиси эди... — деди жангчи бўйини қисиб.

— Мирза!

— Лаббай, ўртоқ лейтенант.

— Блиндаждаги консервани олиб бер бунга. Вешмешокда турипти.

— Олдимга туш!

Улар блиндажга кириб улгурмай зениткалар тасира-тусур ота бошлади. Мирзанинг назарида кўкда гўё арининг уяси бузилгандай бўлди-да, немис штурмовиклари булатни ёриб, ерга шўнғий бошлади. Ҳали ҳам ўзига келмаган Холиқов анқайиб турган эди. Мирза жаҳл билан унинг этагидан тортди.

— Ёт!

Яхшики, улар траншея ичига ётиб олдилар, йўқса штурмовикларнинг пулемётлари икковининг ҳам калласини арралаб кетарди. Бир штурмовик худди Комилов блиндажининг тепасига қўнмоқчи бўлгандай шўнғиб тушди-да, тол бўйича жойдан яна баландлаб кетди. Аммо тахминан бир танобча ерга дўл ёққандай қора қўроғошин ёғди.

— Мирза aka, ҳо Мирза aka, — деб ялиниш оҳангидат мурожаат қилди Холиқов.

— Нима дейсан яна?

— Бир илтимосим бор.

— Гапира қол.

— Менга консерва бермасангиз ҳам битта ваъда берсангиз кифоя.

— Қанақа ваъда?

— Ўлсам ўзимизча қилиб кўмдиринг, хўпми?

— Бетамизлик қилмасанг-чи. Ўлгани келдингми бу ерга?

— Юрагим сезяпти. Йўқ, деманг!

— Алжира ма!

Шу қора крестли самолёт яна тепага келди ва по-тиратиб пулемёт отиб ўтиб кетди. Мирза ўзини блиндажга урди. Унинг орқасидан Холиқов югурди. Улар ичкарига кириб олишлари ҳамон боягими ёки бошқа-

сими, яна бир штурмовик шўнғиди. Шу вақт блиндаж-нинг орқа ва олдида устма-уст икки марта портлов эши-тилди. Мирза блиндаждаги стереотрубага қараган эди, занжирларини шалдиратиб танклар келаётгани кўринди. Уларнинг занжир-филдиракларидан чанг қуюндай тепага кўтарилимоқда. Тутунидан танклар орқасида нима борлиги билинмасди. Доннинг нариги қирғоғидаги оғир тўп-ларнинг снарядлари тепадан фувиллаб ўта бошлади. Комилов уларнинг қаерда портлаётганини ҳам кўриб турибди. Плацдармдаги батареялар ҳам гумбурлади. Бунинг натижаси дарҳол кўринди. Бошловчи танкни қопқора тутун босди, тутун алангаланди, танк гумбурлаб портлади. Чапроқда, ўнгроқда, орқароқда яна шундай кўринишлар такрорланди, аммо булар танклар йўлини тўсолмади. Орқароқда келаётган танклар уларни айланаб ўтиб, окопларга яқинлашиб қолишиди.

— Пэтэ-эр! — деб қичқирди Комилов.

Танкка қарши бронтешар қуроллар варанглади. Уларнинг ўқи тегдими ёки минани босиб олдими, бир танк қийшайиб қолди, иккинчиси тутаб кетди. Уларни айланаб ўтаётган танкларнинг яна бири қийшайди. Кимдир бешотардан ўқ узиб биқинидаги бензобакини ёндириб юборди. Уни ҳам четлаб ўтган уч танк Бекнинг окопи олдидан чиқди.

— Граната!

Бекнинг командасини пойлаб турган Алибеков бруствер тепасига кўтарилид-да, танкка қарши гранатасини биринчи танкнинг филдираги остига ташлади. Бир филдирагининг занжири узилиб кетган танк довдираб окопнинг устига чиқди-да, бир филдираги билан траншеяга ёнбошлаб қолди. Эрдонов унинг ҳам бензобакига ўт қўймоқчи эди, Бек уни тўхтатиб қолди.

— Портлаб кетса, ўзимизга зарар, — деди у.

Немис танки безараар эди. Чунки унинг тўпи окопга

санчилиб, пулемёти тупроқقا кўмилиб ётарди. Унинг экипажи темир қафасда авахта эди.

Баъзи танклар окопларни босиб ўтди-ю, лекин Дон қирғоғига етолмади. Уларни Баталовнинг резерви саранжомлади, лекин танклар орқасидан келаётган немис пиёдаси Комиловнинг окопларида, траншеяларида жанг қилмоқда эди. Баталов унга ёрдамга юборган взвод окопларга етиб келолмади. Жарлик томондан ўтган немис автоматчилари ўнг қанотда унинг йўлини тўсиб қўйдилар.

Шундай қилиб, Комилов ротаси ўз окопида ўрамда қолди.

Душманнинг икки взводи қилган атака роса тўққиз минут давом этди-да, ўнинчи минутга ўтганда сўнди. Қуролларнинг сумбаси совимай немислар чап биқинда ҳам атакага ўтишди. Порох оловидан қизариб кетган сумбалар алангаси чап биқинга ташланди. Шу вақт телефонист қўшни учинчи взводда аҳвол оғирлашиб қолганини хабар қилди.

— Трубкані менга бер!.. Қўшни! Гапир! Гапир! Қўшни!.. Гапирсангчи!

Трубка жим. Комилов «Эҳ, сабил!» деди-да, блиндаждан ташқарига югуриб чиқди. Унинг блиндажи олдиди Эрдонов гоҳ чап томонга, гоҳ ўнг томонга, гоҳ рўпарага автоматдан ўқ узмоқда. У окоп ичида югуриб юрарди. Бошқа окопларда ҳам унинг жангчилари худди шундай — чархпалакдай айланиб юриб, жанг қилмоқда эдилар. Алибеков яланг бош бўлиб олибди. Бек кўйлакчан юрибди. Иккаласи ҳам терга ботиб кетган.

— Вафодор, давай!

Қоп-қора кучук Комиловнинг оёқлари орасидан ўтиб кетди. Унинг оғзида диска. Бек уни ўқ ташувчи қилиб олибди. Вафодор лойга беланган, ҳўл. Яраландимикан, деб ўйлади Комилов. Йўқ. У соппа-соғ.

Комилов чап қанотни мудофаа қилаётган учинчи взвод томонга йўл олди. Учинчи взвод окопларига немислар кириб олишибди, лекин запас окоплар, запас йўлларни эгаллаганлари йўқ эди. Комилов жангчиларни ана шу йўллар билан олиб бориб, немисларни орқа томондан ўққа тутди. Улар саросимага тушгач, окопларга гранаталар ташланди. Иш қўл жангига бориб етмасдан, немислар окопни ташлаб кетдилар. Комилов уларни қувлаб бормади. Шу вақт Вафодор чопиб келди-да, оғзидағи қонга беланган пилоткани Комиловга тутқизди. Комилов пилоткани таниди: Бекнинг пилоткаси... Комилов кучукнинг мўлтиллаб турган маржондай кўзларига қаради.

— Нима гап?

Вафодор вовиллади-да, Комиловнинг гимнастеркасидан тортқилай бошлади. Комилов взводни ўз ўрнида қолдириб, Бек томонга югурди. Қора қонга беланган Бек кўйлагини ҳам ечиб ташлаб, яланғоч жанг қилмоқда, унинг баданлари окопга ишқаланганиданми, қип-қизил лой бўлиб кетган эди.

Бек лейтенант Комиловнинг йўлини тўсди:

— Борманг, у ёқда немис!

Комиловдан сал нарида икки немис ўлиги устма-уст тахланиб ётарди. Унга кўзи тушгач:

— Ўлик-ку! — деди Комилов.

— Бу менинг баррикадам,— деди Бек.— Нарёғида немис...

— Гранатангни бер.

— Тамом бўлди.

Шу чоқ Комиловнинг блиндажи томондан автомат тириллади. Комилов траншеяга энгашиб олди, ўқлар унинг тепасидан визиллаб ўтди. Вафодор автомат отилган томонга қараб жаҳл билан вовиллади. Комилов «Хаф тур!» деб кучукни ётқизиб қўйди. Окопдан бош

кўтариб бўлмасди. Қаерда кимнинг снаряди ёриляпти, кимнинг ўқи қаёқса ўтятти? Бу ҳам окоп ичидаги Комиловга қоронғи. Чунки, тўрт томондан ҳам ўқ учиб ўтмоқда эди.

Комилов вазиятни аниқлаш учун окопдан бошини чиқарди-ю, атрофга қараб улгурмай бўйини нимадир жиззиллатиб чаққандай бўлди. Бўйни ачишди, қизиди.

Гўё чаён бўйнига ёпишиб олиб, тинмай найза санчашетгандай эди. Комилов дурбинини қўйиб, бўйнининг ўша жойини ушлаган эди, қўли хўл бўлиб қолди. Нима бу? Қон! Теварак-атроф порох тутуни билан қопланган. Ким қаерда — буни билиб бўлмасди. Осмонни ҳам тутун қопламоқда эди.

Отишмалар унинг окоплари ичida давом этди.

— Уртоқ лейтенант, автоматингизни бериб туринг!

Комиловнинг олдида жанг тутунидан юзлари қопкорайиб кетган, икки кўзи йилтиллаб, Эрдонов турарди.

Комиловдан автомат олгач, Эрдонов бруствердан чаққон сакраб олдинги окопга ўтдию потирлатиб ота кетди. Комилов ўша ёқса кўз ташлаган эди, бир немис гўё ердан чиққандай унинг тепасида тик бўлди. Комилов пистолетидан бирданига бир обойм ўқ узди. Немиснинг жасади Эрдонов томонга салом бериб йиқилди. Нарироқда яна икки немис гўё тупроқ орасидан отилиб чиқди. Комилов Ҳамдамовнинг пистолетини ишга солди ва пистолетни қайта ўқлаётганида бўйни оғирлашиб, калласини бир ёқса тортиб кетаётгандай бўлди. Унинг қўли ҳам оғир қимирлади. Енгидан нимадир ўрмалаб кафтига тушди. Қон! У бўйнини бинтлаб олиш учун окопга ўтирди. Вафодор инграб ичдан йиғлади. Унинг ярасини боғлаб қўйиш бечора кучукнинг қўлидан келмасди. Комилов бир илож қилиб, ярасини бинтлаб олди.

Окоп ичидаги қўл жанглари яқинлашиб келмоқда эди. У қўл жангларига бориб қўшилиш учун юргани сари гўё окоплар ундан қаёққадир қоча бошлади, брустверлар учар, траншеялар винтдай айланарди. Комилов ҳеч нарсани англамай, бир лаҳзага траншея ичига ўтириди. Ўтиrolмади — оёғи толди, тиззаси қалтиради. Кейин у траншея деворига суяниб олди. Юрагининг уриши сусайиб, кўз олдини қоронғилик босди. Лекин у бор кучини тўплаб, ўрнидан турди-да, олға интилди. Қўл жанги шундоққина унинг олдида борар эди.

- Уртоқ Лейтенант!
- Ҳа, Мирза!
- Комбат юборди. Тезлик билан қуршовдан ёриб чиқаркансиз. У сизни жарликда кутармиш.
- Буйруғи қани?
- Оғзаки буйруқ.
- Бир марта оғзимиз куйганини билардинг-ку!..

IX

Комилов бир сўзли одам бўлиб, ортиқча гапни ёқтирасди. Бунинг устига у: «Бир марта оғзимиз куйганини билардинг-ку!» деди. Бу билан Ҳамдамовнинг ўлимига шама қилди. Буни жуда яхши тушунган Мирза дарҳол орқасига қайтиди. Қайтиш йўли осон эмас эди. Тепалик билан жарликни боғлайдиган ҳандақ йўлакнинг қоқ ўртасига немис пистирмаси кириб олган, йўл узилиб қолган эди. Мирза ана шу пистирмагача траншея билан келди, немис пулемёти негадир унга индамади. «Немисни бу ердан ҳайдаб чиқаришибди шекилли», деб ўйладида, унга яқинроқ борди. Ячейка брустверида немис пулемётининг сумбаси қорайиб кўринди. У дурустроқ кўриш учун сал баландроқ кўтарилган эди, «Чув! Чув!» деб бир неча ўқ унинг бошидан учиб ўтди.

Шу чоқ Мирзанинг биқинида нимадир гурсиллади, кимдир оҳ тортди, кейин инграган овоз эши билди. Бу нола бегона одамнинг бўғиқ товуши эди. Мирзанинг юраги анча дадилланди-да, нола чиқаётган томонга эҳтиёткорлик билан кўз ташлади. Бир немис чалқанча тушиб ётибди. Яна бир немис учинчисини бинтламоқда. Унинг қулоғи гарангми, ҳеч қандай шарпани сезмади. Мирза шеригини бинтлаётган немисга ташланди. Мирза унинг ярасига қаттиқ тегдими ёки қўрқиб кетдими, овозининг борича бўкириб юборди.

— Унингни ўчир, занғар! — деди Мирза унга ўзбекчалаб.

Немис шилқ этиб, унинг оёғи остига йиқилди.

— Капут!.. Капут!.. — дер эди у қалтираб.

— Мана сенга капут! — деди-да, Мирза автоматнинг қўндоғи билан бошига икки марта тушириб, йўлида давом этди.

Батальон командирининг КПси жарликнинг бошланиш жойида, ёнбағирликнинг ичига ўйиб қурилган ертўлада эди. Баталов ертўладан ташқарига чиқиб, пана жойда — Ҳамдамов жон берган ердан жангни кузатмоқда эди. У энтикиб келаётган Мирзани кўриши билан:

— Рота қани? — деб сўради.

— Рота тепаликда! — деди Мирза нафаси оғзига тикилиб. Баталовнинг олдида пилоткаси қийшайган, гимнастёркасини чанг босган, афтидан қандайдир ваҳимага тушган жангчи ҳамон ҳансираф турарди.

— Упкангни бос, қўрқоқ. Лапашанг! — деди Баталов ғазабланиб. — Ярим йўлдан қайтдинг шекилли. Ит қувладими сени?

— Ўртоқ капитан... — деди Мирза.

Баталов уни тинглагиси келмади.

— Комиловнинг санинструктори шу ердами, кетдими? — деб сўради у адъютантдан.

— Шу ерда.

Баталовнинг жаҳли баттарроқ чиқди.

— Нега ивирийди, бу каламуш!

— Ўртоқ комбат! — Мирза яна доклад қилмоқда уринди.

Шу вақт комбатнинг олдига санинструктор Собировни топиб келишди. Баталов уни кўриб, буюрди:

— Собиров! Комиловнинг олдига ўзинг бор. Югур!

— Ўртоқ капитан! — деди Мирза унинг гапи тугамай гап бошлаб. — Комилов ёзма буйруқ сўраяпти.

— А?..

— Комбатнинг имзосини кўрмагунча тепаликдан кетмайман деяпти.

Баталовнинг кўз олдида Ҳамдамов гавдаланди-да, уни таъна қилгандай бўлди. Баталов ноқулай аҳволга тушди. Мирзадан ҳижолат бўлди. Собировни тўхтатди.

У планшетидан блокнотини олди, бир варағига шошилиб: «Комилов! Дарҳол қуршовни ёриб ўт! Жарликда кутаман! Икки томонга кўмакчилар қўйганман. Баталов», деб ёзди-да, қийшиқ йиртилган ярим варақ қофозни Собировга тутқизди.

— Комиловнинг ўз қўлига бер! Рация ишдан чиқсан. Телефон алօқаси ҳам ер билан яксон. Тезроқ бор.

Собиров сумкасини бўйнига илиб, белига граната жойлаб олгач, автоматини жангга шайлаб, йўлга тушди.

— Бу ёқда немис. Чапдан юр! — деди комбат унга йўл кўрсатиб.

Собиров жарликнинг чап ёнбағрига тирмашди. Унинг кетидан қараб турган Мирза комбатга:

— Ўртоқ капитан, ижозат этинг, ўзим борай, йўлни яхши биламан, — деди.

Мирза ёнбағирликнинг бошидаёқ Собировга етиб олди ва уни ўнгга, синашта йўлга бошлади. Улар салгина эмаклаб боришгач, хандақ йўлакка тушиб олдилар. Со-

бировнинг сумкаси хандақ йўлакнинг деворига урилиб борарди.

— Мунча имиллайсан!— деди Мирза сумка билан овора бўлиб орқада қолган Собировга. — Тезроқ юр, у ёқда одамларимиз қон қусаяпти!

Собиров сумка тасмасини калта қилиб, осиб олди-да, Мирзага ёндошди. Гоҳ ўнгда, гоҳ чапда, орқада ва олдинда мина, снаряд ёғиларди. Брустверларнинг тепасида эса, икки томондан бир-бирига қараб, ўқлар галаси тинимсиз учарди. Мирза билан Собиров хиёл эгилиб букилиб, эгри-буғри хандақ йўлда боришмоқда эди. Собиров шеригининг гимнастёркаси этагидан тортди-да, шивирлади:

— Мирза!.. Немис!..

Бу Мирзага таниш жой, бояги пистирма ячейкаси эди.

— Қўрқма, учаласи ҳам ўлик. Бирини ўзим ўлдирганман, — деди Мирза уни тинчтиб.

— Қимирлаяпти-ку...

Шу чоқ унинг қаршиисида ёт пулемёт акиллаб қолди.

— Тирилибди, занғар!— деди Мирза шивирлаб.— Гранатанг борми?

Собиров камарига қистирилган гранатани ечолмай анча ҳаяллаб қолди.

Гранатани Мирзанинг ўзи юлиб олди, бирини акиллаётган пулемётга ташлади-да, югуриб кетди.

Мирзанинг кетидан чопган Собиров чуқурга ётиб ултуар-ултурмас муштдай граната ёрилиб, атрофга қора тутун аралаш тупроқ ва кесак ташлади.

— Тегмадими?

— Пулемёти кўринмайди, аммо немисини кўряппман,—деди окопга мўралаб олган Собиров.

— Нима қиляпти?

— Қимирламаяпти.

— Анча вақтимизни олди тўнғиз. Тезроқ юр, рота қонга беланиб кетяпти.

Немислар мурдаси устидан биринчи бўлиб Мирзанинг ўзи ҳатлади, унинг кетидан Собиров ўтди. Собировнинг назарида немиснинг бири нафас олмоқда эди. Собиров беихтиёр тўхталиб, унинг томирини ушлади. Немиснинг томири аста-секин тепмоқда эди.

Мирза ўз ёнидаги Собировнинг шарпасини йўқотгач, орқасига қаради:

— Нима қиляпсан?

— Тирик экан... Бошини бинтлаб қўйдим.

Мирзанинг кўзи чақнаб кетди.

— Қекирдагидан гиппа бўғмайсанми, каллаварам, бир тепиб нариги дунёга юбор!

— Ярадорни ўлдириб бўладими?

— Ярадор бўлса ҳам душман! Қайтишимда яна йўлимни тўсади бу газанда.

Мирза автомати қўндоғи билан немиснинг бошига бир урди-да, қўндоққа ёпишган қонни тупроққа артиб, йўлида жадаллаб кетди.

Бир амаллаб тепаликка чиқишиди, уларни Вафодор қарши олди. Қоп-қора кучук малла бўлиб кетган, озиб, кичкина бўлиб қолган эди. Тили бир қарич. У Мирзани кўриб, қувониб кетди-да, Комиловнинг олдига бошлади.

Комиловнинг ротаси бир жойга ғуж бўлиб олиб, очиқ қўрғон шаклидаги околларда жанг қилмоқда эди.

— Мана буйруқ!—деди Мирза унга Баталовнинг қоғозини узатиб.

Комилов комбатнинг қинғир-қийшиқ сатрларига кўз юргутириб олгач, имзосига синчиклаб қаради-да, Мирзага буюрди:

— Бекни чақир!

Мирза кетгач, Собировга ўшқирди:

— Нега қараб турибсан. Ярадорларни кўрмаяпсанми?

Собиров янги бинт олиб, Комиловнинг бўйини бор-ламоқчи эди. У жеркиб ташлади.

— Мени эмас, жангчиларни деяпман!

Собиров хандақча шўнғиди:

Бек югуриб келди. Лаби-лунжи қон. Қўлидаги автоматининг қўндоғи синиқ эди. У қўл жангига вақтида «эҳтиётсизлик» қилиб, қўндоғини немиснинг чаккасига эмас, каскасига урган экан...

— Қуршовни ёриб чиқамиз. Бошла,—деди Комилов унга.

— Йўл очиқ,—деди Мирза.—Қўшни рота ташлаб кетган хандақлар билан келдик. Немис пистирмасини ўзимиз мажақладик.

— Бошла, бўлмаса!

Мирза олдинга ўтиб олди, аммо салгина юргач, окопдан «ёт!» деган садо эшитилди.

Мирзанинг қаршисида, тахминан беш-олти метр нарида девдай немис унга автоматининг қора сумбасини ўқталиб турар, унинг орқасида ҳам немислар кўринарди. Мирза бир лаҳза нима қилишини билмай туриб қолди, унинг орқасидан кимdir ниманидир ирғитдида, ўзини ерга ташлади. Гумбурлаб ёрилган граната бостириб келаётган немисларни ҳам окопга ётқизиб қўйди. Гранатани Холиқов ташлаган эди. У Мирзага қараб кулиб турарди. Комилов вазиятни дарҳол англади-да, Бекка буюрди:

— Взводингни ўрта окопларга бур!

Бек аввалдан тайёрлаб қўйилган, аммо душман назоратидаги хандақ йўллар билан чекина бошлади. Мудофаа ташкил қилаётсиб, Комилов бу ерларга қўйдирган миналардан бирортаси ҳам портламаган, немислар бу жойларни эгалламаган ёки Комилов қўйдирган ми-

наларни аллақачон топиб олган эди. Буни аниқламай бу йўлдан чекиниш операцияси мушкул, деб билган Комилов сапёрлар сержантини чақириди. Ҳалок бўлган сержант ўрнига Алибеков келди. Комилов ундан сўради:

— Пульт қаерда?

— Ўзимда!—деди Алибеков.—Нима қилай? Бураворайми?

Шу он Комиловнинг олдида Бек пайдо бўлди. У терга пишиб кетган. Пилоткасининг тагидан ҳам тер оқарди. Ҳансираф гап бошлади:

— Ўртоқ лейтенант! Келишяпти.

— Қимлар?

— Ана, қаранг...

Комилов қараган эди, чекиниш йўлидаги хандақларда бир неча қора каскани кўрди. Тахминан немиснинг бир бўлинмаси келмоқда эди. Нарироқдаги окопларда ҳам кўк френч, қора каскалар ғимирлар эди.

— Алибеков, бос энди!

Алибеков «ёtingлар!» деди-да, қўлидаги «қутича»сини бураб юборди. Жангчилар ўзларини окопларга ташлашиди. Кейин немисларнинг орқасида, олдида уст-устига катта ва оғир миналар гумбурлаб портлади.

Комиловнинг дурбини портлов жойларини хира кўрсатди. Чунки, у ерларда ҳали чанг билан тутун босилгани йўқ эди. Чанг-тўзон босилди, Комилов энди немисларнинг хандақларда тартибсиз ётганликларини аниқ кўрди.

— Бек! Бос, жигарим!—деди Комилов.

— Қани, юринглар!—деди-да, Бек биринчи бўлиб олга ташланди, унинг кетидан бир гуруҳ автоматчи югорди.

Немислар буни сира кутмаган эдилар. Ўз оёқлари остида катта миналарнинг тўсатдан кучли портлаши улар-

ни саросимага солиб қўйган, портлашдан кўплари парчаланиб кетган, айримлари тупроқ остида ётарди. Омон қолганлари сув бетига чиқиб қолган балиқдай беҳуш турардилар. Бу эса Бекнинг йигитларига жуда қўл келтида, уларни қўндоқ билан, гоҳ найза билан саранжомлаб, ротага йўл оча бошладилар.

Собировни ярадорлар билан дарё бўйидаги пана хутторга жўнатгач, Комилов рота старшинасини чақириб, ярадорларнинг аҳволини сўради. Старшина ярадорлар ҳам сафда жанг қилаётганини айтиб эди, Комилов:

— Оғирлариямми?—деди.

— Биттаси оғир эди, Мирза орқалаб олди.

— Кимни?

— Холиқовни...

— Ярадорларга сен жавобгарсан. Уқиб ол: бошинг билан жавобгарсан. Эшитдингми?

— Эшитдим, ўртоқ лейтенант!

Биринчи взвод орқасидан Собировнинг замбил кўтарган санитарлари, уларнинг кетидан оғир ярадорни орқалаган Мирза борарди. Холиқов «оҳ-воҳ»ламаса-да, ҳадеб, бир сўзни такрорлар эди:

— Васият...

Уни тинчлантириш учун Мирза ҳар доим шу сўзни уқтирарди:

— Хотиржам бўл!..

Отишмани кучайтириб, олдиндаги жангчилар жадаллаб кетишиди. Собировнинг санитарлари ҳам уларнинг кетидан югурап, аммо йўллари унмасди. Чунки, хандақ тор ва эгри-буғри эди. Энг охирида замбил кўтариб кетаётган санитарлар муюлишда қоқилиб йиқилишди, замбилнинг ёғочи ерга санчилиб қолди. Унинг устига Мирза келиб ағанади. Мирзанинг елкасидаги Холиқов бошидан ошиб, замбилдаги ўликлар устига тушди-да, устма-уст икки марта «ҳиқ-ҳиқ!» деб тинчиб қолди.

— Жойи жаннатда бўлсин!—деди Мирза рўмолнаси билан энгагини танғир экан.

— Йўлни тўсма, Мирза!—деб қичқирди Комилов.

Холиқовнинг жасадини ҳам ҳалиги замбилга солиб, кўтаришди-да, тез юриб кетиши.

Орқада тасира-тусур кучайди. Мирза қайрилиб қараган эди, Комиловни кўрди. У бир неча жангчиси билан пайдо бўлган немисларга ўт очмоқда эди. Санитарлар анча узоқлашгач, сакраш учун йўл очилган эди. Комилов шу чоқ очиқ йўл орқали қамалдаги жангчиларни битта-битталаб тайнланган жойга жўнатаверди.

Тўрт томонда отишма бормоқда эди. Комилов ниҳоятда эҳтиёткорлик билан иш кўргани учун ротанинг қуршовдан ёриб чиқаётганини немис қўмондонлиги пайқамай қолди.

X

Жанг майдонидан энг кейин Комилов чиқди. У чарчаган бўлса ҳам, ўзини дадил тутар, Ҳамдамовнинг пистолетини маҳкам ушлаб олган эди. Унинг чаккасидан тер оқар, бўйнидаги бинти лойланиб кетган. Шу вақт қаёқданdir Вафодор пайдо бўлиб, унинг оёқларини ялади. Комилов унга эътибор қилмай, олдинга ўтди, Ҳамдамовнинг қабри яқинига келганида оёғи билан кучкни нарига туртиб юборди-да, гимнастёркасининг чангини қоқиб, камарини тортиб, ўртоқлар мозори қаршисида тўпланаётган жангчиларига қичқирди:

— Нима туриш бу!

Жангчилар кийим-бошларини тузатиб, хутор томон қўзғалган эдилар, Комилов яна ҳам баландроқ овозда.

— Қаёққа? Ҳеч қаёққа!—деб қичқирди. Рота ўрнида қотгац, буюорди:—Окоп қазинглар!

Унинг буйруғига биноан кичик командирлар ўз жангчиларига белкурак тутқизиб, хутор атрофида окоп қа-

зишга киришдилар. Белкураклар тошга тегиб тарақлаб, чақмоқ чиқара бошлади. Комилов санинструкторни топтириб, сўради:

— Қаҳрамонларнинг жасади қаерда?

— Қудуқ олдида,—деди Собиров.

— Қудуқ олдида нима қиласди? Мана-ку, қабристон!

— Мирзанинг иши бу, ўртоқ лейтенант. Мурдаларни битталаб совуқ сувда ювиб, чойшабга ўрайпти. «Бу қилиғингни ташла», десам балога қолдим.

Комилов бармоғини тишлаб, андак ўйлади-да, бу юрди:

— Мирзага айт, уларга қабрни ҳам ўзи қазисин. Бошқа одам беролмайман.

Буйруқни бажариш учун югуриб кетаётган Собировни тўхтатиб, Комилов ундан сўради:

— Ярадорлар қаерда?

— Медсанротага олиб кетишди. Комбатнинг шахсай ўзи жўнатди. Кетаверайми?

— Тўхта! Ярадорларнинг қаердалигини билиб қўй, Вақт тополмасам кечаси бориб, кўриб келаман. Мирза га ўзинг қарашиб юбор.

Собиров қудуқ томон чопқиллаб кетди.

Қудуқ икки жарликнинг орқасида, пастак ажриқзорда қазилган эди. Ўнинг атрофида дараҳт йўқ, аммо челаклардан сув тўкилиб, атрофида шўра, бурган ўсиб ётарди. Сувга қатновчиларнинг оёғи қудуққа икки томондан йўлакча очган, йўлакчанинг икки бетидаги кўкатлар тиззага уарди.

Мирза тепаликдан кўтариб келган замбилини ана шу кўкаламзор устига қўйди-да, эгалари ташлаб кетган хонадонлардан чепак топиб келиб, ажриқзорга сув ташиди. Сувини тунука жомига ғамлаб олгач, кўрпадай қалин ажриқ устида Холиқов мурдасини ювмоққа киришиди. Мирза умрида ғассоллик қилмаган бўлса ҳам

бу ишдан йирганимади. Аввало, мурдаларни кўравериб, эти ўлиб кетган, қолаберса бу—васият, жангчининг жангчига берган ваъдасига амал қилиш эди.

Мирза қўлидан келганича Холиқов жасадини ювиб-тараб, оқ рўжага ўради, билганича жаноза бошлади-ю, тутатолмади.

Шу ишнинг устига комбат Баталов келиб қолди, унинг орқасидан бир қадам нарироқда подполковник Веселов турарди. Баталов дўриллаган овоз билан Мирзадан сўради:

— Нима қиляпсан?

Мирза ўзини йўқотиб қўйди шекилли, индамай қақ-қайиб туриб қолди.

— Нима қиляпсан деяпман?—деди Баталов такорран.

Мирза қилаётган ишини қисқароқ ифодалаш учун сўз тополмасди, тутилиб-тутилиб жавоб берди.

— Биласизми, одатимиз шунаقا. Мен васиятни ба-жаряпман, ўртоқ капитан.

— Қанақа васият?

— Жангчи Холиқов қўлимда жои берди. Ўзбекча қилиб кўмгин деган эди... Мен ваъда берган эдим.

Баталов ёнида турган подполковникка бир қараб қўйди-да, унинг фикрини билгунча ҳам бўлмай Мирзага:

— Бас қил бу савдони!—деди.

Мирзанинг юзида норозилик аломатларини кўргач, Баталов яна ёнидаги подполковникка боқди.

— Нима дейсиз, бунаقا анархияга йўл қўйиб бўладими?

Баталов подполковник Веселовнинг юзида ғазаб эмас, мамнунлик кўрди. Демак, у солдатнинг бу ишини қоралаётгани йўқ, аксинча, ичдан маъқуллаётгандай эди.

— Майли,—деди Баталов Мирзага қараб.

Мирза ишида давом этди.

— Бу ўзбекларга ҳайронман,—деди Баталов йўлида бораркан Веселовга уқтириб.—Биттасининг бурни қонаса ҳам тўрттаси парвона бўлади. Мана бунинг қилаётган ишини қаранг.

— Бу иши менга жуда ёқди,—деди Веселов.

— Нимаси ёқди? Дарё-дарё қон тўкилаётган жойда ҳам одатларини қўйишмайди.

— Солдатнинг васиятига содиқлиги ёқди. Бу иши билан Мирза урф-одатининг қули бўлиб қолгани йўқ, Ватан учун жон берган қаҳрамоннинг қули бўляпти. Бу катта гап!

Улар ўртоқлар мозорига келишди. Баталов янги қабрларнинг тупроғини четлаб ўтди, Веселов эса, Ҳамдамовнинг қабри бошига қўйилган бир даста гулга эътибор бермай ўтолмади. Гулдастанинг ичига икки энлик қоғоз тиқиб қўйилган эди. Веселов гул ичидан уни аста суғуриб олиб, ўқиди.

— Нима экан?—деб сўради Баталов.

— Комиловнинг рапорти экан.

— Қанақа рапорт? Алоқачи тушириб қўйиптими?

— Йўқ. Ҳамдамовга ёзипти. Буни эшият, Баталов: «Содиқ ака! Тепаликни қайтариб олдик. Тўрт соат ушлаб турдик. Иложи бўлмади. Энди қабрингизни қўриқлаяпмиз. Хотиржам ётинг. Тепаликни яна оламиз. Васиятингиз ёдимизда! Сизнинг Комилов».

— Ҳамдамовни чинакам яхши кўраркан бу Комилов,—деди Веселов.—Васияти нима эди?

Веселов бу полкда янги одам бўлгани учун ҳали кўп нарсани, шу жумладан, Ҳамдамовни ҳам яхши билмас эди. Шунинг учун Баталов қисқача қилиб тушунтирди.

— Ҳамдамов яхши командир эди. У билан Гроднодан бери бирга эдик. Шунинг учун Донни кечиб ўтиш-

да ҳам уни аръергард қилиб қолдириб эдим... Ўнг қирғоққа плацдарм кераклиги хаёлимда йўқ, иши битгач, тепаликни қолдириб, чап қирғоққа ўтди-ю, раҳмат ўрнига таъна эшилди...

— Командири шуни гапирғанмиди?

— Ҳа, шуни. Ҳамдамовни йўқотганимдан бери гарангман. Мен ҳам қизиққонлик қилдим ўшанда...

— Сўкибмидингиз?

— Сенинг учун трибуналга тушгим йўқ, деб эдим ёки шунга ўхшаш қўполроқ гап қилувдим.

— Ориятли офицер экан-да.

— Биргина у эмас, ўзбекларнинг ҳаммаси ҳам орияти қаттиқ экан. Ҳамдамовнинг бир жангисини «онангни» деб сўkkани учун у ўринбосаримни тўппа-тўғри дивизия комиссарига судраб борган. Комиссар мени чақириб: «Қани Баталов, бу саволга ўзинг жавоб топиб бер-чи», деди.

— Қанақа савол экан?

— Бу жангчи онамнинг гуноҳи нима, депти. Онам мени яратди, эмизиб катта қилди, ўзи емай, менга едирди, вояга етказиб, аскарликка жўнатди. Онам ҳақорат эшитиш учун мени солдат қилмаган-ку? депти.

— Айби бор эканми?

— Айби қаёқда! Йўлда обмоткасичувалиб кетган экан. Энгашиб тузатаётса, ўринбосарим қоқилиб тушибди. Шунга «онангни» деган экан. Унинг саволига жавоб тополмадим, аммо комиссардан ҳайфсан олиб қутулдим,

— Уша жангчи ҳаётми!

— Комилов билса керак. Ана, ўзидан сўраймиз.

Комбат билан Веселов ўртоқлар мозорида юрганини кўриб қолгач, Комилов улар олдига югуриб келди.

— Ўртоқ подполковник! Рота мудофаа окоплари қазияпти,—деди рапорт бериб Комилов.

Баталов унга ёнидаги ҳамроҳини таништириди:

— Подполковник Веселов—полк командири...

Комилов честь бераб, комполкка ўзини танитди:

— Биринчи ротанинг командири, лейтенант Комилов, 1942 йил бошидан бери партия аъзоси, 1941 йилдан бери жангдаман.

Веселов табассум билан унга қўл узатди, сўрашиб олгач, Комиловнинг гимнастёркасидаги чангни қоқиб қўйдида, мулоийм сўради:

— Партияга жангда кирдингизми?

— Жангларда баҳодирлик кўрсатгани учун партия аъзолигига олганмиз,— деди Баталов. Қейин у Комиловга қараб сўради:— Ҳу, менга ҳайфсан олиб берган жангчи ҳаётми?

— Ҳаёт, ўртоқ капитан.

Шу он қудук томонда тасира-тусир автомат отилди, Баталовнинг қони қайнади.

— Ким бебошлик қиласпти?— деди у Комиловга.

— Ҷақир уни бу ёққа, қўли қичиса, тепаликка бориб келсин.

Комилов автомат отаётган Мирзани чақириб келди.

— Салют берувдим,— деди Мирза бунинг сабабини изоҳлаб.

— Ўртоқ капитан! Бояги сиз сўраган жангчи шунинг ўзи,— деди Комилов Баталовга Мирзани таништириб.

Веселов унга эътибор билан қараб қўйди. Баталов эса, Комиловнинг ротаси окоп қазиётган томонга Веселовни бошлади.

— Қани, мудофаангни бизга кўрсат-чи, Комилов,— деди у лейтенантга.

Улар окоп қазиётган жангчилар томон аста боришди. Қош қорайган эди. Онда-сонда юлдузлар кулиб турибди. Ҳали ой чиққани йўқ. Гоҳ орқада, гоҳ олдинда

тўп овози эшитилади. Узоқ-узоқларда темир йўл станцияларидами, катта йўллар ёки шаҳар марказларидами бомбалар портгайди. Аммо, Доннинг «Кичик ери»да жимлик ҳоким. Немислар Баталовнинг батальонини пастлика ҳайдаб, тепаликни эгаллашга, шу билан ки-фояланишдими ёки ҳолдан тойиб қолишдими, жангни бас қилишиди.

— Бу жимликнинг тагида лойи бор,— деди Веселов.
— Иложи борича ерга чуқур кириб олиш керак!
Буни жангчилар ҳам яхши тушунар эдилар. Шу сабабдан ҳамма бирдай ер қазирди.

Веселов комвзвод Бекнинг қўлидан белкуракни олиб, ер қазий бошлади. Унинг уст-боши чанг бўлиб кетди. Буни кўргач, Комилов «ол» дегандек Бекка ишора қилди, Бек унинг қўлидан белкуракни қайтариб олиб, қааишда давом этди. Веселов кийимларига ёпишган чангни қоқиб, ротага муваффақият тилаб, Баталов билан бирга жўнаб кетди

Старо-Клетскнинг шимолий чеккасидаги дўнгликлар остида катта ёғоч уй бўлиб, атрофидаги ҳамма уйлардан баландда турар, дарёнинг чап соҳилидан бу уй гўё дўнгликнинг киндигига ўхшаб кўринарди. Дўнглик томонда эса, кўзга чалинмас эди. Подполковник Веселовнинг назарида уй гўё унинг штаби учун атайлаб қурилгандай қулай бўлиб, уни «рама»лар ҳам тополмасди. У яқинда қурилгани учунми топография хариталарида ҳам йўқ, яъни артиллерия ўқидан ҳам четда эди. Шунинг учун Ҳамдамов бу уйни эгаллаб олиб, ўзининг оғир ва енгил ярадорларини жойлаган, ҳатто унга «тиббий қисм уйи» деб ном қўйган эди.

Комилов «тиббий қисм уйи»га кириб борганида очиқ форточкадан гармонь янгради, гармончи билар-бilmас чалиб, ўзича сўз тўқиб, қўшиқ айтмоқда эди.

Донга тўлиб сув оқар,
Аскарлар унга боқар.
Ярадорга Маринанинг
Шифокорлиги ёқар...
Хо... Кулиб боқиши ёқар...

Дераза олдида Қомиловнинг қораси кўриниши ҳамон ашулачининг йўғон овози шартта кесилди. У ичкари кириш учун эшикни очаркан, қон ва ивиган кийим-бошларнинг қўланса ҳиди димогига урди. Янги ярадорни кимдир, нотаниш қиз бинтламоқда, Мирза эшик олдида тамбуруни қучоқлаб, тик турар эди.

— Уртоқ лейтенант, ярадорларга ҳаваскорлик концерти бериб турган эдим, концерт тамом бўлди, кетаверсам майлими?— деди Мирза.

— Кечки маълумотни тайёрлаб қўй, бу ердан бориб, қўйиб бераман,— деди Комилов унга. Мирза ярадорлар билан хайрлашиб чиқиб кетаётган эди, Комилов қўшимча қилди.— Менга қара, взводлардан қанча ячейка, қанча траншея қазилганини аниқлаб ол!

Биринчи хона ярадорга тўлиб кетган. Улар ичидаги Комиловга нотаниш жангчилар ҳам бор. Афтидан улар қўшни қисмларнинг ярадорлари бўлиб, Доннинг чап қирғоғига ўтиш учун паром кутаётган бўлсалар керак. Комилов янги келган ярадорни бинтлаётган қизга қараб қўйди, уни танимади. «Бу ҳам паром кутаётганлардан дандир», деди-да, ярадорлар билан саломлашиб бориб, бурчакдаги каравотда ётган Ваҳобовнинг ёнига ўтди. Ваҳобов, оғриқ азобиданми ёки Мирзанинг концертидан роҳатланганиданми, кўзини юмиб жим ётар эди. Комилов бир лаҳза унга тикилиб қолди, Ваҳобов кўзини очди. Унинг кўзлари анча чуқурлашиб кетган эди. У дафъатан Комиловни танимади.

— Қалайсан, Ваҳобов? Мен Комиловман,— деди лейтенант ўзини танитиб.

Ваҳобов пўлат каравот сеткасини ғичирлатиб ўрнидан туришга интилган эди, эшик олдида янги келган ярадорни бинтлаётган қиз пайдо бўлди-да, елкасидан босиб, жойига ётқизиб қўйди ва Комиловга бу ердан чиқиб кетинг, дегандай ишора берди.

— Сиз, қайси қисмдан сиз, синглим? — деб сўради Комилов нотаниш ҳамширадан.

— Мен шу уйнинг эгаси бўламан, — деди қиз табасум билан.

— Врачмисиз?

— Ўқитувчи эдим. Бу уйга ярадорлар киргандан бери ҳамширалик қиляпман.

— Санинструкторимиз шу ердами?

— Қайиқда, — деди қиз. — Паром чўкиб кетган, оғир ярадорларни қайиқда ташияпмиз.

Комилов, буни қачон жўнатасиз, деб Ваҳобовга ишора қилиб қўйди. Қиз Комиловнинг «тиббий қисм уий»-нинг ҳовлисига бошлади.

— Шу ерда гаплашайлик, оғир ярадорларга ҳалақит беряпмиз, — деди у ҳовлига чиқишгач. Кейин лейтенантдан сўради:

— Қим бўласиз?

— Сизнинг пўлат каравотингизда ётган Ваҳобовнинг командириман. Жуда яхши сержант эди бу Ваҳобов. Афсуски, сафдан чиқиб қолди.

— Ҳамдамов сиз бўласизми?

— Йўқ, — деди у бошини эгиб.

— Сержант Ваҳобовнинг оғзидан шу фамилия тушмаяпти. Алаҳлаганида ҳам, тинчланганида ҳам «Ҳамдамов»ни чақирияпти.

— Ҳамдамов анави уч олма ўртасида ётипти, — деди Комилов хомуш. — Яхши командир эди...

— Энди билдим, мен сизни танийман, сиз лейтенант Комиловсиз. Сиз ҳақингизда ҳам кўп яхши гаплар эшит-

дим. Ярасини бинтлатиб олган бир гуруҳ ярадорлар: «Комиловни ёлғиз қўймаймиз!..» деб маслаҳатлашгач, қуролланиб чиқиб кетиши. Собиров ҳам уларни тўхтатиб қололмади. Ушалар сизнинг жангчиларингизмиди?

— Ушаларнинг бири мана шу ердаги сержант Ваҳобов эди...

— Ҳа, айтмоқчи, уларни шу йигит бошлаб кетган эди.

Шу вақт кимдир «Рама!.. Рама!..» деб қичқирди.

«Тиббий қисм уйи»даги чироқ учди. Сал нарида немиснинг разведка самолёти пайдо бўлди-да, хоторни айланга бошлади. Эгаллаган жойларини билдириб қўймаслик учунми, зенит батарияси индамади. «Рама» Доннинг ўнг қирғонига бир-икки шрапнелли бомба ташлаб, орқасига қайтиб кетди.

— Исми шарифингизни билсам бўладими?— деб сўради Комилов қиздан.

— Марина,— деди қиз мулойимлик билан.

— Марина!— деб такрорлади Комилов,— жуда ажойиб исм экан.

— Чой ичасизми?— деди Марина.— Муроббо билан. Юринг.

Комилов унга жавоб қилиб улгурмай ҳозиргина «рама»нинг бомбаси партлаган жойда снаряд тарсиллаб ёрилди-да, унинг темир парчалари атрофга учди.

— Бошланди!— деди Комилов қизга,— окопга тушиб олинг. Қўришгунча хайр! Ярадорларни тезда жўнатинглар. Тўп еми бўлиб қолишмасин боёқишлиар.

— Хотиржам бўлинг!— деди Марина қатъий.

Снарядларнинг портлаши кўпайиб «Тиббий қисм уйи»га тобора яқинлашиб келмоқда эди. Марина окопчада ётиб, Комиловнинг орқасидан қараб турди. Комилов гоҳ югуриб, гоҳ эмаклаб борарди.

Ана, унинг орқасида чақмоқ чақилгандай бўлди-да, снаряд ёрилди. Комилов ерга тошдай отилиб тушди. Марина «вой» деб юрагини чангаллади. Хайрият, Комилов ўрнидан туриб, яна югурди ва бир зумда қораси кўринмай кетди.

Комилов Маринани ўйларди: «Қўрқмас қиз экан бу Марина, ўзини нобуд қилиб қўймаса бас». У ўз окопига тушиб, дурбиндан «тиббий қисм уйи» томон қаради. Марина ҳамон қараб турарди.

Комилов техникумни битирган куни ҳарбийга чақирилган эди. Ҳарбийда у аввал сержант, кейин кичик лейтенант бўлиб урушни ўқчи взвод командири лавозимида бошлади. У бирор қизни севиш у ёқда турсин, танишиб, синашиб ҳам улгурмаган, муҳаббатниң қанақа бўлишини китоблардагина ўқиган эди. Марина ҳозир унга худди ўша китобларда тасвирланган муҳаббат париларидаи туюлиб кетди, кўзи олдида гавдаланиб, қалбини аллақандай ширин туйғуларга чўлгади. «Яхши қиз экан Марина. Худди сутга чайиб олгандай-а! Овози-чи, қулоғинг остида қўнғироқдай янграйди». Унинг оний ширин хаёlinи Мирза чўчитиб юборди.

— Рапорт тайёр,— деди у честь бериб.— «Рама» бомбасидан зарар кўрганимиз йўқ, аммо артиллерия отишмасидан икки жангчи билан бир отни йўқотдик. Ярадорлар ҳам бор. Ҳаммасини батафсил ёздим.

Комилов батальон командири капитан Баталов номига ёзилган бу ҳужжатга шошиброқ имзо чекдими ёки бояги хаёлнинг таъсириданми, имзоси эгри-бугри бўлиб қолди.

Артиллерия ҳужумидан кейин немислар жимиб қолишиди. Аммо уларнинг мушакчилари дам-бадам мушак отиб, ўзларини нур билан қўриқлаб туришди.

Яrim кечага бориб, Комилов яна «Тиббий қисм уйи»га йўл олди. Ярадорлардан хабар олишни важ қил-

ган бўлса ҳам, аслида Марина билан гаплашиб келмоқчи эди. Марина у билан сухбатлашишга вақт тополмади. У «рама» бомбасидан, снаряд парчасидан яраланганд жангчилар билан банд эди.

Комилов янги келтирилган ярадорлар ичидан ўз жангчиларини қидирди, аммо бирортасини ҳам тополмади.

Санитарлар қўшни қисмдан яна ярадорлар олиб келишди. Маринанинг иши кўпайгандан-кўпайди. Кутакута ҳориган Комилов тонг отарга яқин ротага қайтиб кетаётган эди. Марина унга қаради-да: «Қаёққа?», деб сўради.

— Фрицларни кутгани,— деди у соатига қараб.
— Улар уйғонмасдан мен жойимда бўлишим керак...

XI

Немислар бугун, яъни 1942 йилнинг 30 июль куни, одатдагидан аввалроқ уйғонишган эди. Чунки Дон воийиси яланглик ва бўз ерлардан иборат бўлгани учун ҳали қўёш кўринмай туриб, ҳамма ёқ оппоқ оқариб кетарди. Немис қўймондонлиги ана шуни ҳисобга олиб, одатдаги режимга хилоф равишда қисмларни ғира-широда оёққа турғизди. Буни Комилов қарама-қарши окопларда котелокларнинг шақириш-шуқури, итнинг акиллашидай овозлардан сезиб турарди.

Мудофаачилар эса, туни билан ухлашгани йўқ. Янги позицияларни мустаҳкамлашнинг ўзи бўлмас эди-да.

Комилов рота позициясини айланиб юриб, жангчи ва сержантларга чўкич ва белкуракларни ташлаб, жанговар марраларга жойлашишни буюрди. Қейин у старшинани чақириб, аскарларнинг ионуштасини термосларда келтириб беришни тайинлади. Ўзининг буйруқлари ижро бўлаётганига ишонгач, кузатув пунктига кирди-да,

немисларнинг окопларини синчилаб кузата бошлади. Комиловнинг ўзи кеча ташлаб чиққан бу окопларда немислар ҳар жой-ҳар жойга кичик-кичик гуруҳ бўлиб, тўпламоқда эдилар. Бундай ҳолларда улар қандай тактика тутиши Комиловга маълум эди. У бунаقا ҳужумларни кўп кўрган. Агар улар ўз принципларига амал қилишса, ҳужумни ҳозир артиллерия бошлаб бериши керак эди. Комилов ўз окоплари устига снаряд, мина дўли ёғилишини кутаётган эди, Баталов телефон қилиб:

— Комилов! Нонуштани тўхтат, тепангга фриц келяпти! — деди.

Дарҳақиқат, окопларда тўпланаётган кичик-кичик гуруҳлар бостириб келарди. Комилов, «Бизни ғафлатда қолдирмоқчи экан, бу абраҳлар», деб ўйлади-да, дарҳол взводларга нонуштани тўхтатиб, жангга шайланиши буюрди.

— Фрицларни бевақт чўчитиб юборманглар,— деди у қўшимча қилиб.

Комилов ўз ротаси бу сафар ғалаба қилишига амин эди.

Немис қўмондонлиги эса, ўзининг бу янги тактикаси билан «Кичик ер» ҳимоячиларини алдамоқчи ва бир ҳамлада Комилов ротасини ва ундан кейин Баталовнинг батальонини Донга думалатиб юбориб, Старо-Клетск хоторини эгаллаб олмоқчи эди.

«Кичик ер» мудофаачилари ромба шаклида қалъа ҳосил қилиб ётишиди. Немис штурмчилар ромбанинг энг ўткир қиррасидаги Комилов ротасига икки томондан ташланди. Штурмчи гуруҳлар Комилов окопларига яқинлашганида Баталов рация орқали қичқира бошлади:

— Комилов! Нега жим турибсан! Отмайсанми?! Ёки миномётчиларимни сайратиб юборайми?

— Үқ исроф бўлмасин деяпман, ҳозир!— деди-да,
Комилов рацияга қараб туриб, команда берди.— Огоны!
Ротадаги барча қурол ишга тушди.

Немислар икки окоп оралиғида ерга ётиб олдилар.

— Миномёт! Мана энди миномёт!— деди Комилов
рацияга.

Ротанинг окоплари олдида ётиб олган немисларнинг
орқасида биринчи мина портлади.

— Мўлжал тўғри!— Комилов рацияга қичқирди.

Биринчи ёрилган мина ҳовузчаси атрофида қоп-қо-
ра қалпоқчалар кўрина бошлади. Бу — батальон мином-
ётчиларининг иши эди. Кейин полк артиллерияси сайрай
бошлади.

Немис пиёдаси ҳамон икки окоп ва икки ўт орасида
ётарди.

Шу пайт «Кичик ер» ҳимоячилари устидан визиллаб
биринчи, иккинчи, учинчи снаряд ўтди. Кейин дарё
бўйида ҳам тўплар отилиб, дивизия артиллерияси немис-
лар томонга снарядлар ташлай бошлади. Комилов ку-
затув пунктидан дурбин билан атрофга қараган эди,
худди беҳисоб қора ва кул ранг булутлар ер бетини
қоплаб олгандай гунгурт бўлиб ётганини кўрди.

Шу чақ унинг кузатув пункти олдида чақмоқ чақди-
да, амбразура оғзида қоп-қора копток ёрилгандай бўл-
ди, тешикдан қора тутун қўланса ҳидни ичкарига бош-
лаб кирди. Комилов траншеяга югуриб чиқаркан, унинг
блиндажидан сал нарида яна битта граната порт-
лади.

Фашист штурмчилари унинг окопларига ташланмоқ-
да эдилар. Сал нарироқда Бекнинг взводи қўл жангি
олиб бораради. Комилов атрофга қараб улгурмай кузатув
пункти ерга чўкди, ёғочлари атрофга сачради. Ўзи-
ни панага олиб қолган Комиловнинг устига бир қопча
қоп-қора бўр тўкилди. Қаёқдандир Вафодор югуриб

келди-да, калта оёқлари билан унинг устини тупроқдан тозалашга кириши.

Комилов ротаси қадам-бақадам жанг қилиб, Старо-Клетск хутори чеккасига чекиниб борди. У ердаги уч туп олма шохлари синиб кетган бўлса-да, Ҳамдамов қабрининг пособнларидек тик туарди. Қабр атрофи снаряд ва миналардан ўнқир-чўнқир бўлиб кетган, ўзи эса ўқлардан илма-тешик бўлиб ётарди.

Баталов батальоннинг тирик қолган жангчилари билан хуторнинг жануб томонида тахминан бир километр фронтда жанг олиб борар, Комиловнинг ротаси уч олма дараҳтидан хутор қудуғигача тахминан юз эллик метр ерга маҳкам тармашиб олиб, гўё Ҳамдамовнинг жасадини ҳимоя қиласар эди.

— Ҳаммамиз шу ерга бош қўйсак қўямызки, Ҳамдамовнинг қабрини душманга оёқ ости қилдириб қўймаймиз! — деди-да, Комилов Мирзани чақириб, унга старший лейтенантнинг мозорини тузатиб қўйишни топширди.

Шу вақт қаёқдандир қабр бошида Марина пайдо бўлди. Унинг қўлидаги тувакда гул бор эди. Мирза гулини олмоқчи бўлиб қўлини чўзган эди, «ўзим» деди-да. Марина тувакни қабрининг бош томонига авайлаб қўйди ва бир лаҳза жим турди.

— Ярадорлар кўпми? — сўради Мирзадан.

— Битта ҳам қолмади. Ҳаммасини нариги соҳилга жўнатдик.

— Ваҳобовни ҳамми?

— Ваҳобовни ҳам. Лейтенант қаерда?

— Ярасини бинтлаяпти.

Марина энтикиб сўради:

— Нега «тиббий қисм уйи»га келмади?

— Ротадан жилиши мумкин эмас. У фрицларнинг такрор штурмини кутяпти.

XII

Доннинг чап соҳилидаги бутазор орқасида олтин исирғадай ой кўринди-да, осмоннинг қора денгизида аста сузиб, «Кичик ер» тепасига келиб тўхтади. Кўкда ой шуъласидан бўлак ҳеч қандай нур йўқ, ҳатто немисларнинг мушаги ҳам кўринмасди. Қўшни қисмлар, қўшни дивизия ва армияларнинг фронти ҳам жимжит эди. Бу жимжитлик кўпчилик қатори Комиловни ҳам ташвишга солди. Комилов шубҳага тушди. Балки душман унинг позициясига тунда ҳужум қилмоқчидир...

Шундай қилиб, Комилов жангчиларини бу кеча ҳам ухлатмади. Аммо ҷарчоқданми ёки ярасининг оғрифи босилдими, ярим кечага бориб ухлаб қолди. Марина тиббий қутичасини дори-дармонга тўлдириб, унинг олдига келганида у ширин уйқуда, янгигина қазилган окопнинг нам тупроғига бошини қўйиб, гўё она ер ҳидидан маст бўлиб, бир текис нафас олиб ётарди. Уни Вафодор қўриқлаб ётган экан, Маринани у танидими ёки унинг ёрдамга келганини тушундими, ҳар қалай Комиловнинг гимнастёркасидан тишлаб тортқилади. Бундан сапчиб уйғонган Комилов қаршисида Маринани кўриб ҳайрон қолди.

— Кечирасиз, уйқунгизни буздим,— деди узр сўрагандай Марина.— Сизни ярадор деб эшишиб, дори-дармон олиб келдим.

— Сизни ҳозиргина тушимда кўраётган эдим,— деб жилмайиб қўйди Комилов.

У ўзини дадил тутишидан ярадор кишига ўхшамас эди. Марина кўз қири билан унга разм солиб чиқди.

— Ярадор деб айтишувди,— деди.

— Қим айтди?

— Мирзадан эшишиб эдим.

Комилов қўшни окопга қараб, Мирзани чақирди. У

югуриб келди-да, Маринани кўриб, ҳанг-манг бўлиб қолди.

— Нега ағрайиб турибсан, Мирза, Маринани меҳмон қиласидиган ҳеч нарсанг йўқми?— деди Комилов.

Мирза дарҳол елкасидан плаш-палаткасини олди, ўртага газета ёзиб, устига муштдек бўлка нон билан тўрт чақмоқ рафинад қўйди, кейин лейтенантнинг сари-еф шиша банкасининг оғзини очди.

— Марҳамат, олинглар!— деди.

— Мирза! Термосни қара.

Мирза термос юқида қолган кечаги суюқ ошни котелогига ағдариб келди.

— Оз бўлса ҳам насиба.

Маринанинг биринчи марта жангчи котелогидан таом ейиши эди. Унинг қорни оч эканми ёки аскарларнинг таоми шунаقا ширин бўларканми, совиб қолган суюқ ошни маза қилиб ичиб олди-да, нима учун бу ерга келганини эслаб, Комиловдан сўради:

— Қаерингиз ярадор?

— Оёғим. Шунчаки бир... Юрса бўлади. Жангта мутлақо халақит бермайдиган енгил яра бу.

— Ким бинтлади? Собиров нариги қирғоқда-ку.

— Ўзим, кейин Мирза... Ўзингиздан гапиринг, Марина. Нега кетмадингиз?

— Аввал кетсам ҳам энди кетмайман. Ўз уйимни мудофаа қиласман.

— О, Марина, сиз жуда ботир қиз экансиз.

— Менга ишонсангиз, сиздан бир йўла учта илтимосим бор.

— Жоним билан, тиланг тилагингизни!— деди Комилов ҳазил қилиб.

— Мирзага айтинг — мени рўйхатга ёзиб қўйсин. Старшинага буюринг — менга ҳам котелок билан қошиқ

берсин. Ўзингиз эса, автоматингизнинг бирини менга беринг.

Комилов кулиб юборди.

— Ҳаммасини бирдан бажаролмайман-да. Масалан, котелок билан қошиқ — марҳамат, қанча десангиз бера-миз. Биринчи ва учинчи илтимосингиз қўлимдан келмай-ди. Ҳаққим йўқ. Негаки, биз партизан отряди эмасмиз, армиямиз.

Маринанинг нафси койидими, Комиловга тикилиб туриб, ундан жиддий ўпка қилди:

— Вафодор сиққан рўйхатга, мен сиғмас эканман-ми? Менинг шу кучукча ҳам қадр-қимматим йўқми?!

Комилов Мирзага қаради.

— Вафодарни нега рўйхатга ёздинг?

— Ёзмасам старшина овқат бермайди-да,— деди Мирза ўзини оқламоқчи бўлиб.

Комилов Маринага нима дейишини билмай, ерга қаради. Марина гапида қаттиқ туриб олди.

— Менга старшина овқат бермаса ҳам майли — уйимда емагим бор. Котелок, қошиқ ҳам керак эмас, Ҳамдамовнинг автоматини берсангиз бас.

— Ҳамдамовнинг автомати ўзимга керак-да,— деди Комилов ва бир лаҳза ўйлаб тургач, қўшимча қилди,

— Сизга ўлжа пистолетни бера қолай.

Марина пистолетга рози бўлди. У Комилов берган пистолетни белига тақиб олгач, санитар сумкасини Комиловнинг окопи ёнига жойлади ва Мирзадан бир варақ оқ қофоз тилаб олиб, унга «Медпункт» деб ёзди-да, траншея деворининг кўринарли жойига илиб қўйди.

Бу борада позицияларни текшириб юрган подпол-ковник Веселов пайдо бўлиб, Маринанинг қаршисида тўхтади ва Комиловни чақириб, «бу гражданка» ким ва нима учун траншеяда юрганлигини, унга ким рухсат қилганлигини сўради. Комилов воқеани унга ўз билга-

нича изоҳлаб берган эди, Веселов Маринага меҳрибон кўз билан боқди-да, унга бу ердан кетишини тавсия этди. Марина Собировнинг паромда ярадор бўлиб, госпинталда қолганини важ қилиб, кўнмади. Веселов: «Майли юраверсин, жангчиларимизга ҳарна мадад», деб кўнглидан ўтказди. Комиловга уни эҳтиёт қилишни топширди.

XIII

Эртасига, ўттиз биринчи июль тонготарида, гўё осмон ағанаб, ер портлаб кетгандай бўлиб, Маринани ширин уйқудан уйғотди. Маринанинг назарида ер ёрилиб, ундан беҳисоб лава отилиб чиқаётгандай эди.

— Нима бу? — сўради Марина Комиловга қараб.

— Жанг!.. Ҳақиқий урушни мана энди кўрасиз, — жавоб берди Комилов унга.

Марина икки қўли билан кўзларини тўсиб, окоп деворига суюнганича жойида қотиб қолди. Бу «ҳақиқий» уруш Маринадан анча нарида бораётган бўлса ҳам, жанг даҳшатидан оёқлари остидаги ер титрар, янги қазилган окопларнинг чеккаларидаги тупроқ траншеяларга тўкилади.

— Ўзингизни қўлга олинг,— деди Комилов дурбинда жангни кузатаркан.

— Нима бўляпти? — деб сўради яна Марина ўзини босиб олгач.

— Паулюс қўшинлари Калач атрофида асосий ҳужумга ўтди,— деб изоҳ берди Комилов дурбиндан кўни узмай.

Бу ерда ҳам ҳужумга ўтадими?

— Эсон бўлсанк кўрамиз...

Окопларда, пулемёт уяларида, артиллерия позицияларида жангчилар шайланиб, фашистларнинг бу участкада ҳам ҳужумга ўтишини кутишди.

Жанглар овози тобора узоқлашиб борар, узоқлашган сари оғир артиллерия авжга чиқарди. Қўқда эса, самолётлар худди уяси бузилган аридай тўзиб, Дондарёси атрофида фужгон ўйнарди.

— Нима бўлади, энди? — деди Марина яна.

Комилов бир оз жим тургач, бояги гапини такрорлади.

— Эсон бўлсак кўрамиз...

Маринанинг назарида немислар бу ҳужумда еру кўкни депсиб ташлайдиган даражада даҳшатли, важоҳатли эди. Шунинг учун Комиловнинг бу гапини шунчаки бир уруш кўрмаган қизнинг ваҳимасини босиш учун айтилган сўз деб ўйлайди. Комилов буни сезди-да, очишини айтди.

— Марина, — деди у қизга юзланиб, — Донни ҳам, Волгани ҳам немисга бериб бўлмайди. Донни вақтинча ташлаб кетган чоғимизда ҳам, Волгани мутлақо!.. Волгани унга бериб қўйсак, ҳаёт-мамотимиздан ажralамиз. Буни дўст ҳам, душман ҳам билади.

— Қўрқаяпман... жуда кучли кўриняпти...

— Кучлиликка кучли, — деди Комилов бир оз жим тургач.— Лекин биз ҳам заиф эмасмиз... Наполеон ҳам кучли бўлган. У ҳам дунёни титратиб кўрган эди...

— Кошки эди, Гитлер ҳам Наполеон янглиғ мағлуб бўлса...

— Бўлади!— деди Комилов ишонч билан.— Шу Донда ёки Сталинграднинг ўзида унинг қовурғаси синади!

Марина аста бош чайқаб қўйди.

— Ҳа, нима, ишонмаяпсизми, Марина? — деди Комилов унинг бош чайқашидан норози бўлгандай.

— Ишонаман. Лекин ақл бовар қилмайдиган жанглар бўляпти.

Комилов дала телефонининг трубкасини қўтариб, Баталовни чақирди. Баталов телефонга келди-да, ҳо-

зиргина рацияда қабул қилиб олган ахборатни Ко-
миловга айтиб берди. Унинг гапини эшитиб, Комилов
оқариб кетди.

- Нима гап? — Марина энтикиб сўради.
- Донни кечиб ўтибди, аплаҳлар.
- Энди нима қиласиз?
- Команда кутамиз.

Полк командири Веселов телефон қоқиб, баталь-
онлар, роталар, батареяларнинг командирларига
«маҳсус буйруқ бўлгунча турган жойларингизда маҳ-
кам туринг, бир қадам ҳам орқага чекиниш йўқ»,
деб буюрди. Комиловнинг ротаси ерга янада чуқурроқ
ўрнаша бошлади.

Кечга бориб, подполковник Веселов полк офицер-
ларини «Тиббий қисм уйи»га тўплади. Мариналарнинг
бу ота уйи ҳозир Веселовнинг штаби бўлиб, унинг хо-
налари столларга, йўлаклари телефон ва рацияларга
тўла эди.

Штаб бошлиғи, келишган ва чаққон майор сўнгги
радиограммани Веселовга топширди-да, унинг ёнига
ўтириди. Веселов радиограммага кўз югуртириб чиққач,
аста гап бошлади.

— Душман қўшинлари бизнинг қўшни армия райо-
нида Донни кечиб ўтиб, олға ва ёнга силжимоқда.
Сўнгги маълумотларга кўра, душман қўшинлари икки
юз—икки юз эллик километрча кенгликда ҳаракат қил-
моқда ва моторлашган қисмлари Сталинград томон то-
бора ичкарилаб бормоқда. Қалмиково—Қалач фронти-
даги қисмларимиз душманга катта талафот етказса
ҳам, фашистларнинг сиқуви остида Сталинградга че-
кинмоқда. Паулюс бир ҳамлада Волгага чиқиб олмоқ-
чи. Унинг моторлашган қўшинларининг «понаси» тобора
ингичкалашиб, ҳужуми фронтнинг торайиб боришидан
кўриниб турибдики, ҳадемай дармони қурийди. Биз-

нинг полк қисмларига махсус топшириқ бўлмагунча «Кичик ерни» қўлда маҳкам ушлаб туриш буюрилди. Бақт зиқ. Ҳамма жой-жойига борсин. Ўлиш бору чекиниш йўқ!

Командирлар штаб эшигидан чиқиб, окопларга тарқалиб кетишиди.

Окоп бошида Комиловни Марина билан Вафодор кутиб олди. Вафодор ундан совға кутгандай думини ли-киллатиб, қийшиқ қараб турарди. Комилов унга бир парча қанд ташлади-да, Маринани қўлтиқлаб олди ва унинг саволга тўла кўзига боқиб:

— Марина, ҳеч қаёққа кетмайдиган бўлдик, нашта-рингизни қайраб туринг, Гитлернинг думини шу ерда қирқамиз!— деб ҳазиллашибди.

Марина беихтиёр Комиловни қучоқлаб, «оғзингизга мой» дегандай лабларидан чўпиллатиб ўпиб олди.

Бу қайноқ бўса ҳароратидан бир умрга маст бўлган Комилов гурс-гурс қадам ташлаб, взводлар турган окопларга йўл олди.

XIV

Доннинг қуи оқимини кечиб ўтган душман қўшинлари «понаси»нинг наштардай ўткир, бигиздай нишли учи Сталинграднинг чап қанотида Волга дарёси соҳилига санчилгани ҳақида хабар олинди. Кейинча Паулюс қисмлари трактор заводи деворларига тармашаётгани маълум бўлди. Бундай хабарлар келавергач, Веселовнинг ҳаритасида Сталинград кўкрагида ит тилига ўхаш жой пайдо бўлди. Бу «ит тили»—Паулюс қўшинлари ишғол қилган ер эди. Ҳаритадаги вазиятга синчиклаб қараган киши яна бир бошқа ҳолатни ҳам кўриши мумкин эди. Сталинград кўкрагига қадалган немис «понаси»ни худди пўлат қайчи тишлаб тургандай, Веселовнинг полки эса, шу қайчининг тифидай турарди.

Бундан подполковник Веселов ўз полкнинг бу улкан жангларда тутган ўрни, ўйнайдиган ролини тушунарди. Фашист солдатлари Сталинград кўчаларига кирган, оғир саноатимизнинг гигантлари бўлмиш «Қизил Октябрь» ва «Баррикада» заводлари тош билан ғишт бўлиб тўкилаётган кунларнинг бирида Веселовни дивизия штабига чақириб, унинг полкини янги вазифалар кутаётганини ва бу вазифани бажариш учун унга бир ҳафта муҳлат берилажагини айтишди.

Бир ҳафталик муҳлат Веселовга дафъатан жуда кўпдай туюлди. «Сталинград тош бўлиб уйилиб, қон бўлиб оқаётган бир вақтда бир ҳафта кутишнинг нима ҳожати бор?» деб ўлади. Кейинча, асосий тайёргарлик ишларини бажаришга киришган вақтда, унга бир ҳафта озлик қилаётгандай бўлди. Негаки, унинг полкига янги аскар ва офицерлар келиб қўшилди, қўшимча қуроляроғ берилди. Янги одамларнинг лаёқати билан танишиб олиш, уларни муҳим ишларга шайлаш, янги хил қуролларни ўзлаштириш учун вақт керак эди, албатта. Лекин вақт эътибори билан Веселовни ташвишга солган нарса бу эмас эди. Ҳозир Веселовни унинг қаршисида турган кучнинг одами ва қуроли, уларнинг руҳи ва сифати қизиқтирас, буни билиб олмасдан туриб, муҳим вазифани бажариш қийин эди.

Подполковник Веселов полк парторгини штабга чақириб: «Янги келган кишилар билан гаплашмоқчи эдинг, сенга қанча вақт керак?» деб сўради. У «икки соат кифоя» деб эди, Веселов: «Шунча вақт ичиди нимани гапирасан, ўн иккю ноль-нолгача улар сенинг ихтиёрингда. Ҳозир ўн биру ноль-ноль», деди.

Шундан кейин полк командири ўз ҳузурига штаб бошлигини чақирди, унга тезликда бир-иккита «тил» топишни буюрди.

Полкнинг турли хизматлар бўйича бошлиқлари би-

рин-кетин Веселовнинг ҳузурига кириб чиқдилар. Ҳамма механизмлар бирдай ҳаракатга кирди. Навбат батальонларга келганда Веселов ишни роталардан бошлади. Унинг шундай одати бор эди. Катта ишни кичикдан бошларди. Веселов роталарнинг позицияларини бир неча бор кўздан кечирган, бутун мудофаа схемаси унга кафтдек аён бўлса ҳам, у ҳар бир қарич ерни командирлар, адъютантлар иштирокида гўё одимлаб ўлчагандек айланиб чиқди.

У Комиловни уч туп олма ўртасидаги қабр бошида учратди. Комилов қабр бошига янги гулдаста қўймоқда эди. Полк командирининг бу ерга келиб қолганинн кўргач, у фоз бўлди-да, рапорт бера бошлади.

— Ўртоқ подполковник...

Веселов дарҳол унинг сўзини бўлиб:

— Ишингни давом эттиравер, ўғлим, жуда яхши қиляпсан,—деди.—Ҳамдамовнинг бошида ҳар куни янги янги гулдаста кўраман. Бу сенинг ишинг экан-да...

— Рота жангчиларининг иши,—деди Комилов дарҳол.—Қолаверса, Марина шунаقا қиз...

— Ҳа, айтмоқчи, Маринани табрикли,—деди Веселов.—У тиббий ҳамшира қилиб тайинланди. Бу ёғини ҳам айтиб қўяй сенга. Марина билан тезроқ хайрлашиб қол, бўлмаса пушаймон бўласан. Полк врачи уни медсанротага олиб кетмоқчи...

Комилов Веселовни ҳеч қачон ҳозиргидай хушчақчақ кўрмаган эди. Унинг назарида доим жаҳл билан гапирадиган, салгина нуқсон учун ҳам одамларни аямай жазолайдиган қаттиқ қўл командир эди у. Ҳозир бутунлай бошқача. Унинг юзидан кулгу аримайди. Ҳозир у Комилов билан ҳазилкаш, дилкаш кишилардай гаплашар эди.

— Маринани сенга никоҳлаб қўяйми? Бутун полк иштирокида тўй қилиб бераман. Музикачилар ҳам те-

кин. Ватандошларинг миллий оркестрлари билан келишибди.

— Қимлар келди, ўртоқ подполковник?—қувнаб сўради Комилов.—Артистларми?

— Жангчилар. Хоҳласанг ҳаммасини ихтиёрингга юбораман. Жанг қилсанг ҳам мазза қилиб, музика билан жанг қиласан.

— Жоним билан!—деди Комилов.

Подполковник Веселов уни дўстларча қўлтиқлаб олди.

— Музиқачиларинг ротангга етиб келгунча менга музика билан жанг қиладиган майдонингни кўрсат.

Веселов олдинда, Баталов ўртада Комиловнинг позицияси томон юришди. Комилов энг орқада бормоқда эди. Веселов уни ўз ёнига чақириб олди.

Позициянгни яхши биламан, менга уни кўрсатмасанг ҳам майли. Сен мени немисларнинг ҳаракатини кузатадиган жойингга бошла.

Комилов уларни бутазорга бошлаб борди-да, тошҳаммом ичига олиб кирди.

— Кечки пайт шу ердан туриб кузатаман.

— Нега кечки пайт?

— Чунки кечки пайт қуёш ғарб томонга ўтади-да, окопларимизни ёритиб юборади. Бу ерга эса, қуёш тушмайди, аксинча қоронги бўлиб қолади. Бу ердан уларни бемалол кўриш мумкин.

Веселов дурбинда атрофга қаради-да, унинг фикри ни қувватлади.

— Яхши танлабсан. Эрталаб қаерда кузатасан?

— Эрталаб кузатувчимни дарахтга чиқазиб қўяман. Чунки қуёш тифи немиснинг кўзига тушади. Бу пайт у тепаликка қараёлмайди. Қундузига алоҳида жой ясатганман. Сапёрлар қуриб беришган.

Веселов ўша жойга бошлишни буюрди. Ҳақиқатан

ҳам Комиловнинг айтганича бор экан, кичкина қалъадай қурилган бу кузатув пунктидан қаршидаги душман позицияларини бемалол кўриш мумкин эди. Веселов дурбинни олиб, душман томонга бир оз қараб тургач:

— Буни қаранглар, нима чангияпти?— деб сўради.

Қуюқ чанг ҳавога кўтарилиб, баландда муяллақ турарди. Комилов дурбинга яқинлашмай туриб, жавоб қилди.

— Немис айёрлик қиляпти.

— Қанақа айёрлик?

— Баъзан машинага, баъзан отларга шох боғлаб олади-да, у ёқ-бу ёққа юргизиб, тупроқ чангитади. Немисларга катта мадад кучлари келяпти, деб неча бор адашганман.

— Кўзбўямачилик қилгани бу, дегин?

— Бу ерда немиснинг кучи камайиб қолганга ўхшайди. Шу билан бизни янгиштирмоқчи.

Подполковник Веселов дурбинини кўзидан олиб, филофига солиб қўйди.

— Унинг ҳамёнида қанча чақаси қолганини шу кече ёқ билиб олишимиз керак. Полк разведкаси кечаси шу ердан ўтади...

— Менга рухсат этинг ўртоқ подполковник, бу ишни мен бажараман!—деди Комилов честь бериб.

— Сенга ҳам иш топилади,—деди Веселов унинг елкасига уриб,—сенга ҳам фахрли иш топиб қўйганман. Ҳозирча камарни қаттиқ тортиб боғлаб, учала кузатув пунктингда ҳам кўзингни ўткир қилиб туравер.

Шу вақт оконда ранги-қути ўчган Марина пайдо бўлди-да, подполковникка шикоят қила кетди:

— Ўртоқ командир, бу нимаси? Мен бу ерни ташлаб, чап қирғоққа ўтармишман!

Веселов икки қўйини икки ёққа ташлади.

— Лейтенант Комилов ҳам шунақа деяпти, лекин мен полк врачининг ишига аралашолмайман.

— Нега аралашолмайсиз?—деди Марина кўзларини пирпиратиб,—бу ерга ўғил болани юборармиш. Мен қайси ўғил боладан камман? Нега қизларни камситади у полк врачи?

— Ҳа, бўпти, қолавер, қизим, музикачиларни ҳам шу ёққа юбораман. Лекин менсиз тўй бошлаб юборманглар,—деди Веселов ҳазиллашиб.

XV

Полк командири ротадан кетиб улгурмай, старшина пайдо бўлдида, Комиловга янги жангчилар келганини, уларнинг ҳаммаси «ўртоқ лейтенант»нинг ватандошлари эканини хабар қилди ва қувонч билан: «Ҳаммаси ҳам музикачи экан, ротамиз жуда хушчақақ яшайди» деди.

— Менга жангчи керак, музикачини нима қиламан?—деди Комилов унга қўрслик билан.—Артистларни полк клубига юборишишин.

Старшина кўзларини пирпиратиб турган эди, Комилов сўради:

— Неча киши экан?

— Ун саккиз киши, ўртоқ лейтенант.

— Ҳаммаси ҳам музикачи эканми?

— Ашулачи, ўйинчилари ҳам борга ўхшайди, музика асбоби тўрт-бештасида бор, холос. Лекин ҳаммаси қизиқчи экан. Биттаси гапирса ҳаммаси бирдан шарақлаб кулади. Жуда қувноқ йигитлар экан.

— Ҳали танишиб ҳам улгурдим дегин?

— Тўла танишиб улгурмасам ҳам старшинага лойиғини билиб олдим. Ҳаммасининг кийим-боши бутун, яроғи янги. Мендан ҳеч ким ҳеч нарса талаб қилаётгани йўқ, аксинча, олдимга мева-чеваларни тўкиб ташлаб, бур-

нимдан чиққунча меҳмон қилишди. Мана, ҳали ўзингиз кўрасиз, жуда ажойиб йигитлар экан!

Комилов старшинанинг феълини яхши биларди. У кўп гапиришни яхши кўрса ҳам, ёлғонни ишлатмас, лоф гапни ҳам гапирмасди.

— Бўлти, сенга ёққан бўлишса, қабул қилиб олавер, бир оздан кейин улар билан ўзим гаплашаман,—деди.

Комилов полк командирининг топшириқларини дарҳол взвод командирларига етказиш мақсадида эди. У икки взводга кириб чиққач, Бекнинг олдига борди. Бек сумкасини бошига қўйиб, шинели билан автоматини қулоқлаб, пишиллаб ухламоқда эди. Комилов унинг ҳорғин юзларига раҳмдил қараб, юмшоқ хуррагини бир оз тинглаб турди-да, уни ўйғотишга кўзи қиймади.

У охириги взвод командири билан гаплашаётган вақтда жарлик биқинида миллий музика янгради, ўзбекча ялла эшитилди.

«Старшинанинг иши бу,—деб ўйлади Комилов.—У мени музика билан чақиряпти».

Орадан кўп вақт ўтмай тарона эшитилаётган жойда мина ёрилди. Орқасидан яна бири портлади. Учинчиси Дон қирғонида тутун чиқариб, сўнди.

Комилов бутазорга келаркан, старшина овозининг борича қичқирди:

— Встать! Командир келяпти.

Бутазорда газеталардан ёзилган катта дастурхон, усти тўла қуруқ мева, унинг атрофида дутор, тамбур турибди, доира ғилдираб юрибди.

— Жангчилар қани?— лейтенант старшинадан сўради.

— Ҳаммаси шу ерда,—деди старшина атрофни кўрсатиб.

Буталар тагидан, дарахтлар остидан, чуқурлик ва хандақлардан бирин-кетин кийимларининг чангини қо-

қиб, ёш жангчилар чиқа бошладилар. Уларнинг баъзи-
лари командирдан уялгандаидай ўз-ўзидан кулар, баъзила-
ри жим, айримларининг ранги оппоқ оқарган эди.

— Буларни саф қил!—деди Комилов старшинага.

Старшина «сафлан!» деб қичқирди ва сафда ўн сак-
киз ўрнига ўн етти жангчини кўриб, ҳайрон бўлди.

— Бир киши етмайди, ўртоқ лейтенант,—рапорт
қилди старшина.—Ҳали шу ерда эди.

— Ким у? Қаёққа кетди?

Сафдаги жангчилар бир-бирларига қараб олишди.

— Ана, Марина бошлаб келяпти!—деди старшина
бутазорга қўл чўзиб.

Бутазор четида Марина кўринди. У пешанаси боғ-
лиқ жангчини қўлтиқлаб келмоқда эди. Ҳали уруш кўр-
май, ярадор бўлган жангчи ўртоқларининг олдига ке-
лиши ҳамон Marinанинг қўлидан чиқиб, сафга туриб
олди.

— Ярадор Аҳмедов, сафдан чиқинг,—деди старши-
на.—Санқисмга боринг.

— Мен ярадор эмасман,—деди бояги жангчи саф-
дан чиқиб.—Минадан беркинаман деб бошимни дарахт-
га уриб олдим...

Комилов гувоҳлик сўрагандай Marinага қараган
эди, у жангчининг гапини қувватлади.

— Шилингдан жойига чанг кирмасин, деб бинтлаб
қўйдим,—деди Марина.—Етаклаб келганимнинг сабаби
шуки, унинг боши дарахтга қаттиқ тегибди, шундан кў-
зи тинган бўлса керак..

Комилов сафдаги жангчиларининг ҳар бирига синчик-
лаб разм солдида, старшинага буларни пана жойга ёт-
қизишни буюрди.

Ҳамма, чордана қуриб, жим ўтиради. Комилов ҳам
уларнинг ёнига ўтириди-да, ҳаммага бир-бир қараб ол-
ди. Унинг синовчан кўз қиридан баъзилар қизариб, баъ-

зилар оқариб турарди. Аҳмедов эса, бошини ердан кўтаролмасди.

— Бу ерга қаердан ва нима учун келдиларингиз?

Комилов ўзининг бу саволига ҳар бир жангчининг шахсан юрак жавобини эшитмоқчи эди. Унинг бу саволига дафъатан ҳеч ким жавоб қилишга ботинмади. Боядан бери ерга қараб ўтирган Аҳмедов кўзи толиб, бўйни оғриди шекилли, бошини кўтариши ҳамон кўзи лейтенантнинг кўзига тушди-ю, гўё бу лейтенант ўз саволига шахсан Аҳмедовдан жавоб кутаётгандай бўлиб туюлди.

— Биз ўзбек бригадасида эдик. Бригадани тарқатиб, ҳар кимни ҳар қаёққа юборишиди. Биз шу дивизияга келдик,—деди у бамайлихотирлик билан.

Комилов бунга қаноатланмагандай, унинг ёнидаги жангчига қаради.

— Менинг номим Бобоёр, отамнинг номи Ҳайдоёр. Бухоро областидан фашистни қиргани келганман!

— Сен-чи?—деди Комилов шеригига.

— Нормурод Ҳайтов бўламан, ўртоқ лейтенант. Сармарқандда туғилиб, Богишамолда ўсганман. Мен ҳам жанг қилгани келганман!

Комилов «Сен-чи?», «Сен-чи?» дегандай ҳаммага бир-бир қараб чиқди. Унинг кўзи кимга тушса, ўша ўрнидан туриб, ўзининг номаи аъмолидан бир шингил айтиб берарди. Давранинг энг охирида икки йигитга навбат келганида улар бирданига оёққа туришди-да, ўзларини таништиришиди. Уларнинг бири андижонлик Файзиев, иккинчиси—фарғоналик Мусабеков бўлиб, бири дуторчи, иккинчиси доирачи экан. Ҳаммаси ҳам бир оғиздан жанг қилгани келганини айтди.

Комилов старшинага:

— Буларни уч туп олма тагига бошла!— деб буюрди.

Старшина «сафлан!» деб улгурмай ҳар ким ўз музика асбобини олаётган эди, Комилов:

— Отставить!—деди-да, қўшимча қилди:—Биз бадий ҳаваскорлик концертига кетаётганимиз йўқ. Музика асбобларини старшинанинг ўзи йиғиштириб олади. Сталинград фашистлардан топ-тоза қилингандан кейин эга-эгасига қайтариб беради.

Старшина сафни уч туп олма тагига олиб келди-да, Комиловнинг фикрини уқиб, уларни Ҳамдамовнинг қабри олдида тўхтатди. Янги келганлар қабр бошидаги гулларга боқдилар. Қимдир қабр бошидаги тахтачага ёзилган ёзувларни ўқиб, ўзини тутолмай қичқириб юборди:

— Бу менинг тоғам-ку!.. Тоғам бўлади, ўртоқ лейтенант!

Бу жангчи Мусабеков эди.

Комилов ўзини Ҳамдамовнинг жияни деб эълон қилган жангчини бир қадам олдинга чиқарди-да, ёнига турғизиб олиб, ундан сўради:

— Тоғанг қандай одам эди?

Мусабеков аста гап бошлади:

— Тоғам, Ҳамдамов, анорзорда ўсган. Лекин, пахтакор агроном эди. Қишлоқда барча ёшу қари уни «Агроном Ҳамдамов жуда яхши одам, одамохун!» дер эди. Тоғамнинг бу ерда ётганини эшитсалар, бутун қишлоқ қора кияди...

— Старший лейтенант Ҳамдамов ботир, баҳодир командир эди. У Сталинград учун жангларда Дон чўқисига қаҳрамонона бош қўйди. У шу қабрга ётиши олдидан 115² дўнгликни душмандан қайтариб олишни васият қилган эди. Ҳамдамовнинг қабри бошида қасамёд қиласизки, унинг васиятини ботирлик, баҳодирлик билан адо этамиз!

— Қасамёд этамиз!

Комилов шу билан ўзининг янги, ёш жангчилари

орасида қиласидан дастлабки тарбиявий ишини бажарилди, деб ҳисоблади-да, уларни биринчи взвод командири Бекнинг ихтиёрига юборди.

XVI

Тонг отиб, қүёш Дон соҳилидаги дўнгликларга заррин нурини тўкмоқда. Оғир мудофаа жангларидан кейинги «жимжитлик»нинг иккинчи ҳафтаси. Кеча-кундуз жанглар давом этган вақтда ҳафталааб уйқу нималигини билмаган Комилов мана энди туни билан бемалол ухлар, Мирза уни нонуштага чақириб, қошиқ билан котелокни тарақлатганида ёки душман снаряди унинг атрофида тўсатдан ёрилганида уйғонарди. Бу тонгда Комилов Мирзанинг қошиқ сигнали, душман артиллериясининг окоп яқинида ёрилган снаряди овозидан эмас, балки илиқ нафас ҳарорати, оталик меҳридан уйғонди. Унинг қаршисида полк командири Веселов турарди.

Комилов сакраб ўрнидан турди-да, ҳарбий одоб билан честь берди.

— Ўртоқ подполковник, биринчи рота...

Веселов унинг похол тўшагига ўтириди, чўнтағидан «Беломор» олди, гугурт чақди, тутатиб чекди.

— Сенга папирос тутмаяпман, ҳали нонушта қиласидан кўринасан,—деди подполковник лейтенантга.—Наҳорда чекиш ўпкага зарар.

— Мен чекувчи эмасман,—деди Комилов.

— Чилим чекармидинг? Аслида папиросдан чилим яхши, дейишади, тутун чилим сувида тозаланиб чиқиб, ўпканни доғламасмиш.

— Чилим ҳам чекмаганман, ўртоқ подполковник.

— Папиросларни нима қиляпсан, бўлмаса?

— Сақлаб юраман-да, кашанда жангчиларга улашиб бераман.

— Ҳа, бу ишинг ҳам яхши. Битта чой буюр, лейтенант, негадир чанқаб турибман.

Комилов подполковникнинг олдидан чиқиб, ювиниб, тараниб, ҳатто соқолини тарашлаб олган ҳолда тунука чойнакда қайноқ чой кўтариб кирди. Чойнакдан аччиқ кўк чойнинг хуш бўйи тараларди.

— Ийе, кўк чой-ку. Қаёқдан топдинг буни дарров?— деб сўради Веселов.

— Ҳамشاҳарларим олиб келишипти. Бир пачкасини старшинага тақдим қилишган экан...

— Жуда мазали чой бўпти,—деди Веселов бир кружка чойни бўшатиб.—Буни ким дамлади?

— Ўзим дамладим, ўртоқ подполковник.

— Чой дамлашга уста экансан. Мен ҳам чойни бирорвга ишонмайман, ўзим дамлайман... Айтмоқчи, бу янги йигитчалар қалай экан? Жангга ярайдиларми?

— Ярайди.

— Борди-ю, эртагаёқ «атакага йигитлар!» десанг, тайёрми улар?

— Тайёр, ўртоқ подполковник. Мен уларни икки марта синаб кўрдим. Ҳақиқий жангда бир қовуриб олдим.

— Ундай бўлса харитангни ол, ўғлим, мен сенга иш топиб қўйдим.— Комилов планшетдан харитасини олиб, ёғочдан қилинган ясама столга ёзиб қўйдид-да, Веселовнинг кўзига боқди. Веселов чойнакни бўшатгач, Комиловнинг ёнига, тахта скамейкага ўтирди. У ўз гапини топшириқдан эмас, вазиятни уқтиришдан бошлади. Унинг гапидан маълум бўлишича, Сталинградда вазият тобора оғирлашмоқда, немислар айрим жойларда Волгагага чиқиб олиб, Сталинград ҳалқасини тобора қисиб бормоқда эдилар.

Веселовнинг гапидан Комиловга яна бир нарса маълум бўлди. Дон бўйига янги совет қўшинлари келмоқда экан. Бу хабардан Комилов қувониб кетди.

Подполковник унга ҳамма янгиликларни айтиб бергач, 216-полк қаршисидаги немис кучлари ҳақида гапирди. Йигитлар шу кеча бир эмас, уч жойдан «тил» ушлаб келишибди. Улар берган маълумотларга қараганда, Веселов полкининг қаршисида немисларнинг 79-пиёда аскарлар дивизияси, ёнида эса, Руминия полки жойлашган. Веселов полкига қарши фронтда битта ҳам немис танки йўқ, аммо тўп ва миномётлар етарли экан. Комиловнинг харитасида ҳануз унга маълум бўлмаган белгилар пайдо бўлди. Булар немисларнинг узоққа отадиган батареялари жойлашган нуқталар эди. Бу нуқталар бугун-эрта ҳаракат бошлаб, Дон бўйига тўпланаётган қўшинларимизга зарба бериши, ҳатто, ҳарбий эшелонлар келаётган темир йўлларни ишдай чиқариш хавфи бор эди. Олинган ва текшириб аниқланган маълумотларга кўра, уларниг кузатув пунктлари Комилов ротасининг тумшуғида—115² дўнглигига эди. Веселев мақсадга кўчди, харитадаги 115² тепалигига қизил қаламда белги қўйиб: «Немисларни мана шу тепаликдан қувиб чиқарасан-да, у ерни маҳкам эгаллаб турасан», деди.

— Вазифа аниқ, ўртоқ подполковник,— деди Комилов.

— Бугунча тайёргарлик кўр, атакани эрталаб бошлиниг керак. Полк артиллерияси сенга мадад бериб туради.

— Тушундим, ўртоқ подполковник!

Подполковникни кузатиб қўйгач, Комилов ўзининг энг яхши кузатув пункти бўлмиш дараҳт каллагига чиқди. Унда Эрдонон кузатувчилик қилмоқда эди.

— Эрдонон, фрицларини нима билан машғул?

— Дўнгликлар орқасидаги жарликларга оғир тўплар ташияпти. Артиллериистлар кўрмаяптимикан буни?

— Улар ҳам кўриб туришгандир.
— Нега тек туришибди бўлмаса? Уларга айтиб қўйайми?

Комилов ижозат берди.

Эрдонов полк артиллериясининг кузатувчилариға «зуммер» билан телефон қоқди.

— Зуммер бераётган ким бу?!— деб ўшқирди кузатувчи-тўпчи.

— Мен, пиёдаман. Ҳей артиллерия, қаёққа қарайсан, 115² дўнглигининг орқасига бир қараб қўй, ошнам!..

— У ёқда нима бор экан?

— Қарасанг кўрасан, кўрган-кўрмаганингни тўтикушингнинг сайрашидан билиб оламан.

— Бопладинг,— деди Комилов Эрдоновга.

Ҳаял ўтмай, Доннинг нариги юзидан оғир тўпларнинг гумбур-гумбури эшитилди ва Эрдонов тахмин қилган жойларда ёрилган снарядларнинг қоп-қора тутуни кўринди.

Комилов командирлик ҳаётида энг масъулиятли ва шу билан бирга ғоят оғир дақиқалар бошланди. Кечга яқин взвод командирларини, ротасини кучайтириш учун берилган миномётчилар, пулемётчилар ва сапёрларнинг бошлиқларини бўлажак жанглар жойини ўз кўзлари билан кўриб олишлари учун рекогнассировка деб атальмиш кўрикка олиб борди. Бу ерда кимнинг взводи қачон, қаерга тўпланиб, қаердан, қанча куч билан қайси мўлжалга уриши ва қайси маррага бориши, ким-кимга кўмаклашиб, мадад бериб туриши сингари ва кутилмаган ҳодисалар юз бериб қолганида қандай сигналлар бериш каби ҳамма катта-кичик масалалар келишиб олинди. Шундан сўнг, калта-калта савол-жавоблардан кейин командирлар соатларини Комиловнинг соатига тўғрилаб олиб, жой-жойларига тарқалишиди.

XVII

Комилов барвақт уйғониш мақсадида эртароқ ётди, лекин ҳадеганда уйқу келавермади. Унинг мийси бўла жак жангларнинг икир-чикирлари билан банд эди. Ке йин хаёл уни подполковник Веселов билан бўлган сухбатга олиб кетди: «Нега полк командири Веселов бир ўзи унинг олдига келди-ю, комбат Баталовсиз мустақил бажарадиган жанговар иш топширди. Баталовга ишонмаганими ёки Баталов ҳам госпиталга тушиб қолдими? Йўқ, Баталов соғ эди, унга яқиндагина Мирза рапорт элтиб берувди».

Жанг олдидан тўйиб ухлаб олиш ниятида бўлган Комиловнинг кўзи юмилган эди, унинг димогига ипакдай юмшоқ ҳид урилиб, кўзлари очилиб кетди.

— Марина!

— Салом, ўртоқ лейтенант,— деди Марина.— Сизни кўрмоқчи эдим, уйғотиб юборасиз деб, Мирза сира олдингизга йўлатмади.

Комилов Маринанинг кўришиш учун узатилган қўлини анча вақтгача ушлаб турди-да:

— Нега ухламаяпсиз, Марина?— деб сўради.

Комилов «Марина» исмини шундай майнин, шундай ёқимли оҳангда айтдики, гўё унинг оғзидан бол томгандай бўлди. Унинг бу мулоийимлигини йигитнинг хуш табиатли эканидан деб билган Марина ўз навбатида унга ҳам худди шундай майнин табассум билан жавоб қилди.

— Сизга яна шикоят билан келдим.

— Қандай шикоят экан?

— Бу сафар ҳам ўша полковой врач устидан шикоят. У мени тинч қўядими, йўқми?

— У ҳам нима қилсин, сизни яхши кўриб қолгандир-да.

— Яхши кўрган одам бунақа номаъқул иш қилмайди-да.

— Қандай номаъқул иш қилди у?

— Ҳали ҳам ўша гап, госпиталга чақиртиряпти.

— Ундай бўлса полк врачи ҳақ. Мен ҳам унга қўшиламан.

Комилов қизнинг юмшоқ қўлларини кафтига олиб, унинг бармоқларини аста силаркан:

— Марина, ногаҳоний ўққа учиш ҳеч гап эмас. Сизнинг ёниб турган оловга киришингизни истамайман!

— Сизни ёлғиз қўйишини мен ҳам истамайман.

Марина унинг меҳрибон кўзларига боқиб тўймас, гўёундан најкот кутгандай бутун қалби билан маҳтал бўлиб турарди. Комилов буни сезиб турса ҳам, аниқ бир жавоб бергиси келмади. У яна Маринанинг қўлини ўзининг қайноқ кафтига босиб, тикилиб турарди. Уларнинг кўзларигина гаплашарди. Маринанинг илтижоли кўзларига Комилов бардош беролмади.

— Тўғрисини айтсам, ярадор бўлиб қолишингиздан қўрқаман. Бугунги жанг унақа-бунақа жанг бўлмайди. Яхшиси менинг олдимга жангдан кейин боринг.

Марина Комилов гапининг мағзини чақиб туриб, унга ён берди.

Комилов, энди бораверинг, дегандай қизнинг қўлини кафтидан бўшатиб юборди. Маринанинг кетгиси йўқ эди. Комилов қўл соатига қаради:

— Ҳайдаманг мени,— деди қиз.— Яна бир дақиқа, ярим дақиқа...

— Нега менга бундай қарайпсиз, Марина?— деди Комилов унинг хомуш бўлиб қолган кўзларига боқиб.

— Шундоқ, ўзим...— деди Марина бошқа гап тополмагандай, кейин қўшимча қилди.— Ўзингиз ҳақингизда ҳеч нарса демадингиз...

Комилов яна соатига қаради.

— Урушдан бошқа ҳеч нарсани кўрганим йўқ, Марина. Партадан айрилиб, кўзимни китобдан кўтаришим билан фронтни кўрганман. Мана энди сизни кўряпман... Ҳамдамов кўп нарсани кўрган эди. Лекин ўшандай одам ҳам армонда кетди...

У ўрнидан туриб, автоматини елкасига осди-да, «кўришгунча хайр» деб блиндаждан чиқди. Марина уни кузатаркан, бирдан бўйнидан қучоқлаб, кўзини юмиб туриб, қайноқ лабидан бир сўриб олди, кейин унга ғала-ба тилаб кузатди.

— Тепаликда учрашгунча хайр,— деди Комилов кетаркан.

Марина Комиловнинг кетидан бир оз юриб борди-да, Бекнинг взводига қайрилиш жойида тўхтади. У андак жим тургач, қўлини силкита-силкита орқасига қайтиди.

Комилов биринчи взводга келганида, Бек жангчиларини окопга тўплаб, уларга нималарнидир ўқиб эшиштирмоқда эди. Комилов тўхтаб қолди. Маълум бўлишича, Бек ҳар сафар қилганидек бу сафар ҳам жанг олдидан ўз йигитларига ўзбек халқининг фронтдаги жангчи—фарзандларига ёзган, уларни баҳодирликка чақириувчи оташин мактубини ўқимоқда экан.

Жангчилар жонажон халқларининг ҳар бир топширигини эътибор билан тинглардилар. Уларга қўшилиб Комилов ҳам халқ наказини, илгари бир неча бор ўқинган бўлса-да, тик туриб тинглади. Бек мактубни ўқиб бўлгач, муқаддас сўзлар ёзилган газетани аста буклаб, планшетга солиб қўйди-да, Комиловга қисқагина қилиб рапорт берди:

— Биз тайёрмиз, ўртоқ лейтенант!

Комилов Бек билан кеча кечқурун рекогнассировка вақтида гаплашиб олган гапларни такрорлаб, атака икир-чикирларини янада батафсилоқ аниқлаб олишиди,

Кейин Комилов ғоз туриб, ҳарбий честь берган ҳолда буюрди:

— Бошла, Бегим!

XVIII

Марина Комилов ротаси жангларининг бошланишини кутиб, мижжа қоқмай тонг оттирди. У жангларнинг қандай бошланиб, қандай давом этишини қанчалик тоқатсизланиб кутган бўлса, Комиловдан бирор яхши хабар келишини шунчалик орзиқиб кутди. Жанглар одатдагидек тўплар кетидан тўплар гумбурлаб, кейин миномётлар чақмоғи билан бошланди. Марина Комиловнинг кузатув хонасига кириб олиб, юрагини ҳовучлаганича жангга узоқдан қараб турди. Унинг назарида Комиловнинг бу жангни Маринанинг шу чоққача кўрган ва эшигтан жангларининг ҳеч бирига ўхшамасди. Кичкина амбразурага қадалиб турган мовий кўзларига ҳар икки томон замбараклари ҳам гўё бир жойга — Комилов ротаси ётиб олган жойга отаётгандай, ҳар икки томон ташлаган миналар ҳам худди Комиловнинг устида портлаётгандай бўлиб кўринарди.

Бунинг устига Комиловнинг йигитлари қилдими ёки немисларнинг ўзи ёқдими — жанг бораётган жойда бир неча тутун шашкалари бурқаб кўкка кўтарилиди-да, жанг майдонига қоп-қора чиммат ташлаб қўйди. Бу қоронғилик ичида нима бўлаётгани оддий кўзгагина эмас, дурбинда ҳам мутлақо кўринмасди. Шу сабабдан Марина ёш оқаётган кўзларини икки қўли билан маҳкам тўсиб олди.

— Нега йиғлаяпсан, Марина? — деди орқадан бир таниш овоз.— Ботир қизман, жанглардан қўрқмайман, деган эдинг-ку. Қўрқма, Комилов немисларни бу ёқقا яқинлаштирамайди.

Марина подполковник Веселовни кўриб, шошилиб сўради:

- Нима, немислар контратакага ўтдими?
- Иўқ, Комилов атака қиляпти.
- Демак, бу чанг билан тутун Комиловники?
- Комиловники!
- Хайрият!

Шу пайт икки алоқачи темир ғилдиракларини шариллатиб келдида, Веселовнинг оёғи остидаги телефон аппаратига сим улади.

— Ўртоқ подполковник, лейтенант Комилов билан алоқа тикланди,— деб рапорт берди улардан бири.

Подполковник Веселов унга:

— Аппаратга Комиловнинг ўзини чақир,— деб буюрди.

Телефонист трубкага:

— Олов! Олов!.. Мен Дурбин, мен Дурбин! Оловнинг ноль бирини Дурбиннинг ноль бири чақиряпти,— деди.

Ҳаял ўтмай трубкада Комиловнинг овози жаранглади.

— Ўртоқ Дурбин, мен Оловман. Эшитаман.

Марина телефон трубкасини қучоқлаб олгиси келди, лекин Веселов уни трубкага яқинлаштирамади.

— Вазиятни гапир, ўғлим. Қаердасан ҳозир?

— Үнг қанотим ноль бешда, чап қанотим ўттиз иккю олтини тешяпти. Бошим ўргимчак уясида...— деди Комилов «код» деб аталмиш сирли сўзлар билан раҳорт бериб.

— Муваффақият тилайман сенга!— деди Веселов, кейин қўшиб қўйди.— Босавер, ўғлим!

Немисларнинг окоплари устидаги туман кўтарилиди. Жанг бораётган жойларни бемалол кўриш мумкин эди. Веселов кузатув пунктига ўрнатилган стереотруба ор-

қали вазиятни кузатаркан, жангнинг боришидан мамнунлигини яширолмади-да: «Баракалла Комилов!» деб қўйди. Бу гап Маринага жуда ҳам ёқиб кетди. Комиловнинг авангард взводи немис мудофааси тиканли симлар ғовини кесиб ўтиб, унинг окоплари ичидаги жанг қилмоқда эди. Веселовнинг назарида немис окопларида найза жангни эмас, қўл жангига, ҳақиқий муштлашиш бормоқда эди. Гоҳ қўндоқ ярқирап, гоҳ пичоқ тифи ялтирап, баъзан найза ишга тушарди.

Шу вақт телефонистлардан бирини трубкадан нималарнидир ёзиб олиб, полк командирига топширди. Веселов унга кўз югуртириб олгач, Маринага:

— Мана энди сенга ҳам иш кўпайяпти,— деди.— Ҳозир ярадорлар келади. Уларни санитарлардан қабул қилиб олиб, медсанротага ўзинг етказасан.

Марина траншеяда замбил кўтарган санитарларни кўриб, ташқарига чиқди.

Замбилда келтирилаётган ярадорлар Комиловнинг ёш жангчиларидан бўлиб, улар тиканли симлардан ўтиш вақтида пиёдага қарши қўйилган душман миналаридан яраланишган, уларни Собиров зудлик билан медсанротага пешма-пеш жўнатмоқда экан.

Марина ҳам уларни «дастлабки ёрдам» медицина тадбирларидан ўтказди-да, Дон бўйига бирма-бир жўната бошлади. Дон бўйида эса, полк врачанинг шахсан ўзи чап қирғоқдаги медсанбатга жўнатиб турди.

Кейин қўл жангига яралангандардан ҳам икки кишини олиб келдилар. Уларнинг бирини Маринага таниш Аҳмедов эди. Узоқда портлаган минадан қочиб, бошини ёриб олган бу йигит жуда мардона жанг қилгани, икки немисни бир ўзи чавақлаб ташлагани ҳақида санитарлар Маринага ҳикоя қилиб беришиди. Марина унинг найза санчилган сонини спиртда тоза-

лаб, бинтлаб улгурмай Аҳмедов яна жангга қайтмоқ-ка отланди.

— Нега? — деб сўради Марина. — Ярангиз тузал-масинми?

— Соним яра, холос, қўлларим бут-бутун! — деди Аҳмедов.— Бу қўллар ўқ отиб, граната улоқтиришга ярайди ҳали...

Марина бир оз ўйлаб турди-да, Аҳмедовни Комиловнинг олдига ўзи етаклаб борадиган бўлди.

— Сиз у ёқقا борманг,— деди Аҳмедов.— Иўлни немис мергани ўқقا тутиб, кўз очирмаяпти.

— Сизлар ўша йўлдан келдиларингизми?

— Немисга чап бериб ўтдик-да.

— Биз ҳам худди ўшандай чап бериб ўтамиз, — деди Марина ва қатъий буюрди: — Бошланг!

Аҳмедов ноилож Маринанинг олдига тушди. Улар бирин-кетин Комилов ротасининг эски траншеялари билан хиёл энгашиб боришиди.

Траншеянинг кўп жойлари снаряд портловидан бузилган, айrim жойлари ҳатто тупроқса кўмилиб кетган эди. Олдинда оқсоқланиб бораётган Аҳмедов снаряд, мина парчалари сочилиб ётган бўш гилзаларни босиб ўтаркан, тўхтаб, Маринага:

— Шу ерда тўхтанг, мен ўтиб оламан, кейин сиз ўтасиз, — деди.

Марина ўзини панага олиб, Аҳмедовнинг эмаклаб ўтишини кузатди. Аҳмедов траншеяда бир оз эмаклади. Траншея тугагач, у Комиловлар ўрнатган тиканли сим тўсиқ олдида пайдо бўлди. Бу тўсиқдан шу куни кечаси Веселовнинг сапёрлари уларга йўл очиб берган ва немис сапёрлари бу жойни мўлжалга олиб қўйиб, у ердан ўтганни ўқقا тутарди. Аҳмедов пойлаб туриб бир сакради-да, чуқурликка тушиб олди. Унинг атрофика икки ўқ чувиллаб, бири орқасида, иккинчиси олдида

тупроққа кириб йўқ бўлди. Аҳмедов яна икки марта сакраб, эсон-омон чуқурликка ўтиб олди.

— Марина опа! — деди у чуқурликдан аста бош кўтариб. — Мен қандай ўтган бўлсам, сиз ҳам худди шундай қилиб ўтинг.

Шу он унинг боши устидан устма-уст уч ўқ ҳуштак чалиб ўтди-да, тиканли симлар орасига кириб, гумдон бўлди.

Марина Аҳмедовдан кўра чаққонроқ сакради. Шунинг учун немис мергани уни қорага олишга улгурмай, битта ҳам ўқ узолмай қолди.

— Энди тезроқ бу ёққа ўтиб олинг! — деди Аҳмедов қўли билан имлаб.

Снайпернинг кўзи уни пойлаб турган экан, ўқлар окопдан кўринган қўй ёнидан ўта бошлади.

— Ўтинаман, бу ёққа ўтманг! — деди Аҳмедов Маринага.

Олдинда калта-калта, тасир-тусур отишма бормоқда эди. Унинг овозидан Аҳмедов билдики, окоплар ичидаганг кетяпти.

Аҳмедов бруствердан аста мўралаб, жанг бораётган томонга разм ташлади, снайпернинг ўқлари унинг атрофига келиб, ерга санчила бошлади.

— Марина опа! — деди Аҳмедов, — мен бу снайперни йўқ қилмагунимча ўрнингиздан жилманг, мен ҳозир...

XIX

Немислар Комилов ўйлагандан ҳам қаттиқроқ қаршилик кўрсатмоқда эди. 115² дўнглигини йўқотиш — бу участкада Дон соҳилини назорат қилиб туришдан маҳрум бўлиш демак эди. Шунинг учун ҳам улар жон-жаҳдлари билан шу бир парча жойга ёпишиб олган эдилар. Бу дўнгликни уларнинг панжаларидан

ажратиб олмаслик бизнинг қисмларимиз учун ҳам гуноҳ эди. Тепалик қўлга олинса, у ерда Доннинг ўнг кирғоидаги соҳилда ҳарбий ҳокимлик қилиш осоп бўлардий. 115² тепалигининг икки ўртада шу қадар катта талаш бўлишининг сабаби ана шунда эди. Немислар уни қўлдан бермасликка қанчалик интилсалар, Комилов ҳам уни қўлга киритишга шунчалик қаттиқ киришди.

Комиловнинг ротаси биринчи атакадаёқ немисларнинг олдинги позицияларини емириб, уларнинг линиясига кириб олган эди. Немислар ўзларини ўнглаб, Комиловни окоплардан сурib чиқармоқ учун қарши атакага ўтдилар. Уларнинг атакаси вақтида Комилов олдинги жанг тактикасини ўзгартириб, уларни қўл жангига олиб боришга мажбур қилди. Немисларнинг қўл жангига унча хуши йўқ эди. Аммо кейинги вақтда бу хил жанг усулини ҳам қабул қилишга мажбур бўлишди. Комилов ротаси ҳозир душманга таклиф қилган қўл жангига аввалги жангларга сира ўхшамас эди. Немислар ўз окопларида осиёча қўл жангига дуч келиб, довдираб қолишли. Чунки Комиловнинг жангчилари ҳам миљтиқ, ҳам пичоқ билан жанг қиласарди. Улар гоҳ қўндоқ билан урап, гоҳ мушт туширади. Немислар ҳеч вақт бундай «бетартиб» жангни кўрмаганликлари учун ўзларини йўқотиб қўйиб, ким-ким билан сўқишаётганини айиролмай гангиг қолиши. Шу сабабли уларнинг қарши атакаси қанчалик тез бошланган бўлса, шунчалик тез сўнди-қолди.

Комилов уларни қувлаб бориб, дарҳол иккинчи линиядаги окопларга ўтиб ололмади. Чунки у ерда пулемётлар сайрай бошлаган эди. Бунинг устига у сийраклашиб қолган сафини тўлдириши, ўқ-дори, яроғ-аслаҳаларини ростлаб олиши даркор эди. Шу мақсадда у Веселовга телефон қилиб, ёрдам сўради.

Комиловнинг жангчилари отишмани давом эттирган ҳолда ер қазиб, янги окопларга жойлаша бошладилар. Шу вақт Веселовнинг командаси билан Баталовнинг яна бир ротаси, ўнг қанотдаги батальоннинг бир взводи қақшатғич ўт очиб, Комиловни қуршаб келаётган немисларни орқага улоқтириб ташлади.

Бу орада яна ўқ-дори ва жуда кўп граната — лимонкалар келтириб бердилар. Шунча қурол юборган Веселов бу билан, немиснинг иккинчи линиясига ташлан, Комилов, демоқчи эди. Қўшни роталарнинг мададидан дадил бўлиб қолган ва шу вақт ичидаги иккичи линиянинг ўт очиш нуқталарини ҳисобга олиб ултурган Комилов атака бошлаш олдидан душманнинг пулемёт уяларига миномёт кўрпаси ёпишни буюрди. Миномётчилар ўз ишларини қилиб бўлгач, у икки взводни мадад маррасида қолдириб, икки взвод билан атака бошлади. Бекнинг йигитлари «лимонка» дўли-қуюни кетидан немис окопларига ташланаётган чоқда, ротанинг бошқа кучлари ҳам «урра!» деб қич-қирганича Комиловнинг ёнига келиб қўшилди. Немислар ора-чўра ўқ узиб, учинчи линияларига — 115² чўққисига чекиндилар.

Бу чўққилик немисларнинг жуда пухта мустаҳкамланган қўрғони эди. Уни бир ҳамла билан қўлга киритишга Комиловнинг кўзи етмади. У ярадорларни жўнатиб, қурбон бўлганларни териб олиш учун дафи қилиш командасига телефон қоқди, сўнгра жангчиларни тўйғазиши ҳақида старшинага бўйруқ берди.

Шундан кейин Комилов подполковник Веселовга телефон қилиб, душманнинг берган талафоти, ўз ротасининг йўқотишлари ҳақида рапорт берди, охирги маррага етиш режаларини айтди. Веселов унинг фикрини асосан маъқул топди, лекин тушки овқатдан кейин яна атака бошлашга рухсат этмади.

— Жангчиларинг бир оз дам олишсин,— деди унга. — Артиллерия ишингни осонлаштириб беради. Ана ўшандан кейин ихтиёр ўзингда.

Комилов ҳар томонга пулемёт ўрнатиб, керакли жойларга кузатувчилар қўйди, мудофаа чораларини таъминлагач, пана жойга ўтириб, овқатланмоқчи бўлди.

— Мирза!

— Лаббай, ўртоқ лейтенант.

— Ейдиган нарсанг борми?

— Овқат сероб, ўртоқ лейтенант, — деди да, Мирза Комиловнинг олдига плаш-пилоткасини тўшаб, газета-дастурхонга илитилган консерва, пачкаларда юмшоқ сир, банкада сариёғ қўйди. Кейин немис флягасини чайқатиб қўйди. — Мана бунақаси ҳам йўқ эмас, ўртоқ лейтенант.

— Буниси нима?

— Шнапс, ўртоқ лейтенант.

— Дарров тўкиб ташла!

— Нега? — Мирзанинг кўзлари олайди. — Кўпдан бери шнапсга энди етишдик-ку. Яхши шнапс экан. Шундай яхши нарсани тўкиб бўладими? Немис ташлаб қочибди. Сизга бир ойга етадиганини ғамлаб қўйдим.

— Заҳарланмаганми бу консервалар?

— Собировга кўрсатиб олдим, — деди Мирза. — Заҳарлашга ҳам, олиб қочишга ҳам улгурмапги моховлар. Янги келган посылкалари экан. Яшигининг оғзи ҳам очилмапти. Ҳаммасини старшина олиб кетди.

Комилов Мирзанинг дастурхонини нари суриб қўйди.

— Кўтар буларингни! — деди у. — Фашистнинг қўли теккан нарсалардан ҳазар қиласман, ўзимизнинг синашта макарон шўрвадан олиб кел!

- Бугунги овқат макарон шўрва эмас, ўртоқ лейтенант.
- Старшина нима пиширибди, бугун?
- Арпадан гўштли суюқ ош.
- Ана ўшани олиб кел. Ошпазга айт, устига сариёғ солиб берсин.
- Арпа ош ҳам тамом бўлди.
- Нега?
- Моховнинг снаряди ошга пашша бўлиб тушиб, қозон-позони билан ҳаром қилибди. Старшина қозон топиб, бўлак овқат пиширяпти.
- Жангчилар нима еяпти?
- Жангчиларни немис боқяпти. Улжа посилкалар жуда асқоттида, ўртоқ лейтенант.
- Менга нон билан чой ҳам бўлаверади,— деди Комилов қўл силтаб.
- Мирза котелогини шарақлатиб, поход ошхонаси томон чойга югуриб кетди. Шу вақт Аҳмедов билан етаклашиб, Марина кириб қолди. Улардан олдин Вафодор югуриб келди-да, икки олдинги оёғи билан Комиловни қучоқлади. Комилов Мирза келтирган консервани унга инъом қилиб, ўзи Маринага пешвоз чиқди.
- Тепалик олингани йўқ-ку, Марина, нега келдингиз?
- Шахсан полк командирининг ўзидан ижозат олдим.
- Ярадор Аҳмедовни нега олиб келдингиз, бутазордаги ишни яна такрорлабсиз-да, Марина.
- Аҳмедов бўлмаса бу ерга етиб келолмас эканман. Йўлтўсар снайперни шу йигит гумдон қилди.
- Ўз взводимга бориб қўшилиш учун рухсат этинг, ўртоқ лейтенант,— деди Аҳмедов честь бериб.
- Медсанбат ёқмадими?

— Дори ҳидини ёмон кўраман, ўртоқ лейтенант, тепаликда жанг қилганим яхши.

Комилов Маринага юзланди:

— Медицина ижозат берадими?

— Ботир жангчи экан,— деди Марина, жангга ярайди, дегандай боши билан ишора қилди.

Комилов плаш-палатканинг бир учини кўтариб, поход дастурхонини очаркан, Марина ундаги нози-неъматни кўриб, ҳайрон бўлди.

— Жуда бойиб кетибсиз-ку!

— Мирзанинг иши бу, Марина. Менга қолса қаммасини Вафодорга ташлаб юборардим. Фриц поход қозонимизни мажақлаб ташлабди. Сизни ўлжа таом билан зиёфат қилишга мажбурман.

Марина столдаги консерваларни, сирларни лупа билан синчиллаб текширди, кейин улардан оз-оздан котелогининг қопқоғига солиб, спиртда синаб кўрди-да, еса бўлишини исботлаб берди.

— Шнапс — араққа қалайсиз?

Маринанинг юзига қизил кулдиргич югуриб чиқди.

— Кўп эмас, озгина...

Комилов немис флягасини олиб, катта жигар ранг кружкага қулқиллатиб қуя бошлади. Марина «бас» дегандай Комиловнинг қўлини ушлаб қўйди. Комилов фляга оғзини беркитиб уни ёнига қўйди-да, қўлидаги кружкани гўё алёр айтган соқийлардай икки қўллаб Маринага тутди.

— Аввал ўзингиз ичинг, кейин мен!— деди Марина.

— Мен тепаликка чиқмагунимча чойдан бошқа ичимликни оғзимга олмайман!— деди Комилов.— Олинг, немис снайперини енгиб, қаҳрамонлик кўрсатганингиз учун.

— Ундай бўлса мен буни Комиловнинг ёш баҳодири Ахмедов учун ичаман. У паналаб бориб, снайперни гум-

дон қилди-да, мени бир ўлимдан қутқазди. Яхши йигит экан.

— Уларни жангда кўрмабсиз,— деди Комилов.

— Мен уларнинг бунчалик жанг қилишларини кутмаган эдим. Ҳаммаси ёш, илгари жанг кўрмаган эдилар. Немиснинг тепасига филдек ташланиши.

Шу вақт ҳарсиллаганча Мирза етиб келди ва котелокдаги чойни ерга қўяр-қўймас одамлардан эшишиб билганларини гапира бошлади.

— Чап қанотга кавалерия келибди, ўртоқ лейтенант! Отларнинг кишинаганини ўзим эшиздим. Полковникнинг олдиға танқчи офицерлар ҳам етиб келиши. Ҳамманинг оёғи илдам бўлиб юрибди.

— Мана, менга ҳам шнапс келди,— деди-да, Комилов Мирзанинг кружкасига қайноқ чойни тўлдириб қўиди, ичига бир қошиқ сариёф солиб, қанд билан аралаштириди, кейин икки бурда нонни майдалаб, унинг ичига ташлади-да, ширчой қилиб ичди.

Шу вақт радиист Комиловни рацияга таклиф қилди.

— Сизни юқори штабдан сўрашяпти,— деди радиист.

— Чамамда генералнинг шахсан ўзи гаплашмоқчи.

— Мен «Олов»дан, Комиловман. Эшитаман!— деди у рацияга. Рацияда босиқ, мулойим овоз эшитилди. Комиловнинг чеҳраси ёришиб кетди.— Хўп бўлади. Албатта, албатта...

Комилов рациядан узоқлашмай туриб, старшинани ўз ҳузурига чақирирди.

— Жўнатилмаган ярадорлар ҳам борми?— деб сўради Комилов.

— Икки киши қолди.

— Шу чоққача нега жўнатмадинг?

— Санитарлар қайтгани йўқ, ўртоқ лейтенант.

— Шундан фойдаланиб, ярадорларнинг ҳам қорнини тўйғизиб қўйдим.

- Ўқ-дори ташувчилар келдими?
- Ўқ етарли, энди гранатага кетиши.
- Олиб келишлари ҳамон взводларга тезликда тар-
қат-да, уларни яна юбор...
- Есть
- Комилов Маринага қаради:
- Санитарларимиз ҳали ҳам қайтмабди. Икки яра-
дор жўнатилмай қолди. Шуни нима қиласми?
- Ўзим элтиб қўяман,— деди Марина.— Юра ола-
диларми?
- Секинроқ бошлаб борасиз.
- Сизни рацияга ким чақирибди?
- Генерал менга муваффақият тиляяпти.
- Қачон бошламоқчисиз?
- Сизни чап қирғоққа ўтканингизни эшитганим за-
ҳоти бошлайман!
- Марина шошилиб йиғиширинди-да, йўлга тушди.
- Қош қораймай қайтиб келман.
- Ўзим чақирмагунимча бу ёққа келманг, Марина.

XX

Маринани жўнатиб, взводларнинг командирларига
тегишли кўрсатмаларни бериб бўлгач, Комилов ўтириб,
сўнгги штурм планини ўйлай бошлади. Унинг аввалги
планлари ўз кучини йўқотган эди. Чунки, жанглар вақ-
тида вазият ўзгарган, кучлар нисбати ҳам ўзгарган эди.
Немисларнинг сўнгги мэррасини эгаллаши, қуролнинг
сони ва хилидан, жангчиларнинг тажрибаси ва баҳо-
дирлигидан ташқари, уларни бошқарувчининг уқувига,
ҳарбий ҳийла ишлатиб, оз қон тўкиб, мақсадга тез эри-
шув санъатига боғлиқ эди. Буни яхши англаган Коми-
лов бошига келган турли-туман фикрларнинг қайси
бири афзал экавлигини ажратолмай гаранг бўлиб тур-
ган эди, Бек келиб қолди.

— Ўртоқ лейтенант, — деди у қандайдир муҳим гап кўтариб кёлган кишидай, — бир маслаҳат билан келдим.

— Кел, Бегим. Қандай хуш хабарлар?

Комилов Бекнинг фикри тез ва соз ишлашини, ундан фақат яхши маслаҳат чиқишини билар, ҳамиша унинг маслаҳатига жон деб қулоқ соларди. Ҳозир ҳам унга Бекнинг маслаҳати етишмай тургандай эди. Шунинг учун Бекнинг «бир маслаҳат билан келдим» деганидан хурсанд бўлди.

Тепаликни қандай қилиб осонроқ қўлга киритишни маслаҳатлашиб олсак, ўртоқ лейтенант.

— Бу тепалик онсонликча қўлга киради, деб ўйлама, дўстим, — деди Комилов бошини қашиб. — Осонини ўй-лайвериб, бошим қотди. Чапаевчасига олишга тўғри келади.

— Мен қандай қилиб озроқ қон тўкиб, тезроқ маррага етишни ўйлаяпман, ўртоқ лейтенант. Осонроқ деганимнинг маъноси шу.

— Қани, — деди Комилов ундан янги фикр излаб.

— Немиснинг 115² чўққисига ўрнашиб олиши ёмон бўлди. Энди уни тикка бориб олиш қийин, бу аблажни ер остидан бориб, қўпоришдан бошқа иложим йўқ, деган эди Ҳамдамов.

Комилов ўйланиб турди-да:

— Яхши маслаҳат топиб келибсан, Бегим. Сенингча, буни қандай амалга оширсак кам қон тўкиб, мақсадга тез эришамиз? Бу ишимизнинг натижасини бутун армия кутяпти. Сенга айтсам, боя рация орқали шахсан генерал Чистяковнинг ўзи мен билан гаплашди. Чамамда Зарбдор армиямизнинг тайёргарлиги ҳам ниҳоясига етиб қолганга ўхшайди.

— Чўққининг киндингигача ер остидан ғор ковлаб бориб, беш-олти қоп тротил қўйиб, бу ёқдан гугурт ча-қиб юбориш керак

— Гугурт чақиши нимаси, бу ишни механизм қилиши мүмкин. Сапёрларда қўпориш машинаси йўқ эмас-ку. Ҳамма гап ўша ғорни ковлагб улгuriшда.

— Фор ковлашни менга қўйиб беринг. Бу ишни менинг ёш жангчиларим қиласди. Умуман, тепаликка бўладиган бу сўнгги ҳужумни менинг ўзимга топшириб қўя қолинг. Планим тайёр: икки бўлинмача билан гўё штурм қилаётгандай ўқ узиб, немиснинг кўзини очирмай тураман. Бу ёқдаги взводлар ишлайверишади.

Бекнинг бу плани Комиловга маъқул тушди. У ҳам буни подполковник Веселовга баён қилгач, амалга оширишга рухсат сўради. Веселов бу планнинг баъзи икирчикирларини, ҳисоб-китобларини аниқлаб олди-да, форқазиб, қўпорув ишни бажариш учун унга саккизта сапёр юборадиган бўлди.

XXI

Комилов кеч тунгача ҳужум жамалғасини ростлади. Баъзан онда-сонда пулемёт овози эшишилар, баъзан ракета отилиб, атрофни чарақлатиб, кумуш камалакдай эгилиб пастга тушарди. Осмонда кўк каптардай туриллаб, гоҳ фарбга, гоҳ шарқ томонга самолётлар учиди ўтари. Шарқ томонга ўтган разведкачи сомолётларнинг бири чап қирғоқда, Комилов ротаси устидан пастлаб ўтиб кетди. Комилов жангчиларини аста-секин чўққилар остига тўпламоқда эди, унинг устида фронтчилар «рама» деб атаган икки фюзелажли «Фокке Вульф» самолёти пайдо бўлди. У худди 115² дўнглигидан кўтарилигандай пастлаб ўтди. Ойдинда унинг зирҳли қорни ва «П» ҳарфига ўхаш беўхшов думи бемалол кўриниб турарди. Артиллерияга мўлжал кўрсатиб берувчи бу самолётнинг бевақт учишидан Комилов ҳар хил хаёлга борди, унинг кетидан қараб турди. «Рама» Дон остига боргач, чапга бурилиб, ҳавода аста сузди, кейин темир йўл

станцияси томон учишини тезлатди. Шу чоқ дүнгликлар орқасидан устма-уст чақмоқ чақиб, немис артиллеријаси тўп ота бошлади. Снарядларнинг овозидан Комилов уларнинг қаерларда портлаётганини тахминлаб, немис Донга тўпланаётган кучларимизни сезиб қолибди, деган хуносага келди. Бунинг учун у нимагадир ўзини айбордай ҳис қилас, бу ҳис бағрини тирнарди.

— Бекдан хабар борми? — деб сўради у Мирзадан.

— Ана унинг одами келяпти... — деди Мирза.

Шу чоқ Бекнинг чопари келиб, Комиловга яна ярим соатлик иш қолди, деб хабар бериб кетди. Бекнинг йигитлари полк сапёрлари билан бирга фор ковламоқда эдилар.

— Тўхта, бирга борамиз, — деди Комилов чопарга.

Чопар олдинда, Комилов кетинда эмаклашиб, фор йўлининг бошига етиб олишди. Бу йўлнинг боши жарликда эди. Жарлик нам тупроқ ва шағал аралаш бўртупроққа тўлиб кетибди. Бунинг устига Бекнинг йигитлари қопчиқларда яна шағал аралаш тупроқ келтириб тўкмоқда эдилар.

— Чўққининг ости шағал тупроқ экан, ковлаш қийин бўляпти, — деди қопчиғини бўшатаётган Мусабеков.

— Конвейер қилсаларинг бўлмайдими?

— Ҳали ҳам шундай қиляпмиз, — деб жавоб қилди Мусабеков енги билан пешанасини артиб. — Биримиз ковласак, биримиз қоплаймиз-да, қўлма-қўл ташқарига узатамиз. Тез-тез жойимизни алмашиб турмасак, нафас бўғилиб қоляпти.

— Сиз горнинг охиридамидингиз?

— Ўзим қазиган тупроқни ола келдим, — деди ҳансираф Мусабеков.

— Ҳали иш кўпми?

— Яна бир оз тупроқ олсак кифоя. Кейин ўрнимизни сапёрларга бўшатиб берамиз.

— Сапёрлар қаерда?

Комиловнинг сўровига Мусабековдан аввал бояги чопар жавоб қилди:

— Анави ғарам тупроқнинг орқасидаги чуқурликда. Улар ҳам қўпорувга тайёр бўлиб, Бекнинг ишорасини кутяптилар.

Уларнинг гапи тугамай, янги қазилган фор ичидан Бек эмаклаб чиқди-да, Комиловни кўрмади шекилли, жарликка қараб аста шивирлади:

— Сапёрлар!.. Тезроқ бўлинглар!

Шу чоқ жарликнинг устидаги тепалик осмонида чақмоқ чақиб, мушак портлади. Бундан теварак-атроф чарақлаб, ҳамма ёқ сутдек оқариб кетди. Комилов ва унинг шериклари ўзларини тупроқ панасига ташлашди. Мушак уларнинг тепасида майда оқ зарраларга бўлинниб, ўроқдай эгилиб, Комиловдан сал нарида ётган Мусабековнинг оёғидан икки қарич пастроқча тушди, унинг заррачалари эса Комиловнинг икки ёнига тўклилди-ю, сўнди. Атрофни яна қоронгилик қоплади. Бу қоронгилик эса Комиловнинг юрагини ғаш қилиб қўйди. Унинг назарида немислар уларни кўриб қолгандай эди.

— Форга киринглар, немис бизни ўқقا тутади, — деди Комилов ҳамроҳларига.

Улар сунъий форга кириб олиб, кутишди. Немис ҳадеганда отишни бошламади, мина ҳам ташламади. Бундан Комилов билдики, немис уларни кўргани йўқ.

— Вақтни ўтказма, Бегим! — деб буюрди Комилов.

Бек ўз одамларини сунъий фордан чиқариб, атака жойига жўнатди-да, сапёрларни қўпориш қопчиқлари билан форга киритиб юборди.

Комилов Бекнинг чаққонлигидан, шунча қийин ва оғир ишни анча осон ва тез уddaлаганидан мамнун эди. Айниқса, бу ишлар Ҳамдамовнинг ғояси билан

рўёбга чиқарилаётганидан шод эди. Бу шодлик унга қанот бердими ёки энг масъулиятли дақиқалар яқинлашиб, мұхим ғоя унга куч ато қылдими, әмаклаб ўтирумай тик юриб, гурсиллаб қадам ташлаб, рота жангчиларининг олдига борди. Жангчилар ҳам ўз лейтенантлари руҳидан дадилланиб кетишиди.

Сапёрлар командири қўпориш машинасининг қулоғини бураб юборишга рухсат сўради ва Комиловдан ижозат бўлгач, чўққиликда гумбурлаб фугас портлади-да, Комиловнинг кўзига қирқ қулоқли баҳайбат қозон ичидан ботмон-ботмон қора бўтқа атрофга сочилиб кетгандай бўлиб кўринди.

Комилов икки взводни ўт очиб, ҳужумчи группага мадад бериб туриш учун қулай жойларда қолдириб, ўзи портлов натижасини дурбинда кўрар экан:

— Отангга раҳмат, Бегим! Жуда яхши жойни танлаган экансан, немиснинг замбараги ҳам, пулемёти ҳам тупроққа қоришиб кетибди. Мана энди олға! — деб тепалик томон бошлиди.

Бекнинг жангчилари шуни кутиб туришган экан, кимдир «ура!» деб юборди. 115² тепалиги чўққисига бўлган сўнгги атака Бек взводининг кучли «ура!»си билан бошланиб «урра!» билан тугади. Чунки немислар портлаш даҳшатидан ҳали ўзларига келмаган эдилар. Яна шуниси ҳам борки, портлаш улар кутмаган жойда, кутмаган вақтда тўсатдан содир бўлди. Немис қўмондонлиги ҳам, солдатлари ҳам бунинг сирини билолмай қолишиди. Шунинг учун чўққилик мудофаачиларидан соғ қолганлари ҳам Комиловнинг жангчиларига қаттиқ қаршилик кўрсата олмадилар. Баъзилар қўл кўтариб, таслим бўлишди, айримлари қочиб қутулди. Бир офицер иложсиз қолганидан Комиловнинг кўзи олдида ўзини ўзи отиб ўлдирди.

Чўққига чиқиб олгач, Комилов воронкани кўриб,

ҳайрон қолди. Чўққиликда гуё смола қайнатилган баҳайбат ўчоқ пайдо бўлган эди.

— Бек! — деди Комилов.

— Лаббай!

— Мана сенга тайёр истеҳком, тезда ўзлаштириб ол!

Комиловнинг буйруги билан бошқа бўлинмалар ҳам немис окопининг ёқасини тескарига қайириб, мудофаа чораларини кўра бошладилар.

Комилов окоплардан бирига Ҳамдамовнинг каскасини қўйди-да:

— Ҳамдамов ҳам қаторимизда! — деди.

Шу вақт тепалик қибласидаги бутазор томондан замбаракнинг қисқа ва бўғиқ овази эшитилди.

— Ётинглар! — деб қичқирди Комилов ва ўзини чуқурликка ташлади.

Снаряд тепаликнинг елкасида портлади. Қейингилари жангчилар эгаллаган окоплар атрофида портлай бошлади.

— Чўққини қайтариб олмоқчи, бу песлар! Сенга қайтариб берадиган аҳмоқ йўқ!

Шундай деди-да, Комилов керакли жойларга пулемётларни ўрнатди, душман солдатлари контратака бошлаб қолишича, уларни ажал ўти билан кутиб олиш тадбирларини кўриб, аскарларга ўз секторларини белгилаб, Веселовга телефон орқали рапорт берди, ўзига топширилган вазифа бажарилганлигини айтди. Веселов Комиловни ғалаба билан қизгин табриклади, уни қўллаб-қувватлаб турражагини билдириди.

Комилов трубкани қўйиб, Мирзани чақириди ва кучуги билан бирга олдинма-кетин унинг ҳузурига келган Мирзага тўнтарилиб ётган немис офицерининг каскасига чўққи тупроғидан тўлдиришни буюрди. Мирза қора каскага бўр аралашган шағалли туп-

роқни тўлдириб, Комиловга келтирди. Комилов каска ичидаги тупроқ орасидан тошларини териб ташлади, снаряд ҳамда мина парчаларига тегмади. Темир-пўлат парчалари аралашган тупроқни сиқимлаб кўрдида: «Буни Ҳамдамовнинг қабри оёғига тўкиб кел», деб буюорди.

Мирза Ҳамдамовнинг васияти ҳамда Комиловнинг аҳдини эслаб:

Старший лейтенантнинг қабрини шу чўққига кўчирмоқчи эдикку! — деди.

— Ҳали эрта! — деб жавоб қилди Комилов,— доғда қолган немис бизни тек қўяди деб ўйлайсизми, энг оғир жанглар мана энди бошланади.

Мирза кучугини эргаштириб, бўйруқни ижро қилгани йўл олган эди, Комилов унга яна иккита топшириқ берди:

— Кучукни ўша ёқقا ташлаб кел, кўнмаса боғлаб қўй. Мабодо Маринани кўргудай бўлсанг, қатъий қилиб айт, ўзим рухсат этмагунимча бу ёқقا кела кўрмасин. Тушунднингми, Мирза?

— Тушундим, ўртоқ лейтенант.

Мирза Вафодор билан бошлашиб кетди, бир зумда траншеялар ичидан кўздан ғойиб бўлди.

Комилов Ҳамдамов қабрига чўққи тупроғини сепаётганини ўз кўзи билан кўрмоқчи бўлгандай Мирзанинг орқасидан қараб, ўйланниб қолди.

Артиллерия кононадаси билан тонг отди. Булутлар кўпикланиб-кўпикланиб кўкда оқади. Оқ булутларнинг қора сояси дўнгликлар, жарликлар ва текис ерларнинг бўрли кўрпаси устида сузади. Бу оқ булутларнинг эмас, қизил юлдузли оппоқ пўлат қушларнинг сояси. Бир сўз билан айтганда, Комилов кўпдан бери кутган ишлар бошланган эди. Доннинг чап қирғоғига тўпланган Зарбдор армия қўзғалди!..

Шу билан бирга Комиловнинг кўнглига келган ва унинг юрагини ғаш қилиб турган ҳавфли воқеалар ҳам бошланди. Немислар ҳужумга ўтган Зарбдор армиянинг йўлини тўсиш учун катта куч ташлаб, яна тепаликни қўлга киритишга урина бошладилар. Комилов ротаси учун ҳам энг оғир синовлар бошланди.

Немислар тепаликни уч томондан қуршаб олдилар-да, Комиловнинг чўққига жойлашиб олган жанговор группасининг бўйнига гўё хомут бўлиб осилиб олиб, уни пастда қолган икки взводдан узиб қўйиши. Чўққидаги мудофаачиларнинг сони ҳам тобора камайиб бормоқда эди.

— Ҳаммамиз шу ерда тупроққа қоришиб кетсак қоришиб кетайликки, чўққига немисни чиқармайлик! — деди Комилов ўз жангчиларига.

Бек шу чоқ планшетдан ўз халқининг муқаддас мактуби босилган мұтабар газетани олиб, бағрига босди-да, уни Бобоёрға узатди. Бобоёр ҳам Бек қилган ишни такрорлаб, уни Мусабековга берди. Мусабеков газетадаги халқ даъватининг сарлавҳасини кўриб, ундан нима талаб қилишини тушунди ва патронининг учи билан унга имзо чекди-да, ёnidаги пулемётга ёпишиб олиб, немисга ўт ёғдираётган Эрдоновга ошириди. Эрдонов эса, бармоғини бўйнидаги ярасининг қонига бўяб, мактубнинг остига босди. Мактуб остида ўз қони билан босилган бармоқ ўнтага етди.

Ҳамма жангчи қўл қўйиб бўлгач, Бек уни Комиловга топширди. Комилов жангчиларнинг қони билан муҳрлаб қўйилган бу мактубга ўн биринчи бўлиб ўз қони билан имзо чекди-да, жанговар қасам ҳужжати сифатида муқаддас ҳужжатни авайлаб тахлаб, гимнастёркасининг кўкрак чўнтагига солиб қўйди. Бу ҳужжат ғалабага катта ишонч рамзидай унинг қалбини жўштирди, юрагини янада дадил қилгандай бўлди.

Немисларнинг сиқуви тобора кучайиб бораётгани сабабли Комилов Дон бўйида нималар бўлаётганидан бехабар эди. Бу вақт Зарбдор армия деб аталмиш қўшинларимизнинг отлиқ аскарлари, пиёдалари Веселовнинг «Кичик ери»га ўтиб олиб, унинг батальонлари билан Клетск станицасига ҳамла қилаётганини ва бу ишда Комиловнинг ҳиссаси жуда катта эканини унинг ўзи билмас эди. Тўғрироғи, бу ҳақда ўйлашга унинг вақти мутлақо йўқ эди.

Тепаликнинг энг чўққисида, мисоли дўппидай жойда Комиловнинг ўзи билан ўн бир фаол наиза қолган. Комиловнинг назарида, уларнинг ҳам соғ жойи қолмаган эди. Бинт етишмаганидан айримлари кўйлакларини йиртиб, яраларини боғлаб олган эдилар.

Буларни кўриб, Комилов ич-ичидан мамнун бўлди. «Бундай жангчиларни немис енгигб бўпти! Булар фил! Филнинг ўлиги ҳам фил!» деди Комилов фикран. Бу фикридан ўзида ҳам янги куч пайдо бўлди.

Комиловнинг кўз олдида бағрини ерга бериб, Бекюмалаб қолди. Ундан сал нарида Аҳмедов йиқилди. Қаерда нима портлаб, нима отилаётганини Комилов эшиятмасди. Аммо унинг кўзи ўз окоплари олдида чўққидаги «қирқ қулоқлик қозон»нинг ўчоги атрофида тутдай тўкилаётган немисларнигина кўради. Демак, унинг жангчилари ҳали жанг қобилиятини йўқотмаган.

Унинг икки ёнидан ва устидан яна бир неча соя югуриб ўтди. Бу — совет самолётларининг сояси эди. Узоқузоқларда ҳам шундай бўлмоқда. Демак, Зарбдор армиянинг ҳужуми давом этмоқда. Комилов вазиятни билмоқ учун батальон штабига телефон қилмоқчи бўлди. Телефон симлари парча-парча бўлиб, узилиб ётарди. Телефонист аппаратини қуchoқлаганича қотиб қолибди. Радист билан рация эса, снаряд остида қолиб, тупроқقا қоришиб кетган эди. Жанг давом этарди. Комиловнинг

тепасидан, атрофидан немислар томон ўқлар учиб ўтар, миналар, атака қилаётган немиснинг бошига тушиб портлар, гранаталар ҳам партиллатиб турарди. Кимлар отмоқда? Кучли «урра» садоси эшитилгандай бўлди. Комилов орқасига қайрилиб қаради. Унга ёрдамчилар келмоқда эдилар. Комилов уларга қўшилиб «урра» деди. Унинг ёнида қонға белангани ўн баҳодир ҳам «урра» деди. Аммо Комилов иккинчи марта «урра» деёлмади. Уни мина парчаси чуқурликка улоқтириди...

Комилов нима бўлганини билмади. У кўзини хиёл очган эди, бошида Маринани кўрди. Сўнгра Вафодор кўзига чалингандай бўлди. Унгими, тушими, билолмади.

— Қаерда ётибман?..

— Ўзингиз «тиббий уй» деб атаган жойдасиз, — деди Марина унинг бошини силаб.

— Штаб?.. Штаб?.. — деди Комилов оғзи қуруқшаганидан тилини тақиллатиб.

Марина дарҳол унинг лабини дока билан ҳўллаб қўйди. Комиловнинг анча киртайиб қолган кўзлари жавдиарди. Марина уни тинчтиш учун вазиятни қисқа ва батафсил гапириб бермоқчи бўлди.

— Штаб бу уйдан кўчиб кетди, — деди Марина олдин унинг саволига жавоб қилиб. — Чунки полк душманни анча узоқларга қувлаб кетди. Шундан кейин подполковник Веселов штабини ўз ёнига чақириб олди. Қўшинларимиз Сталинградга хуруж қилаётган фашистларни қуршаб олиш операциясини бошлаган эмиш...

Комилов мамнун бўлди. Унинг мамнунлиги кўзидан маълум эди.

— Тепалик... кимнинг қўлида?.. — деб сўради Комилов бир оз дадиллангандай.

— Ўзимизнинг қўлимизда! — деди Марина. — Ҳадеб савол бераверманг менга. Гапириш мумкин эмас. Қорнингиздаги чоклар сўкилиб кетади. Жим ётинг!

Марина унинг елкасидан аста босиб қўйди. Севикли қизэning юмшоқ қўллари унинг танасига роҳат баҳш этганидай бўлди. Бунинг оромидан Комилов кўзларини аста юмиб, жимиб қолди. Шу чоқ унинг кўз ўнгида туғилиб ўсган қишлоғининг манзаралари намоён бўлди.

Қишлоқда баҳор... Боғлар ипакка чулғанган.

Баҳор... Мактаб болалари гуруллаб келиб, унинг бир тавақали дарвозасига, кўча деворига оқ бўр билан «Комилов — Марина»... деб ёзиб кетишиди. Комилов уларни қувлаб етди, биттасининг қўлидан маҳкам ушлаб олди... Шу он уйғониб кетди. Унинг қўлида Марина-нинг юмшоқ қўллари, Марина унга термулиб турар эди...

* * *

Яхшилик унүтилмайди, жасорат — мутлақо! Комилов бу ҳақиқатга яқиндагина Дон бўйида яна бир бор шоҳид бўлди. Сталинграддаги оламга маълум ва машҳур ғалабамизниң 25 йиллик тўйи муносабати билан донликлар уни меҳмон қилиб чақирган эдилар. Вақт билан воқеалар кўп нарсаларни ўзгартириб юборган эди: хутор ва станция янгидан яралган, уйлар тикланиб, боғлар барно этилган, чорак аср муқаддам пайхонланган бутазорларда дараҳтзор ўсиб этилган. Старо-Клетскнинг катталари кексайиб, ёшлиари улгайган, болалари балофатга етган, аммо унинг назаридаги дарё билан Марина ўзгармаган эди. Тинч оқар Довнинг сарғини суви умрида ҳеч нарса кўрмагандай асрлар єирини туғига яшириб, жим ва лиммо-лим оқарди. Марина ҳам Комиловга ўша асл Маринадай, ўша вақтда қандай бўлса, ҳозир ҳам шундай жозибали кўринди. Комилов унинг юзидан ажин, сочидағи оқ тола қидирмади, балки аввалгидан ҳам яқин, қадрдондай ва фақат якка унинг ўзига шундай жозибали боқаётгандай боқди, Марина

эса уни маҳкам қучоқлаб, лабларидан бундан чорак аср аввалгидан ҳам қайноқроқ ва қаттиқроқ ўпди.

Кудуқ олдидағи «Ўртоқлар мозори»га ҳам, уч олма ўртасидаги Ҳамдамовнинг мармар тош қўйган қабрига ҳам улар биргалашиб гулдаста қўйишди. Кейин изи ўчган ўша эски жанглар йўли билан комиловчиларнинг виждон чўққиси бўлмиш 115² чўққисига чиқишиди. Чўққиликда тупроқдан кўра гильза, «осколка» деб аталмиш снаряд ва мина парчаси кўп эди. Окопларнинг вайроналарида ўқлар тешган, снарядлар букиб ташлагани каскалар ҳамон ётарди. Комилов улар орасидаги Ҳамдамовнинг каскасини топди-да, чўққиликнинг энг баланд еридаги гильза ғарами устига ўрнатиб қўйди. Унинг кўз олдида ўша жанглар манзараси намоён бўлди. Жанговар дўстлари кўз олдидан бир-бир ўтдилар. Комилов бошидан шляпасини беихтиёр олиб, бир дақиқа сукутга ботди.

— Ҳамдамовнинг мозорини шу ерга кўчирамиз! — деди у марҳумнинг васиятини эслаб.

— Ҳукуматнинг қарори, доиликларнинг аҳди бор, — деди Марина. — Бу чўққига «Ўн бир ўзбек паҳлавони қўрғони» деб ном берилган. Ҳамдамовнинг каскаси турган жойга терак бўйи ёй нусха ёдгорлик қўйилади. Лойиҳаси тайёр. Атрофи боғ бўлади, ёдгорлик остида кечакундуз мангулик гулхани ёниб, мангулик қўшиғи янграб туради...

Дарҳақиқат, фашизм устидан қозонилган оламшумул ғалабамизнинг шонли 25 йиллиги кунида, Тинч оқар Дон дарёсининг ўнг соҳилидаги «Ўн бир ўзбек паҳлавони қўрғони»да мангулик қўшиғи янграб, яхшилик йўлини ёритиб, жасоратни мадҳ қилиб: «Одамлар, ҳамиша ҳушёр бўлинглар!» деб нидо қилиб турнибди.

Март, 1970 йил.

Р 33

Рахим Иброким.
Мангулик қўшиғи. Повесть.
Т., «Ёш гвардия», 1972.
128 б.

Рахим И. Песня вечности. Повесть.

Уз2

7-3-3

На узбекском языке
ИБРАГИМ РАХИМ
„ПЕСНЯ ВЕЧНОСТИ“

Повесть

Издательство „Ёш гвардия“ — Ташкент — 1972 г.

Редактор М. Саломов
Рассом А. Левицкий
Расмлар редактори К. Назаров
Техн. редактор Л. Шишикина
Корректор Д. Обидова

Босмахонага берилди 7/XII-71 й. Босицга рухсат этилди
28/II-72 й. Формати 70×108^{1/32}. Босма листи 4,0. Шартлии
босма листи 5,6. Нашр листи 5,4. Тиражи 30000. Қоғоз № 2

Ўзбекистон ЛКСМ Марказий Комитети
„Ёш гвардия“ нашриёти, Тошкент Навоий кўчаси, 30.

Ўзбекистон КП Марказий Комитети нашриётининг
босмахонаси. Тошкент, „Правда Востока“ кўчаси, 26.
Заказ № 1861 Баҳоси 27 т. Р04182,